

# Luk

## *Luk girek en Tiofilas san na igane yau a*

<sup>1</sup> O tamol tubun en Tiofilas, tamol wei mi memel a man lulunama lo nunon dilasa yan ninedi wo digire la ya. <sup>2</sup> Memel nek an, tamolpein a sed malad lo dil an durupaiamag malon a. Tamolpein en gubak mi ru en kagin dupani uyan se ya, agod ru dugo durupaiama na yan, ru nek an mi migire idu ya. <sup>3</sup> Naiseg mi memel an fidian, fun lo dilasag ipalu yan nupupi nile ya. An ninen o naisag ilo sou lo mel en uyanan a, nai gamu mel en fidian tet mi ka ngire pano wa. <sup>4</sup> An lo dop memel a dipitenano yan sad fudi mok on ulon sinjakan a, agod mel amaiak fidian rumok an dam ulon a.

## *Jon ilasa wak ninen enel ta Sakaraia irupeia*

<sup>5</sup> Saen Herod in Judea provins sad kin imado dugo, pris ta dam imado se ya, yan Sakaraia. In pris biatitek lulunad lo a yan Abaija dubol dan san tamol ta. In Aron san gugoi lo ilasa ya, iwon Elisabet dam in Aron san dar lo ilasa ya. <sup>6</sup> Tamol an iwon da Anut malan lo itaot a, ago dugo in Tubun ak san kubiaen agod ru kagin an fidian duri dupani se ya, agod talpein ta inaned kagin an ninen o ru ta ibol san tia ya. <sup>7</sup> Ak man in nanuk amad tia ya. Man dugo, Elisabet in pein niganig, taida mi, uraru an mel saiak digane la ya.

<sup>8</sup> Biatitek a lo, saen tamol dumado se yan tempel lo urat disini dugo, Sakaraia dida urat digane se ya. Nal ta lo in Anut naon na pris urat igane se

ya. <sup>9</sup> Aria, pris sad kagin lo, inanen urat kisaek adi dipiliani a. An lo in Anut san tempel lo iladup, ante alta san yai fo yaikas mumalum iwen sinjaokan dan igane wo, kob dupani a. <sup>10</sup> Aria, yaikas an igane san saen ilasa dugo, tempel lo iladug ago igane se ya, ago dugo tempel patun fo tamolpein a ubou dile wo dutumani an gadin digane se ya.

<sup>11</sup> Saen nek an lo Tubun en san enjel Sakaraia naon na ilasag, yaikas mumalum iwen dak san alta giranen won ak lo itur a. <sup>12</sup> Saen Sakaraia enjel an ile man, irut saian geig go irer a. <sup>13</sup> Ak man enjel an irupeig ibol, “Sakaraia, on urer umoi. Anut onsa gudanek ilon la ya. On iwo Elisabet nanuk tamol ak ta igansi wa, ago dop yan an Jon ubol a. <sup>14</sup> In on ilo bulbal ipano dop on ilo uyanan geig a. Agod tamolpein wei kasik in ilasa yan ninen o yousai digane wa. <sup>15</sup> Man dugo, in Tubun en malan lo tamol tubun ak imado wa. In wain, ayu naon sensen ak dam ta iluk na wa. Agod saen tinan igansi man, in Awan Urgan in anep tinin in anefutep pempem ago imado wa. <sup>16</sup> In Isrel lulan lo tamolpein wei kasik in iliaip, dida fon dumul pe insad Tubun ak Anut san na diau a. <sup>17</sup> In Tubun ak naon na imug pe dal ikubune wa. Elaija san ur lo, agod Elaija san dabai lo dam ago igane wa. In idiraip nanuk tamad dida ilod ibilisap, nug ninen o dumat a, agod tamol silei ak ilod ibilisap, tamolpein itaot ak sad kankan milaen ak dinane wa. An lo dop insan urat an lo in tamolpein ikubuniaip, Tubun ak ipalu wo malad diganep dumado wa.”

<sup>18</sup> Ago tag Sakaraia enjel an isumiani, “Nai iwog da mel saiak migane ya. Dugo won pe ru ubol an

nuñon ñalonñ ak i?”

<sup>19</sup> Agog eñel an ru naon irupeig ibol, “Ñai Ge-  
briel. Ñai Anut naon na ñatur da. Anut sen ñai  
idinag go, ru uyanan en ñurupaio wo ñupalu ya.

<sup>20</sup> Ak man oñ ñaisag ru en ilo lo ta rumok na yak  
niñen oñ awa itaup mado wa. Ago mado yaup ru  
an nuñon ilasa gup, awa ipuk pe, ñiñe wa. Ñaineg  
ru iñanen saen fo mi nuñon ilasa wa.”

<sup>21</sup> Ago dugo tamolpein a kuai te Sakaraia diti-  
tianig dumado dan, ilo sou wei kasik digane dugo  
dubol, “Ata mel mok igane dugo saen milaen kasik  
imado di?” <sup>22</sup> Murnag tempel lo kuai te ilasa man,  
tamolpein ru irupidai san tia ya. Ago tag inñ dulonñ  
ak, Sakaraia tempel lo malan ñutun ile yan lo,  
inñeñ san tia yak niñen o, banin nam toutou igane  
se ya.

<sup>23</sup> Aria, inñ urat isini san saen itout go inñsiganen ab  
lo imul yau a. <sup>24</sup> Murnag iwon Elisabet luan anda  
ya. An niñen o kalam 5 ab lo imianuk imado se ya.

<sup>25</sup> Ago dugo ibol, “Tubun en mel en igane panag a.  
Gamu inñ ilon ipanag a, agod ñaisag miai tamolpein  
naod na ipasi yau a.”

### *Jesus ilasa san niñen o eñel ta Maria irupeia*

<sup>26</sup> Elisabet luan andag kalam 6 yau dugo, Anut  
eñel Gebriel idinig, Galili provins lo taun ta yañan  
Nasaret, atna yau. <sup>27</sup> Inñ pein baras itaot ak ta san  
na yau a. Pein an yañan Maria. King Dawid malan  
kubulan ta yañan Josef dubol dan ñien dupani a.  
<sup>28</sup> Gebriel inñsan na yaug ibol, “Ilo uyan dop mado.  
Anut ipitiano dak, inñ ilon ipano dak, inñ oñ da  
amado da.”

<sup>29</sup> Maria ru an ilon go ilon weiwei dugo ilon lo ibol, “Ilo uyan ru naok ago yan fun dugo mok ak i?” <sup>30</sup> Ago tag enel irupeig ibol, “Maria, on urer umoi. Anut on o ilon uyan da. <sup>31</sup> On lua ama dap, nanuk tamol ak gansip yan an Jesus ubol a. <sup>32</sup> In tamol tubun ak imado dop, Anut lak na geig an Nanun dubol a. Agop, Anut iganep in kin ilasap, tubun bagen Dawid imado yak ago mi imado wa. <sup>33</sup> In Isrel tamolpein pempem mi itirnaip imado wa. In san kagin panek wadan an itout san tia ya.”

<sup>34</sup> Ago tag Maria enel isumianig ibol, “Nai tamol da gamugo mator da, an lo mel an dugo won ilasa wak i?” <sup>35</sup> Enel an ru naon irupe, “Awan Urgun on lo idup, Anut lak na yan san dabai on ituano wa. An ninen o nanuk a mitep gansi wan gun a, agod tamolpein in Anut Nanun dubol a. <sup>36</sup> Ulon. On nibi Elisabet pein saiak bo man, in dam luan anda ya. Imug in niganig dubol na ya. Gug gamu in luan andad kalam 6 ibisei la ya. <sup>37</sup> Man dugo, Anut in lo man mel fidian pasauman a, ta muruan man tia ya.”

<sup>38</sup> Ago tag Maria ru naon irupe, “Nai Tubun en san urat pein mi a. Ago yak ninen o ubol dan ago nai lo ka ilasa wa.” Agog enel an Maria ibiseig yau a.

### *Maria Elisabet ile wo yau a*

<sup>39</sup> Saen an lo, Maria bioun ikubuneg, Judea Provins lo panu ta tan bubun titinae ak ate ririan yau a. <sup>40</sup> Yaug, Sakaraia san ab ilon lo iladug, Elisabet ilo uyan ru irupe a. <sup>41</sup> Saen Elisabet Maria san ilo uyan ru ilon man, in anen nanuk tinan lo isokalik a, ago dugo Urgun ilon in anefuteg, <sup>42</sup> awan

tubun mi ibol, “On pein fidian lulunad lo Anut san bar n̄aneg mado da. Nanuk a on gansi wan in dam Anut san bar in̄aneg imado da! <sup>43</sup> N̄aineg Tamol Tubun ak tinan ilon ipanag go, n̄ai iliag o ipalu ya. Ata wo bar an ipanag ak i? <sup>44</sup> Ulon, saen on n̄ai rupaiag man tin̄aeg lo nanuk youn anda isokalik a. <sup>45</sup> On bar ama da mado da, man dugo, mel a Tubun en irupaio yan nun̄on ilasa wan ilo lo rumok go awan wabi a.”

*Maria san bar*

<sup>46</sup> Agog Maria ibol:

“N̄ai n̄utug Anut yan̄an yabisa da,

<sup>47</sup> agod n̄aineg ur Anut enti patug ipasi wan lo youn isa da.

<sup>48</sup> Man dugo, n̄ai pein kawan, yan̄ag tia ya. Gug in n̄ai o ilon isou a.

Gamu en, agod nal murnai san fidian, tamolpein fidian n̄ai nin̄eg o ago dubol a, ‘Pein en bar in̄aneg imado da.’

<sup>49</sup> Man dugo, Enti a dabai fidian anda yan, mel tubun geig ak n̄ai o igane ya.

Rumok, in yan̄an gun a.

<sup>50</sup> In̄anen ilo mun̄anek, tamolpein ensauta a in̄ o direr dan ituanai da,

tamolpein e gamu dumado den ituanai da, agod malad kubulan a murnap dilasa wan dam mi a.

<sup>51</sup> In̄ tuon nam kulob dabdabai ak idiri dugo teil a, Tamol sed bubed lo tutubu dubol dugo yan̄ad diabisa dan irubai diau a.

<sup>52</sup> Kin̄ dabdabai an ibiai dudu dugo, tamolpein a yan̄ad tia yan ibiaisa ya.

- 53 A dumatigen dan melmel uyan uyan ak nam ifutuwaig in luad ipuk a.  
Ago dugo a filiad anda yan idinaig sen dilasag banid kawan diau a.
- 54 Inanen urat tamol Isrel ibinawai a,  
inanen ilo mujanek ikubiai pidinai an ilon ta inaoŋ na ya.
- 55 Tia, ilo mujanek an in Abraham inanen malan kubulan dadi pempem ikubiaip dile dop na wa,  
nek ibol tubud baged wagam irupidai ak ago mi a.”
- 56 Aria, Maria Elisabet da kalam utol dumado gug, fon imul go sen naon na yau a.

*Elisabet Jon igansi a*

57 Elisabet nanuk igansi san nal idaisudag, nanuk tamol ak igansi a. 58 Tubun en Elisabet ilon imujanani an muroun muroun duloŋ go in dam youdi isa se ya.

59 Nanuk igansig nal 8 yau dugo, nanuk tinin sunulon dutute wo, taman waian diganep Sakaraia dubol o dupalu ya. 60 Ak man tinan imoig ru igo ibol, “Tia, yaŋan Jon tabol a.”

61 Agog in durupeig dubol, “Ak man oŋ murou murou lulunad lo yaŋak ta ago man tia ya.”

62 Agog in banid nam Sakaraia toutou dupanig, nanuk yaŋan ipate wo dusumiani a. 63 Ago tag Sakaraia banin nam toutou igane dugo tafel (slet) dupanig, fo nanuk yaŋan igire: “In yaŋan Jon.” Agog in fidian durut saian a. 64 Gamu nam Sakaraia awan ipuk go fun iganeg ininŋen dugo, Anut yaŋan yabisa ya. 65 Agog ab susumeik an aban ago dileg, durut saian a. Ru an Judea ilon

lo panu panu tamolpein fidian duloŋ go, kubol en niŋen o diŋiŋeŋ se ya. <sup>66</sup> Tamolpein a fidian ru a duloŋ an ilod weiweig nug dusumiani, “Ak dugo, nanuk an san madok murnap dugo wak i?” In kuai tem dile yak Anut anen tuon dabai nanuk an da ya.

*Sakaraia san bar*

<sup>67</sup> Awan Urgan Jon taman Sakaraia ilon injanefuteg, in profet ru en ibol a,

<sup>68</sup> “Id Tubun en per tupani wa, in mi Isrel san Anut. In ipalug inŋsan tamolpein yil go idad injal a.

<sup>69</sup> In tamol dabai ak ta, id patud ipasi san igane ilasa ya.

Tamol en man, inŋsan urat tamol Dawid san dar lo ilasa ya.

<sup>70</sup> Wagan na mok inŋsan profet gun adi awad lo ru en ibol:

<sup>71</sup> In idsad ager banid lo ipasad injiliad a.

Ago tamol a id lo siai digane dan tuod lo dam ipasad injiliad a.

<sup>72</sup> In idsad tubud baged ilo muŋanek ikubiai pidi-nai a.

Ago dugo inŋsan kontrak gun an niŋen o ilon isou a.

<sup>73</sup> In idsad tubud baged Abraham ru promis en irupeig ibol:

<sup>74</sup> Id ager tuod lo ipasad pe

id ilo urer tiap, inŋsan urat tigane wa.

<sup>75</sup> Id saen fidian tan e lo tumado den lo,

in naon na kagin gun ak lo, ago kagin itaot ak lo dam ago tigane wa.

<sup>76</sup> O ŋai nanug, oŋ Anut lak na geig ak san profet dubol a.

Man dugo, oŋ umug pe Tubun en san dal kubune pani wa.

77 Inanen tamolpein patu pasek ka diŋane wan, oŋ maŋau en pidinai a,

Anut inaned aupasek isuas pidinai dan lo patud ipasi san dulon fufei a.

78 Idsad Anut inanen ilo muŋanek lo ago igane ya.

Inŋsan ilo muŋanek lo, in Nanun ad isuda dak igo won kumaen panu nap idsad na ipalu wa.

79 Agop inanen lilaman tamolpein a tidom tubun lo dumado dan, agod materŋ san mirau lo dumado dan dam, tinid isapudade wa.

Agop maror san dal ikubiai panad pe fo tator a.”

80 Nanuk an italbusig inanen ŋutun lo dabai inaneg imado se ya. Aria, in aben kawan ak lo imado yaug, inŋsan saen fog Isrel tamolpein malad lo kuai te ilasa ya.

## 2

### *Maria Jesus igansi a*

#### *Mat 1:18-25*

<sup>1</sup> Saen an lo Rom gabman gurman Kaisa Ogastas kubiaenŋ ta igane ya. Tamolpein a tan fidian lo Rom gabman paen na dumado dan, yaŋadi buk lo digire wo ibol. <sup>2</sup> (Yaŋa kubunek en malmalan a, saen Kwirinias in Siria san gurman imado yan lo ilasa ya.) <sup>3</sup> Agog tamolpein fidian inŋsiganed fun panu lo yaŋad dukubune wo diau a.

<sup>4</sup> An ninen o Josef dam Galili distrik lo panu ta yaŋan Nasaret ibiseig, Judea na panu ta yaŋan Betlehem dubol dan te yau a. Aben an Kin Dawid



san panu fun. Josef in Dawid malan kubulan, amaiak ninen o in ante yau a. <sup>5</sup> Josef in Maria njen dupani ak ninen o inaneg ida diau a. Saen an lo Maria in luan anda la ya. <sup>6</sup> Betlehem na mi dumado dugo, Maria nanuk igansi san saen idu ya. <sup>7</sup> Agog nanuk matu tamol ak igansig, yamel nam ibuluwig, makau ab lo makau sad anan nuaen san kunup\* lo iganeg yen a. Man dugo, lou ab lo dusumiai ak man aben fidian awan isa la ya.

*Enjel sipsip titianek tamol adi sad na ilasa ya*

<sup>8</sup> Tidom lo panu gigin te sipsip sad titianek tamol kuai te sipsip kagin dupidinai dugo, <sup>9</sup> Anut san enjel ta sad na ilasa ya. Anut san lilaman aban isapudade yan dileg direr dugo dusuruwor saian geig a. <sup>10</sup> Ak gug enjel an irupidaig ibol, “Arer amoi. Nai ru uyan ak nurupaian o nupalu ya. Tamolpein fidian mitep ilodi uyanan geig a. <sup>11</sup> Tidom nek en lo Dawid san panu lo anjam patu pasek tamol ilasa ya. In man Kristus, ananem Tubun a. <sup>12</sup> In ale san kob igo ya, au gup nanuk an yamel nam dubuluwig, makau sad anan nuaen kunup lo yen dop ale wa.”

<sup>13</sup> Ago ibol man, gamu nam Anut san yu doup enjel adi malan wei mi kuai disig, enjel malan te yan ida Anut per dupani se ya. Ago dugo igo dubol,

<sup>14</sup> “Aben lak na geig ak lo, Anut girager anda yan an mabisa da.

Ago dugo tan na, tamolpein ensauta a Anut ilon ipidinai dan, inanen maror ipidinai a.”

*Sipsip titianek Jesus dile wo diau a*

---

\* **2:7:** Daeg tubun ak

<sup>15</sup> Saen enjel fidian mi dumul go kumaen panu na diau man, sipsip sad titianek tamol an sed nug durupe, “Betlehem na taup, mel e ninen o Tubun en irupaiad en tile wa.”

<sup>16</sup> Agog ririan diaug, Josef in Maria da dil dugo, nanuk an dam makau sad anan nuaen kunup lo yen dugo dile ya. <sup>17</sup> In nanuk dile la gug, ru a nanuk an ninen o enjel irupidai an dijaneg panu susumeik an lo tamolpein durupidai se ya. <sup>18</sup> Ago dugo fidian a ru an dulon man, durut saian go ilod weiwei se ya. <sup>19</sup> Gug Maria ru an fidian ilon lo igane ya, ago gug saen wei mi mel an fidian ilon isoug kankan igane se ya. <sup>20</sup> Agog sipsip titianek tamol an dumul go sipsip sad na diau se yan, Anut yan an diabisa dugo per dupani a. Man dugo, nek enjel irupidai ak ago, mel a fidian ilasa yan, agod ru a fidian dulon an dam, itaot ilasa dugo dile ya.

### *Jesus yan an digane ya*

<sup>21</sup> Nanuk ilasag nal 8 yau dugo, nanuk tinin sunulon dututeg, yan an Jesus dubol. Maria gamugo luan anda dugo yan an enjel ipalug Maria irupe ak fom dupate ya.

### *Simion in Ana da Jesus tempel lo dile ya*

<sup>22</sup> Moses san kubiaen ago ibol, pein enti nanuk igansip nal 40 yau dop in fon ikok ilasa da wa. Aria, Maria malan iganeg nal 40 yau itout go, Josef Maria da Jesus dijaneg Jerusalem na diau a. Ante in Jesus dijanep Tubun en dupani wo diau a. <sup>23</sup> Man dugo, Tubun en san kubiaen lo ru igo digire ya, “Nanuk matu ak fidian man inaned tinad tamad dijal diaup Tubun en dupani wa, an lo dop saen fidian Tubun en wagen lo gun

dutor a.” <sup>24</sup> Kubiaen an ibol, “muluk uraru, tia tap, anakanak nanun uraru muluk on ak Anut yai gane pani wa.” Aria, Josef in Maria da kubiaen an dirig yai niganag naok an digane ya.

<sup>25</sup> Aria, tamol ta Jerusalem na imado yan yan Simion. In tamol itaot, agod Anut awan paen na imado ya. Anut Isrel tamolpein ibinawai san saen ilasa wo, malan iganeg imado se ya. In lo dam Urgun imado ya. <sup>26</sup> Gubak mi Awan Urgun irupeig ilon ak, in gamugo imat dop Anut anen Kristus ile wa. <sup>27</sup> Aria, gamu Awan Urgun iduduwig an lo tempel san ar lo iladu ya. Saen an lo Josef, Maria da Jesus diabig ru kagin a kubiaen irupidai an duri dupani wo dupalu ya. <sup>28</sup> Agog Simion Jesus ileg sinjiren na yang ilatig Anut per ipanig igo ibol,

<sup>29</sup> “Tubun en, onane promis ru gubak mi ubol paiag an gamu nunon gane ya.

Ago yak ninen o rupaiaig pe nai onane urat tamol tan en nibiseip, maror lo mi nau a.

<sup>30</sup> Man dugo, naiseg malag nam onane patun pasek tamol nile ya.

<sup>31</sup> Tamolpein fidian malad lo on tamol en gane ilasa ya.

<sup>32</sup> In sul on ilasap imado dop gob adi ru in ninen o dulon pe ilod ilalan a, agod in lo onane Isrel tamolpein yanak tubun ak dinane wa.”

<sup>33</sup> Nanuk an tinan taman ru e Simion ibol en dulon go durut saian a. <sup>34</sup> Agog Simion bar ipid-inaig Maria irupeig ibol, “Anut gubak mi ilon igo yen a, nanuk en Isrel tamolpein luluad lo, wei mi dudu diau dop, aenta wei mi dam ibiaisa wa. Agod tamolpein wei mi nanuk an dile saian dop

in̄ niñen o ru saian ak amad da wa. <sup>35</sup> In̄ tamolpein sad kankan imianuk an kuai te iganep fidian dile wa. Agod sabiri ta luon ak oñane n̄utu isue wa.”

<sup>36</sup> Aria, profet pein ta, yañan Ana, in̄ dam tempel lo imado ya. In̄ Fanuel nanun pein, Asa san gugoi lo ilasa ya. In̄ mel saiak geig a. Anañar 7 tamol ida dumado yau gug tamol imat a. <sup>37</sup> Agog pein suos imado yang san anañar 84. In̄ tempel san tumanek aben ta ibisei na da. Tidom ad Anut yañan yabisa dugo igudani da. Saen aenta anañ geg iganep gudanek mi igane da. <sup>38</sup> Aria, Simion pein tamol an ru irupidai dugo, saen nek an lo Ana ipalug, in̄ dam Anut yañan yabisag, nanuk an niñen o Jerusalem tamolpein ensauta a Anut ibinawai o malad diganeg dumado se yan irupidai a.

### *Josef Maria da Nasaret na dumul diau a*

<sup>39</sup> Jesus tinan taman mel fidian Anut san kubahen̄ ibol ago mi digane itout go fon dumul, Galili provins lo in̄siganed panu Nasaret na diau a. <sup>40</sup> Agog nanuk itabusig tubun go, tinin dam dabai dugo kankan milaen ak in̄ lo awan isa geig a. Ago dugo Anut ilon tubun mi ipani na ya.

### *Jesus in̄ pinein foun tempel lo yau a*

<sup>41</sup> Jesus tinan taman in̄ anañar fidian, saen Pasova san ad nanek ilasa dan lo, Jerusalem na tumanek tubun an lo diau na ya. <sup>42</sup> Aria, Jesus san anañar 12 dugo diñaneg Jerusalem na diaug in̄aned kagin yen ago mi duri a. <sup>43</sup> Murnag Pasova ad nanek itout go fon dumul in̄siganed na diau se ya. Jesus in̄ Jerusalem na imado yan, in̄anen tinan taman ta dulon̄ na ya. <sup>44</sup> In̄ ilod lo Jesus

tamolpein aenta luluᅇad lo dadi diau dak dubol. An niᅇen o adian kisaek dutor se ya. Agog gurai idu yan, turad muroud luluᅇad lo Jesus abanᅇan diabi a. <sup>45</sup> Gug kitek dile man tia tag Jerusalem na abanᅇ diabi wo dumul a. <sup>46</sup> Nal utol abanᅇan diabi ak gug, iᅇ ta dile na ya. Ago gug tempel lo diladug dile ya. Iᅇ Juda sad girek maᅇau luluᅇad lo imasig, ru a dubol na yan iloᅇ dugo, isumianai se ya. <sup>47</sup> Ago dugo fidian iᅇsan niᅇenᅇ, maᅇau, agod ru naon a irupidai an duloᅇ go, durut saian geig a. <sup>48</sup> Tinan taman abanᅇ ago dile man dam durut saian go tinan irupeig ibol, “Bai, oᅇ ata wo maᅇ igo giniama yak i? Nai oᅇ tama da iloma muruan kasik dugo, oᅇ abanᅇa mabi se ya.”

<sup>49</sup> Ago tag Jesus ibol go isumianai, “Anᅇ ata wo niᅇ abanᅇag abi se yak i? Nai tamag san ab lo ᅇumado dak, an anᅇ ta aloᅇ na yak i?” <sup>50</sup> Ak man ru e irupidai den fun mok ta duloᅇ na ya.

<sup>51</sup> Agog Jesus tinan taman dida dumul Nasaret na diaug, pempem awad paen na mi imado se ya. Ak man tinan melmel fidian a ilasa na yan, ilon lo iganeg yen go kankan igane se ya. <sup>52</sup> Agog Jesus iᅇanen tinin, agod iᅇanen kankan iloᅇ san dam italbusig tubun a. Anut, agod tamolpein dam iᅇ dipitiani na ya.

### 3

*Jon Suguek san iᅇ dal ikubune ya  
Mat 3:1-12; Mak 1:1-8; Jon 1:19-28*

<sup>1</sup> Taibirias Kaisa ananᅇar 15 Rom gabman kagin ipani dugo, Pontias Pailat Judea kagin ipani se ya. Ago dugo Herod Galili san tamol tubun geig, iᅇ

tein Filip dam nek ago mi Iturea in Trakonaitis ida kagin ipidinai dugo, Laisenias provins Abilene kagin ipani se ya. <sup>2</sup> Ago dugo Anas, Kaiafas da man pris gurman malan te ya. Saen an lo Anut anen ru Sakaraia nanun Jon, aben kawan tamol tia yak lo imado dugo san na yaug ilasa ya. <sup>3</sup> Agog Jon you Jordan giranen na aben fidian san tamolpein Anut san ru irupidai dugo itor se ya. Insan ru malan te man igo ibol, “Tamolpein ananem aupasek patum apanip, ilom abileksap, apalup suguek anane wa. Ago tap Anut ananem aupasek isuas panan a. Suguek man ananem ilom abilisa yan san kob.” <sup>4</sup> Nek imug profet Aisaia san buk lo girek ibol ago mi gamu ilasa ya. Girek ago ibol,

“Tan kawan ak ate wagin ta ilasag ibol,  
 ‘Tubun en inanen dal akubunep itaot yen a.

<sup>5</sup> Tan ilokan an fidian atutumip awan isa wa.

Did tutubun an, agod bubun fidian agilep tan na idu wa.

Dal ikael ak aganep itaot a.

Dal gubog ak atutumip uyan da wa.

<sup>6</sup> Ago dop tamolpein fidian in patu pasek tamol a Anut idinip ipalu wan dile wa.’ ”

<sup>7</sup> Agog tamolpein wei kasik Jon san na suguek dinane wo dupalu dugo Jon naod ifuteg ipidai, “An mot nanun moroun! Enti Anut san tiniae saian mitep ilasa wan ninen o ru kagin ipanan dugo asol dak i? <sup>8</sup> An ilom ibilisa dak iri panim, kagin an san nunon mok agane ilasa wa. An sinanem ilom lo igo ta abol na wa, ‘Abraham man man tamama ya, an man o idaisuda ya.’ Man dugo, nai en nurupaian itaot da, Anut ilon ibol tap man, pat e dien den ka injal pe ibilisap Abraham nanun muroun mok on

dilasa wa. <sup>9</sup> Pilagis ai dabin lo yen la ya. Ai fidian a nuṇod uyan uyan ta ifu na dan, Anut itarep yabi yaup inanai yau a.”

<sup>10</sup> Tamolpein ru an duloṇ tag dusumiani, “Maṇ dugo migane wak i?”

<sup>11</sup> Agog ru naon irupidaig ibol, “Ta iṇ kulos uraru tap, neinta kulos aman tia yan ipani wa. Nek ago mi, ta iṇ anaṇ anda tap, iṇ dam ago mi igane wa.”

<sup>12</sup> Agog takis ṇilaṇal tamol dam suguek diṇane wo dupalug Jon dusumiani, “Girek maṇau, maṇ dam dugo migane wak i?”

<sup>13</sup> Agog Jon irupidaig ibol, “Aṇ tamolpein arawai dop sad moni subuṇan kawan ak da ta aṇane na wa. Gabman sen ibol ago mi itaot aṇane wa.”

<sup>14</sup> Ago dugo yu tamol aenta dam dusumiani, “Maṇ dam, en dugo migane wak i?”

Agog ru naon irupidaig ibol, “Aṇ tamolpein afu dan lo banid na moni ta aṇane na wa. Aṇ ru sewak lo dam iṇsad moni ta aṇane na wa. Aṇanem urat naon dupanaṇ dan mi aṇ o idaisuda wak niṇen ilom maror anda amado wa.”

<sup>15</sup> Tamolpein fidian mala nouk lo Kristus diti-tiani se ya, an niṇen o bubeḍ ilon lo Jon iṇ Kristus mok ago dubol dugo ilod weiwei se ya. <sup>16</sup> Ago tag Jon irupidai, “Ṇai you lo mi aṇ ṇusuguaṇ da. Ak man tamol a ṇai patug fo ipalu dan iṇsan dabai ṇaisag dabai iriṇani geig a. Ṇai man tamol kawan a, amaiak niṇen o iṇsan sendal san kam ṇupasi san o yaṇag tia ya. Gug tamol en man Awan Urgun lo isuguaṇ a, agod Urgun an san yai nam ifulanaṇ a. <sup>17</sup> Iṇ banin lo kon gilek lo idirai san biouṇ yabig imado da. Aben ante urat a igane wan ikubineg

ante itur da. Uyan ak senamo idirai dop, metmet adi yabi yau o da. Ago dop kon anañ ab lo itumani wa. Ak man metmet adi man yai lo yabi yau a. Agod tamol ta yai an igane imat san tia ya.”

<sup>18</sup> Dal wei kasik lo Jon tamolpein bubed yabisa san ru ibol dop lo Anut anen ru uyan ak ipidinai a. <sup>19</sup> Gug Jon gabman gurman Herod san naok naok saian an ifulale yaug, tein san pein inane an lo isuda tag, Herod tijaen saian go Jon subanek lo igane ya. <sup>20</sup> Ago igane an lo inşiganen muruan a imug igane se yan muruan taidam ibate ya.

### *Jon Jesus isugui a*

*Mat 3:13-17; Mak 1:9-11*

<sup>21</sup> Aria, Jon subanek lo gamugo digane dugo mel en ilasa ya. Nal ta tamolpein fidian suguek diñane dugo Jesus dam ipalug suguek inane ya. Suguek inane itout go Anut igudani se ya. Saen nek an lo kumaen panu san dalawan ipasig yen dugo, <sup>22</sup> Anut san Ur muluk oñ idug, in kabuñan fufo imasi a. Agog kumaen panu lo wagin ta idug, igo ibol “Oñ ñaineg Nanug, ñaineg bubeg mok, oñ niñe wo ñai ilog tubun mi uyanan da.”

### *Jesus anen tubun bagen*

*Mat 1:1-17*

<sup>23</sup> Jesus san anañar 30 dugo, urat fun igane ya. Tamolpein ilod lo in Josef nanun ago dubol se ya. Aria, yanak e irig ipalu den in Josef san tubun bagen a. <sup>24-38</sup> Eli, Matat, Livai, Melki, Janai, Josef, Matatias, Amos, Nahum, Esli, Nagai, Maat, Matatias, Semein, Josek, Joda, Joanan, Resa, Serababel, Sialtiel, Neri, Melki, Adi, Kosam, Elmadam, Er, Josua, Eliesa, Jorim, Matat, Livai, Simion,



Juda, Josef, Jonam, Eliakim, Melea, Mena, Matata, Natan, Dawid, Jese, Obed, Boas, Sala, Nason, Aminadab, Admin, Arni, Ebron, Peres, Juda, Jakob, Aisak, Abraham, Tera, Nahor, Serug, Reu, Peleg, Eber, Sela, Kainan, Arfaksad, Sem, Noa, Lamek, Metusela, Enok, Jared, Mahalelel, Kainan, Enos, Set. Set man Adam nanun, agod Adam in Anut nanun.

## 4

### *Satan Jesus ikubiani a*

*Mat 4:4-11; Mak 1:12-13*

<sup>1</sup> Jesus Urgan buben in anefuteg, you Jordan ibisei a. Agog Urgan iduduwig, tan kawan ak ate yau a. <sup>2</sup> Nal 40 anan tia imado dugo Satan Jesus naon ikubiani se ya. Saen an lo in anan ta yani na ya, an ninen o saen an itout man imatigen saian.

<sup>3</sup> Satan igo irupeig ibol, "On Anut Nanun tap, ubol dop pat en bret on ibilisa wa."

<sup>4</sup> Jesus ru naon irupeig, "Girek e buk lo yen den igo ibol, tamol bret lo mi ta kumaen imado na da."

<sup>5</sup> Agog afon Satan Jesus in aneg did lak na yak kabunan fufo igunig itur dugo tan en san aban fidian ikubiai pani kisaek on a. <sup>6</sup> Agog irupeig ibol, "Inaned dabai a ule dan, agod mel a girager anda yak fidian ule dan dam naisag. Ak ninen o tamol enti nupani wo ilog ibol tap, ka nupani wa. <sup>7</sup> An ninen o on turu soluwip, ubou ag ule tap, nai dabai nupanop, mel fidian ule dan on kagin pani wa."

<sup>8</sup> Ak man Jesus ru naon irupeig ibol, "Girek ta buk lo igo ibol, 'On Tubun en onane Anut mi ubou an ule wa. Insen mi ninen o bigabeg urat gane wa.'"

<sup>9</sup> Agog fon Satan injaneg Jerusalem na diaug, lak na tempel san njudun fufo igunig itur go irupeï, “On Anut nanun tap, sokalik pe, tan na udu. <sup>10</sup> Man dugo, girek ta buk lo igo ibol,

‘In inanen enel irupidai dop kagin dupano wa.

<sup>11</sup> Banid nam disawo wa, kabelan pat on nje ifini banau.’ ”

<sup>12</sup> Ago tag Jesus ibol, “Girek ta buk lo dam igo ibol, on mel ta gane tap lo Tubun en onane Anut an bitinaek lo ta gane na wa.”

<sup>13</sup> Satan Jesus kubianek funfun lo igane tia tag ibiseig yau. Nal ta dop fon ile wa.

*Nasaret na Jesus dile saian a*

*Mat 4:12-17; 13:53-58; Mak 1:14-15; 6:1-6*

<sup>14</sup> Agog Jesus Urgun san dabai lo fon imul go Galili na yau. Agog yan panu panu fidian lo yau se ya. <sup>15</sup> In panu panu sad ubou ab lo ipitenjanai dugo tamolpein fidian yan diabisa se ya.

<sup>16-17</sup> Agog Jesus Nasaret na yau a. Wagam nanuk lo aben ante italbusi a. Insignanen kagin iri panig, Juda sad ubou leil nal Sabat dubol dan lo yang Nasaret adi sad ubou ab lo iladu ya. Agog Anut san ru isuti wo imasa yan, profet Aisaia san buk dupani a. Buk roun ifulaleg, ru en ileg isuti:

<sup>18</sup> “Tubun en san Ur nai lo imado da.

Man dugo, nai tamolpein kawan filiad tia yan, ru uyanan ak nurupidaip dulong o ipilianag a.

In nai idinag go nupalu man, tamolpein ru igo nurupidai a:

a Satan isubanai an nai ka nupasaip kuai te dilasa wa,

a malad itapul idu yan fon aban ka dile wa,

a tamolpein sen ak banid lo muruan dile dan, ηai injsad muruan ηigane itout a.

<sup>19</sup> Agod ηai malak malak igo ηurupidaip dulonη ak, anaηar nek en Tubun ak injanen ilo panek ikubiai pidinai o da.”

<sup>20</sup> Agog Jesus buk ifutanig, biabi ηilanaη tamol ipani gug imasi a. Tamolpein fidian ubou ab lo dumado dan malad ti ibol go Jesus dile se ya.

<sup>21</sup> Agog fun iganeg irupidai, “Ru nek e kududom ilonη en gamu geig nuηon ilasa ya.”

<sup>22</sup> Agog inη fidian dupitiani se ya, injsan ru dulonη go inη nηeη lo tamol ikawil an ak ago dubol go, durut saian dugo nug dusumiani se ya, “Dugo, an Josef nanun i?”

<sup>23</sup> Agog Jesus irupidai, “ηai mel en ninen o ilo uraru amag tia ya, aη ru faηan en ηai arupaiaη o da, ‘Dokta, onse ikubinio gup! Kulob girager funfun a onη Kaperniam na gane yan san ru malonη a, gamu kulob naon kisaek onsigane fun panu lo dam gane wa.’ ”

<sup>24</sup> Agog fon ru igo irupidai, “ηai rumok ηurupaianη da, profet man injsiganen fun panu lo tamolpein inη dumoi da. <sup>25</sup> Mel en rumok a, profet Elaija san nal lo Isrel pein wei mi suos dumado ya. Saen an lo man daded tubun a. Anaηar utol kalam 6 ui tia ya. Ago dugo kadag tubun aben fidian yabig yen se ya.

<sup>26</sup> Ak man Anut Elaija idinig Isrel pein suos ta san na yau man tia ya. Tia, inη idinig gob adi sad taun Saidon lubanek lo, panu Sarefat san pein suos ta san na yau a. <sup>27</sup> Agod profet Elaija san saen lo dam Isrel tamolpein wei kasik lepra amad da ya. Gug kisaek ta igane uyan man tia ya. Tia, gob adi a tan

Siria lo dumado dan luluᅇad lo tamol kisaek yaᅇan Neman, Elaija nek an mi ikubuneg uyan a.”

<sup>28</sup> Tamolpein fidian ubou ab an lo ru en duloᅇ go tiᅇaed tubun mi saian a. <sup>29</sup> Ago tag dumasag, Jesus diᅇaneg, aen damon fo dibilip idu wo tan bubun fo disuda diau a. <sup>30</sup> Gug banid lo ikisaluk ilasag, tumanek malan an titiᅇae mi imul go ilon ibol ak lo yau a.

*Jesus tamol ta tinin lo ur saian ikudi a*

*Mak 1:21-28*

<sup>31</sup> Jesus Galili Provins lo panu Kaperniam na yau a. Atna Sabat nal lo yaug tamolpein iᅇsad ubou ab lo maᅇau ipiteᅇanai se ya. <sup>32</sup> Iᅇnanen ru duloᅇ man, tamol tubun yaᅇan anda yak oᅇ ipiteᅇanai se yan niᅇen o durut saian a.

<sup>33</sup> Aria, ubou ab an lo tamol ta ur saian anda yak awan tubun mi iwagiᅇ go ibol, <sup>34</sup> “Oᅇ Jesus Nasaret tamol, maᅇ dugo giniama wo palu yak i? Nag oᅇ maᅇ daoᅇ panama wo palu boi a? Nai oᅇ ᅇaloᅇ a. Oᅇ Anut san tamol gun a!”

<sup>35</sup> Ak man Jesus ur saian an ipeig ibol, “Awa itaup, tamol an biseip lasa.” Agog ur saian tamol an tamolpein malad lo ibili idug, tamol an ibiseig ilasa ya. Gug ur saian tamol an tinin malan ta isue na ya.

<sup>36</sup> Agog tamolpein fidian durut saian go, iᅇsed diᅇiᅇeᅇ dugo dubol, “Enso ru ta dabai anda ibol dugo ur saian awan duloᅇ dugo dilasa diau di?” <sup>37</sup> An lo Jesus san yaᅇan ifurak go panu panu yau.

*Jesus Pita raon ikubune ya*

*Mat 8:14-17; Mak 1:29-34*

<sup>38</sup> Jesus ubou ab an ibiseig, Saimon san ab lo yau a. Saimon raon subam ifinig, tinin wananan tubun kasik ak niñen o, Jesus ibinawi wo dusumi-ani a. <sup>39</sup> Ago tag giranjen na yaug, iyep go ru dabai nam subam an ikudi a. Gamu nam subam an ibiseig, pein an imasa kisaek oñ go anañ ikubune pidinai a.

<sup>40</sup> Gurai idu yan, tamolpein inşad panu lo subam amad da yak diñal go, Jesus san na dupalu se ya. Agog in banin tinid fo iganeg, fidian uyadi isusa ya. <sup>41</sup> Ur saian saian dam tamolpein wei kasik dibisawai dugo duwagin, “Oñ Anut Nanun.” Ago tag Jesus nao futek ru nam ipidai dugo awad lo diñinjen san ipadau a, man dugo, in Kristus duloñ a.

*Jesus panu panu lo ru ibol se ya*

*Mak 1:35-39*

<sup>42</sup> Tidom lom mok Jesus panu an ibiseig, aben ta yoitout ak lo yau a. Ak man tamolpein Jesus niñen o abañ dile se ya. Saen in dile man, kabelan ibisawaip yau banau dupurani wo digane se ya. <sup>43</sup> Ak man in irupidai, “Ñai ru uyanan e Anut san kagin panek niñen o yan, panu aenta lo dam nfulale wa. Urat nek an niñen Anut idinag go nupalu ya.” <sup>44</sup> Agog Judea ilon lo panu panu yaug inaned ubou ab lo Anut ru ifulale na ya.

## 5

*Jesus megeloum injal o fun iganeg igiai a*

*Mat 4:18-22; Mak 1:16-20*

<sup>1</sup> Nal ta Jesus Genesaret san you saltek aen te itur dugo tamolpein wei kasik Anut san ru duloñ o dususag, nug tinin fo dutur se ya. <sup>2</sup> Agog in malan

yau nag, wog urarum loŋ ate dien dugo yil a. Wog muroudi man loŋ na dob dufulanai se ya. <sup>3</sup> Agog Jesus idug, wog ta lo isuda ya. An Saimon san wog. Agog Jesus Saimon irupei, “Wog kitek usoup tilasa.” Jesus wog fo imasig imado dugo tamolpein Anut san ru ipitejanai se ya.

<sup>4</sup> Ipitejanaig itout man Saimon irupei, “Wog ŋanep lasa waup, bet ak lo gup tura murou dadi dob arae.”

<sup>5</sup> Ago tag Saimon ru naon irupei, “Tubun en, tidom milaen maŋ urat wagai mok migane se ya, ak gug iy ta kisaek miŋane man tia ya. Ak man gamu oŋ ubol ak niŋen o awa mabip dob ka mirae wa.”

<sup>6-7</sup> Agog dob diraeg, iy wei kasik mok dob lo dusuda ya. Agog dob itout o igane tag, turad muroud wog neinta lo yan dibinawai o banid nam toutou diganeg dupalu ya. Agog wog urarum iy didiri awad isag disarir o duton. <sup>8</sup> Saimon Pita aban ago ile tag Jesus naon na turun isaluwig ibol, “O Tubun en, ŋai tamol saiag. Oŋ ŋai bisawag pe wau.” <sup>9</sup> Iy wei mok diŋane an Pita turan dida dileg, durut saian ak niŋen o Pita ru an ibol a. <sup>10</sup> Saimon turan muroun, Sebedi nanun urarum, Jems in Jon da dam durut saian a.

Agog Jesus Saimon irupei, “Urer umoi. Oŋ gamu agod nal murnai san fidian oŋ tamolpein dideg diau dan ago mok unjal a.” <sup>11</sup> Agog wog urarum durau isudag melmel fidian diabi idug yen dugo Jesus ŋien aban duri diau na ya.

*Jesus tamol lepra aman da yak ikubune ya  
Mat 8:2-4; Mak 1:40-45*

<sup>12</sup> Jesus panu tubun ak ta lo imado dugo, tamol ta tinin lepra yafutani an ipalu ya. In Jesus ileg njen fo turun isaluwi idug, imosiaig ibol, “O Tubun en, on ilo ibol tap, nai binawag pe fon tinig uyan ilasa da wa.”

<sup>13</sup> Jesus ru an ilon go banin iwateg isupuri dugo irupe, “Ubol agom nai ilog ago yen da, on uya lasa.” Agog tamol an tinin uyan ilasa kisaek on a. <sup>14</sup> Ago dugo Jesus ru dabai nam irupeig ibol, “Kulob ilasa yen njen o aenta ta rupidai na wa. Tia, itaot waup, tini Juda sad pris mi kubiaip ile dop, mudan a Moses san kubiaen lo ibol dan nanep Anut yai gane pani. An lo dop tamolpein dulon ak onane subam itout a.”

<sup>15</sup> Jesus kulob igane yan san ru panu panu yaug, tamol wei kasik insan ru dulon o dususa se ya. Subam amad da yak ikubuniai o dam dupalu se ya. <sup>16</sup> Ak man Jesus saen wei mi ibisawaig, aben yoitout ak ate yaug igudani se ya.

*Jesus tamol ta njen banin tubabun ak ikubune ya  
Mat 9:1-8; Mak 2:1-12*

<sup>17</sup> Jesus nal ta tamolpein ipitenanai dugo, Farisi in kubiaen san girek manau Judea provins lo, Galili Provins lo panu kititik an fidian, agod Jerusalem na yan dam dida dumado ya. Anut san dabai Jesus san kubunek urat igane yan lo yen a. <sup>18</sup> Agog tamol ta njen banin fidian tubabun ak kapal anda Jesus san na disinig dupalu ya. Ab lo diladu wo digane ak man tamolpein wei kasik, an lo man diladu san ta isuda na ya. <sup>19</sup> Ago tag ab aten lak na yak fo disida ya. Agog ab aten an diabigigeg

dugo kapal an duyuweg, Jesus tamolpein lulunad lo imado dugo naon na idu ya.

<sup>20</sup> Jesus inşad ilo rumok ile tag tamol an irupei, “O turag, n̄ai oņane aupasek fidian n̄upasi yau la ya.”

<sup>21</sup> Ago tag kubiaen san girek man̄au, in̄ Farisi dadi kankan diņaneg ilod lo mi igo dusumiaen, “Tamol en so tamol ta yak i? Ru a ibol dan man Anut kukokan igane da. Tamol ta muruan pasek san dabai anda man tia ya, Anut mi in̄ dabai anda ya.”

<sup>22</sup> Gug Jesus inşad ilo girek fidian ilon̄ pasi ak niņen o ru naon igo ibol irupidai, “An̄ ata wo kankan ago agane dak i? <sup>23</sup> Ata mel pasauman ak i? Aria, n̄ai igo n̄abol, ‘Oņane aupasek n̄upasi yau wo?’ Tia, ‘Masap kapal wabisap utor o?’ <sup>24</sup> Gug kulob e n̄igane en lo n̄ai, Tamol Nanun, tan en lo Anut wagen lo aupasek ka n̄upasi yau amaiak alon̄ o ...” saen ago ibol man, tamol a n̄ien banin itubabun an irupei, “Oņ masa utur pe oņane kapal n̄anep oņsigane na wau.” <sup>25</sup> Agog tamol an naod na imasa itur go, inşan kapal isinig, Anut yaņan yabisa dugo, siganen ab lo yau a. <sup>26</sup> Tamolpein fidian durut saian geig go Anut yaņan diabisa ya. Ilod irut dugo tinid in̄anefuteg igo dubol, “Gamu man̄ kulob senamo geig mok mile ya.”

### *Jesus Livai iwagi a*

#### *Mat 9:9-13; Mak 2:13-17*

<sup>27</sup> Ago gug Jesus ab an ibiseig yaug, takis niļan̄al tamol, yaņan Livai, urat ab lo imado dugo ile ya. Agog Jesus irupei, “N̄ieg aban uri.” <sup>28</sup> Ago tag Livai



mel fidian yabidug dien dugo, Jesus njen aban iri a.

<sup>29</sup> Livai Jesus njen o soubul tubun ak inſan ab lo igane ya. Doup luluſad lo takis nilaſal tamol wei kasik agod tamol aenta dam dususag, dida anaſ diani se ya. <sup>30</sup> An njen o Farisi, in Farisi sad kubiaeſ san girek maſau dida Jesus san megeloum naod na duſurſur go dusumianai, “En ata wo aſsam girek maſau takis nilaſal, agod aupasek tamolpein dida sisem anaſ diani dak i?”

<sup>31</sup> Ago tag Jesus ru naon irupidaig ibol, “Tamolpein a uyadi ak dokta san na ta diau na wa, tia, tamolpein subam anda yak mi diau a. <sup>32</sup> Man dugo, ſai tamolpein a itaot adi dubol dak ſigiaip dupalu san njen o ta ſupalu na ya, tia, aupasek tamol adi mi ſigiaia o ſupalu ya.”

*Kagin imug ak, foun ak da*

*Mat 9:14-17; Mak 2:18-22*

<sup>33</sup> Tamolpein aenta Jesus igo dubol durupeia, “Jon san urat pinein nal kadi anaſ geg diganep, gudanek mi digane da. Farisi sad megeloum dam ago digane da. Gug oſsa megeloum man diani duluk oſ da.”

<sup>34</sup> Ago tag Jesus ru faſan en irupidai, “Ak dugo, tamol ta pein inane dop, turan muroun aenta dupalup, dida dumado dop anaſ o waliſ igane wak i? Tia geig a. In youd isap, dida ilo uyan lo mi dumado wa. <sup>35</sup> Gug murnap saen idu gup, tamol an dupasi wa. Nal an lo, in anaſ waliſ digane wa.”

<sup>36</sup> Agog Jesus ru faſan taidam irupidaig ibol, “Tamol ta in yamel kilaken foun ak ta irasirep ate kulos wagam ak san mutunuk ta iwei na da.

Tamol ago igane tap, in yamel kilaken foun an daon ipani wa. Taida mi, yamel kilaken foun an in kulos wagam an ida naod kisaek tia ya. <sup>37</sup> Agod tamol ta in wain foun ak in anep, bilelek sunulon wagam ak lo ta iwali na da. In ago igane tap, wain foun an bilelek sunulon wagam an ikafut yaup ipuk pe, ikulmaek, tan na idup, bilelek sunulon dam daon ipani wa. <sup>38</sup> Wain foun ak tap, bilelek sunulon foun ak lo iwali wa. <sup>39</sup> Agod tamol wain wagam ak iluk dan wain foun ak imoi da. Ago dop ibol a, 'Wagam en mi uyan a.' "

## 6

*Jesus man ubou nal yan an Sabat dubol dan san muroun*

*Mat 12:1-8; Mak 2:23-28*

<sup>1</sup> Ubou nal ta lo Jesus kon san abi ilon lo itor se ya. Ago dugo in san megeloum dimatigen, an ninen o in kon nunon aenta dufunig banid nam dufufari yau dugo nunon diani se ya. <sup>2</sup> Ak man Farisi aenta dubol, "Enta wo an urat a Sabat nal lo tigane san ninen o idsad kubiaen ipadau amaiak agane dak i?"

<sup>3</sup> Ago man Jesus ru naon irupidaig igo ibol, "Nag mel e Dawid igane yen ta asuti na ak i? In in anen turan muroun dida kadag san saen lo anan o dumat go, <sup>4</sup> Dawid Anut san ab lo iladug, bret a Anut naon na didirig dien an isinig, in anen yu tamol adi dida diani a. Bret an tamolpein fidian lo geg a, nek Anut san pris mi diani wa." <sup>5</sup> Agog irupidai, "Tamol Nanun man in sen Sabat nal an muroun."

*Jesus Sabat nal lo tamol banin saian ak ikubune ya*

*Mat 12:9-14; Mak 3:1-6*

<sup>6</sup> Juda sad nal gun Sabat nal taidam lo Jesus ubou ab ta lo iladug, tamolpein Anut san ru ipitenanai se ya. Tamol ta banin saian ak dam saen an lo imado ya. Banin won ak ikurnjak a. <sup>7</sup> Kubiaen san girek manau in Farisi dida malad ti ibol dugo, Jesus leil dupani se ya. Jesus Sabat nal lo tamol ta ikubune dop dile wo malad digane da, man dugo, dal aban dilep lo Jesus ru dupani wo ilod ibol se ya. <sup>8</sup> Gug Jesus insad ilodi an ilon tag, tamol banin saian an irupe, “On masap, titinae mi utur.” Ago tag imasag yang titinae mi malad lo itur se ya. <sup>9</sup> Agog Jesus girek manau in Farisi dida isumianai, “Idsad kubiaen dugo ibol i? Id ubou nal lo kagin uyan ak tigane wo? Tia, kagin saian ak tigane wak i? Tamol ta tibinawi wo? Tia, ta daon tupani wak i?” <sup>10</sup> Agog Jesus tamol an fidian yil ilubanai ak gug ru naon tia tag, tamol an irupe, “Bani wate.” Tamol an ago iganeg, banin gamu nam uyan ilasa ya.

<sup>11</sup> Ak man in tinjaed tubun mi saian go, enso muruan ta Jesus dupani san ninen nug lo dinjen se ya.

*Jesus aposel 12 ipilianai a*

*Mat 10:1-4; Mak 3:13-19*

<sup>12</sup> Murnag nal ta lo Jesus igudani wo did fo yau a. Tidom milaen igudani dugo yang salso idu. <sup>13</sup> Tidom lom inanen megeloum igiaig dupalu ya, agog 12 ipilianaig yanad aposel\* ibol a. <sup>14</sup> In yanadi

---

\* **6:13:** Yanak an fun: Anut awan nanep wau.

igo iri a: Saimon yaŋan neinta Pita ibol, iŋ tein Andru, Jems iŋ Jon da, Filip iŋ Batolomiu da, <sup>15</sup> Matyu iŋ Tomas da, Jems, Alfias nanun, Saimon, yaŋan neinta “Rom sad ager tamol” dubol da, <sup>16</sup> Judas, Jems nanun, agod Judas Iskeriot. Mitep tamol an Jesus ager banid lo igane wa.

*Jesus iŋ tamolpein wei mi ikubuniaig uyadi a  
Mat 4:23-25; Mak 3:7-12*

<sup>17</sup> Murnag Jesus iŋsan megeloum dida dudug, tan aten fo dutur se ya. Tamolpein wei mi dususag Jesus fun na dutur dulubani a. Agog tamolpein malan tubun, Judea provins lo, Jerusalem na, gob sad taun uraru Taia iŋ Saidon da sad loŋ na yan dam dususag dutumani a. <sup>18</sup> Jesus san ru duloŋ dop, subam ad da yak dam ikubunia i o dupalu ya. Tamolpein ur saian ad da yan ikubunia se ya. <sup>19</sup> Dabai iŋsan na ipalug tamolpein ikubuniaig uyadi an lo, tamolpein wei kasik tinin dusupurip uyad dilasa wo siŋiren na dupalu se ya.

*Bar iŋ muruan da  
Mat 5:1-12*

<sup>20</sup> Jesus iŋanen megeloum lo leil igane dugo ibol, “Aŋ a mel amam tiag amado dan, bar aŋaneg amado da.

Man dugo, Anut san kagin panek man aŋanem mok a.

<sup>21</sup> Aŋ a gamu amatigen dan, bar aŋaneg amado da. Man dugo, murnap aŋ luam ipuk a.

Aŋ a gamu tinaŋ abi dan, bar aŋaneg amado da.

Man dugo, murnap aŋ asel a.

<sup>22</sup> Saen Tamol Nanun niŋen o diliaŋ saian dop,

dukudaŋ dop, kukok am digane dop, aŋanem  
 yaŋam saian ago dubol dan niŋen o diabi-  
 anaŋ dan,  
 aŋ bar aŋaneg amado da.”

<sup>23</sup> “Saen an lo yousai lo asokalik dop ilo uyan  
 am da amado, man dugo, aŋanem naon a Anut  
 ikubune lag kumaen panu na yen dan man tubun  
 geig a. Nek muruan naon kisaek mi iŋaned tubud  
 baged profet adi a imug dumado yan dupidinai se  
 ya.”

<sup>24</sup> “Gug aŋ filiam am da yan kagin agane wa.  
 Man dugo, tan en lo mi madok uyan ak aŋane  
 ya, murnai san tia ya.

<sup>25</sup> Aŋ gamu luam ipuk dan kagin agane wa.  
 Man dugo, aŋ murnap amatigen geig a.  
 Aŋ gamu asel dan kagin agane wa.

Man dugo, murnap aŋ ilom ipapao dop tinan  
 aru agane wa.

<sup>26</sup> Aŋ a tamolpein yaŋam diabisa dan kagin agane  
 wa.  
 Man dugo, iŋ tubud baged wagam profet se-  
 wak adi niŋedi wo ago mok digane na ya.”

*Ager ilod tupidinai san kagin*

*Mat 5:38-48; 7:12*

<sup>27</sup> “Aŋ a ŋaisag ru alon dan ŋai igo ŋurupaiaŋ da.  
 Aŋanem ager niŋedi wo amat a. Ta iliaŋ saian tap,  
 aŋ iŋ ale uyan dop kagin uyan ak mi iŋ o agane  
 wa. <sup>28</sup> Ta imisilanaŋ tap, bar uyan ak mi apani  
 wa. Ta naom ifute tap, iŋ niŋen o Anut agudani wa.  
<sup>29</sup> Ta kudaŋam igufute tap, abilisap aenta dam ka  
 igufute wa. Ta aŋsam madid san kulos milaen ak  
 iŋane tap, alefuni dop siot dam ka iŋane wa. <sup>30</sup> Ta  
 aŋsam mel ta wo igod tap, apani. Go ta aŋsam mel

inane tap, mel an ipanaŋ imul o ta agudani na wa.  
<sup>31</sup> Kagin uyan ak aŋ lo digane wo amat dan, ago mi inŋ lo agane wa.”

<sup>32</sup> “Ak dugo, tamolpein a oŋ niŋe wo ilod dupano dan mi ilo pidinai tap, Anut naon uyan ak ta ipano wak i? Tia geig a. Man dugo, aupasek tamol adi dam kagin nek ago mi digane na ya. <sup>33</sup> Tia dugo, tamolpein a oŋ dibinawo dak mi binawai tap, an lo dugo woŋ naon ule wak i? Tamol saiadi ak dam ago digane da. <sup>34</sup> Tia dugo, oŋ tamolpein a mel naon dupano wak aloŋ dan mi mel pidinai tap, an lo dugo woŋ naon ule wak i? Tamol saiadi ak dam nug mel dupani dop, naon dam ago mi diŋane da. <sup>35</sup> Gidad. Aŋanem ager ilom ipidinaip, kagin uyan ak mi inŋ lo agane wa. Ta mel apani tap, naon ipanaŋ o ta abol na wa. Ago agane tap, murnap naon tubun ak aŋane dop, Anut lak na yan nanun mok amado wa. Man dugo, Anut sen tamolpein a ilo uyan ru ta dupani na dan, agod a inŋsed mi wo ilo sou digane dan dam, ilon ipidinai da. <sup>36</sup> Ago yak niŋen o nek ibol Bai Anut aŋ ilon imuŋanaŋ dak ago mi, aŋ dam tamolpein aenta ilom imuŋanai a.”

### *Aenta abitiniai san kagin*

#### *Mat 7:1-6*

<sup>37</sup> “Oŋ tamolpein aenta bitinaek lo ta giniai na wa, an lo dop Anut dam oŋ bitinaek lo ta iginio na wa. Oŋ muruan niŋen o tamolpein aenta biai dudu umoi, an lo dop Anut dam ta ibio udu na wa. Tia, inŋsad aupasek ilo inŋaon a, an lo dop Anut dam oŋane aupasek ilon inŋaon a. <sup>38</sup> Tamolpein mel pidinai tap, Anut dam nek ago mi ipano wa. Tubun mi pidinai tap, Anut dam tubun mi ipanop,

awan isa wa. Tou sapta a pidinai dan, tou naon kisaek mi njane wa.”

<sup>39</sup> Agog Jesus ru fañan en ibol, “Tamol ta malan tia yak, mala tia neinta ka dal ikubiai pani wak i? Tia geig. Urarum gubog lo diau dudu wa.

<sup>40</sup> Talpein a mañau injane dan, inñsan girek mañau ta irinñani na da. Ak man saen mañau injane itout dop mañau inñ lo awan isa man, inñsan girek mañau igo ilasap imado wa.”

<sup>41</sup> “Dugo woñ go metmet samun ta tei malan lo ule gug oñsigane mala lo ai lapan yen an ta kubiani na yak i? <sup>42</sup> En dugo woñ tei rupeip ubol, ‘Gane dop metmet samun an mala lo yak njupasi yau,’ dugo oñsigane mala lo ai an nal fidian mi ago yen di? Oñ bale uraru ama, imug mi sigane mala lo ai lapan an pasi gup, lo abañ ka ule uyanan dop, lo tei malan lo metmet samun an pasi yau a.”

*Ai inñanen nuñon da sad ru fañan*

*Mat 7:16-18; 12:33-35*

<sup>43</sup> “Ai uyan ak inñ nuñon ta ifu saian na da. Nek ago mi ai saian ak dam nuñon ta ifu uyan na da.

<sup>44</sup> Ai fidian nuñod lo mi talon da. An ai uyan dugo an ai saian ak tabol da. Tamolpein ai gurab nuñon yuk dudurun anda yak fo ta diñane na da. Wain nuñon dam ai saian dudurun anda yak fo ta diñane na da. <sup>45</sup> Tamol uyan ak inñ mel uyan uyan ak tinin ilon lo itumanai an lo kagin uyan uyan ak mi inñal dop an idirai dilasa wa. Ak man tamol saian ak inñ mel saiak saiak tinin ilon lo itumanai an lo kagin saian saian ak mi inñal dop an idirai dilasa wa. Man dugo, kagin saian ak boi, uyan ak boi, tamol ilon inñanefute yan inñanep awan lo ibol ilasa wa.”

*Ab bek kankan milaen ak anda, agod ab bek kankan an tia ya*

*Mat 7:24-27*

<sup>46</sup> “Anj ata wo ηai niηeg o ‘O Tubun en, O Tubun en’ abol dugug ηai awag ta abi na di? <sup>47</sup> Tamol enti ηaisag na ipalug awag ilon go awag kagin ipani dan in fun igo: <sup>48</sup> in nek ibol manau tamol ab yabi wo dugo bag san gib kuror mi yabig, pat nam bag fun isue sakar ak igo won a. Agog saen ui tubun ak isi dugo, lom dam idug tim ifureg ab an ifuni bo man, ab an ibili idu san tia ya. Man dugo, ab an pat nam yabi an lo itur sakar a. <sup>49</sup> Ak man talpein ru e ηabol den ilon gug awag kagin ta ipani na dan, in man nek ibol niηeo tamol igo ya, inanen ab yabi wo dugo gib ta yabi nag, lul fufo mi yabi ak igo won a. Agod saen ui isig lom tubun ak idu dugo tim dam ifureg, ab an ibili idug iratitale yau a. Agod ab an san pitininek man saian geig a.”

## 7

*Rom san yu gurman Jesus ilon lo rumok a*

*Mat 8:5-13*

<sup>1</sup> Jesus ru en tamolpein irupidai itout go, imasag, Kaperniam na yau a. <sup>2</sup> Atna Rom san yu gurman ta san urat pinein subam saiak ta inaneg imat o sumeik a. Urat pinein an niηen o tubun mi imat da. <sup>3</sup> Agog Rom san yu gurman Jesus imado dan ilon tag, in Juda matu gurman aenta idinaig diau a. Jesus durupeip ipalup, inanen urat pinein ikubunep uyan o ibol. <sup>4</sup> Ago tag in Jesus san na diaug, maeg nam dumosiaig durupeip, “On mel en gane pani san in idaisuda ya. <sup>5</sup> Man dugo, in idsad Juda dar niηedi wo imat da, agod mansama ubou ab



dam isuse panama ya.” <sup>6</sup> Ago tag Jesus awad yabig dida diau a.

Diaug ab fun na sumeik dugo Rom yu gurman an turan idinaig, dupalug, in awan aban Jesus durupei, “O Tubun en, turen ifuno umoi. Naisag ab lo ladu san nai ta idaisuda na ya. <sup>7</sup> Agod onsa na nupalu san o dam yanag tia ya. Ru mi ubol dop lo naisag urat pinein uyan isusa da wa. <sup>8</sup> Man dugo, nek onse on nai dam tamol aenta waged lo urat ngane da, agod naisag yu tamol adi paeg na dumado da. Saen nai yu tamol ta ‘wau’ nabol tap, in yau a. Tia, tamol ta ‘palu’ nabol dop, in ipalu wa. Tia, naisag biabi nilanjal nurupeip ‘en gane’ nabol dop, in igane wa.”

<sup>9</sup> Jesus ru an ilon man, irut saian geig a. Agog idansag tamolpein a nien aban diri se yan irupidai, “Rumok geig nurupaian da, tamol ilo rumok naok igo yak ta Isrel ilon lo nile man tia ya.”

<sup>10</sup> Agog yu gurman inanen turan dumul go ab lo diau man, urat pinein an uyan isusag imado dugo dile ya.

*Jesus pinein imat ak ta ifufunig kumaen imasa ya*

<sup>11</sup> Murnag Jesus panu ta yanjan Nein dubol dan te yau a. Insan megeloum, agod tamolpein wei mi mok dam dadi diau a. <sup>12</sup> Panu an san dalawan sumeik dupani dugo, tubabun ta disinig dupalu se ya. Tamol imat an in pein suos ta nanun, nek ago kisaek o lian a. Panu an san tamolpein wei mi dam pein suos an dida dupalu se ya. <sup>13</sup> Saen Tubun en pein an ile man, ilon tubun mi imunani tag irupei, “Tata umoi.” <sup>14</sup> Ago dugo Jesus yang, kapal tubabun anda yan yabi man, tamol kapal

disini an dupartuanig dutur. Agog Jesus tubabun an irupeï, “Pinein en, ñai ñurupaio da, oñ masa!”  
 15 Agog tamol imat an fon kumaen imasag fun iganeg inñeñ se ya. Jesus pinein an inñaneg tinan ipani a.

16 Agog tamolpein fidian tubun mi durut go, Anut yanñan diabisag, dubol, “Profet tubun ak ta id lulunad lo ilasa ya.” Inñ dubol, “Anut inñanen tamolpein yil o ipalu ya.” 17 Kulob e Jesus igane yen san ru Judea ilon lo ifurak go, aben an sad panu panu lo yaug fidian dulon a.

*Jon Suguek san Jesus niñen o ilon weiwei a  
 Mat 11:2-19*

18 Jon san megeloum kulob fidian Jesus igane se yan dile tag, Jon san na diaug durupeig ilon a.  
 19 Ago man Jon megeloum nuñod urarum igiaig irupidai, “Aup, Tubun en igo asumiani wa. Tamol a ipalu san niñen o mañ malama migane dan, oñ tamol nek amaiak i? Tia, mañ tamol sen ta ipalu san niñen o mala nouk mumado wak i?”

20 Ru sinek tamol an Jesus san na dilasag Jon wagen lo ago dubol dusumiani, “Tamol a ipalu san niñen o mañ mala nouk mumado dan, oñ tamol nek amaiak i? Tia, mañ tamol sen ak ipalu san niñen o mala nouk mumado wak i?”

21 Saen nek an lo, Jesus subam adi wei mi ikubuniai dugo, a ur saian ad da yak ur saian ikudai diau dugo, a malad itapul ak idiraig fon abañ dile se ya. Ago dugo ru sinek tamol adi kulob an fidian dile se ya. 22 Agog Jesus ru naon irupidai, “Amul aup mel dugo ale dugo, ru alon na yan dam Jon arupeip ilon a: malad itau ak

afon aban dile dugo, n'ied saian ak afon turen diabi dugo, a tinid lepra amad da yan tinid sinjaokan dilasa ya. Kududod itau ak afon ru dulon dugo, a dumat ak kumaen dumasag dumado dugo, agod tamolpein mel amad tia yak bilalun uyanan ak n'ifulale pidinai dugo dulon da. <sup>23</sup> Agod talpein a n'ai o ilon ta saian na yan, in Anut san bar inane wa."

<sup>24</sup> Jon san megeloum dumul diau dugug, Jesus Jon ninen o tamolpein irupidai o fun iganeg igo ibol, "Saen an aben kawan talpein tia yak ate au an, an ata mel mok ale wo au ak i? Nag an tim ifurep war iwi yau imul dop ale wo au boi ak i?

<sup>25</sup> Tia tap, ata wo au ak i? Nag an tamol ta tinin kulos naon lak na geig ak idiri amaiak ale wo au ak i? Tia, tamol a bioun naok ago yak didiri duman, in kin sad ab lo mi dumado da. <sup>26</sup> Ak ninen o ata mel mok ale wo au ak i? Nag profet ale wo boi i? Awo, n'ai nek amaiak ninen o n'urupaian da, profet en man rumok in profet a, ak gug in urat subanan taidam da imado da, <sup>27</sup> tamol nek emaiak ninen o girek e Anut san ru lo digire idug yen den, igo ibol, 'Ule, n'aisag ru sinek tamol n'idinip, on nao na imug pe yau a.

An lo onsa dal ikubune wa.'

<sup>28</sup> Nai rumok n'urupaian da, tamol a pein tinjed lo dilasa yan lulunad lo tamol ta kisaek Jon Suguek san irinani man tia ya. Ago bo man, tamol ta Anut san kagin panek aben ilon lo yanjan tiag, aenta fidian paed na imado dan, in Jon Suguek san irinani geig a."

<sup>29</sup> (Saen tamolpein kawan ak fidian, agod takis n'ilarjal tamol dam, ru a Jesus ibol an dulon man,

Anut san dal an mi dal rumok ak niñen o awok dupani a. Man dugo, tamolpein nek an Jon san suguek diñane ya. <sup>30</sup> Gug Farisi inñ kubiaenñ san girek mañau dadi, dal uyan a Anut ikubiai pidinai an diabiani a. An niñen o suguek an ta diñane na ya.)

<sup>31</sup> Agog Jesus fon ibol, “Saen en san tamolpein inñ naok dugo woñ ak i? <sup>32</sup> Inñ nek ibol nanuk kiti-tik dadeñ aben na dumasig dumado dugo nanuk aenta igo dubol digiai da,

‘Mañ añ atari wo dum muwi se ya,  
ak man añ ta atari na ya.

Agod mateñ saen an san bar mabi se ya,

gug añ ilom saian dugo atata man amoi a.’

<sup>33</sup> Man dugo, Jon ipalug anañ tubun ak ta yani na dugo, you sakar ak dam ta iluk na ya, an niñen o ago dubol, ‘inñ ur saiak aman da ya.’ <sup>34</sup> Ago dugo Tamol Nanun dam ipalug anañ tubun ak yani dugo you sakar ak dam iluk da, an niñen o ago dubol, ‘Ale wo, tamol en tuñalek tamol, agod lukluk san tamol. Ago dugo inñ mi takis ñilañal, agod aupasek adi dam sad turadi!’ <sup>35</sup> Ak man, kankan a milaen mok amaiak, inñanen kagin naok naok an lo mi tamolpein malad lo man itaot geig an ikubiai pidinai a.”

### *Jesus Farisi tamol ta san ab lo yau a*

<sup>36</sup> Farisi ta yañan Saimon dubol dan Jesus ida anañ diani wo iwagi tag inñsan ab lo yaug, anañ diani wo dumasi a. <sup>37</sup> Panu an san aupasek pein ta Jesus Farisi dida dumado dan ilonñ tag gureñ, butol ta pat siñaokan ak nam digane yak, isinig san na ipalu ya. <sup>38</sup> Pein an ab lo iladug, Jesus patun fo

itur go itata dugo, malan turon Jesus njen fo idu se yan, gurman roun nam njen isasi se ya. Njen dam musuk ipanig, gurenj fo ikulmaek a.

<sup>39</sup> Agog Farisi tamol an ile dugo, ilon lo mi ibol, “Tamol en profet ak tap man pein en fun ilonj a. Pein en aupasek tinan.”

<sup>40</sup> Ago dugo Jesus Farisi an irupeig ibol, “Saimon, naj ru ta nurupaio wo da.”

Ago tag Saimon awan yabig ibol, “Girek manau, ubol pe.”

<sup>41</sup> Agog Jesus ibol, “Tamol uraru moni tamol ta san na gubun digane ya. Ta san gubun tinin lo yen dan man 100 kina. Ago dugo ta san gubun 10 kina.

<sup>42</sup> Murnag moni tamol an injsad gubun dupani wo irupidai a, gug uraru an sad gubun dusupasi san ta idaisuda na ya. An njenen o ilon imunanaig sad gubun an ikubuneg itout a. Onj dugo ilo isou di? Tamol dugon, moni tamol an njenen o, nen tubun mi imat ak i?”

<sup>43</sup> Saimon ru naon irupei, “Nai nabol, enti a injsan muruan nen tubun an, nek ama ya.”

Agog Jesus irupei, “Onjane kubianek an itaot a.”

<sup>44</sup> Agog Jesus idansag, naon pein an ipanig Saimon irupei, “Dugo, onj kulob e pein en igane yen ule yak i? Nai onsa ab lo njiladu gug onj you ta panag go lo njieg njufulani man tia ya. Gug inj malan turon nam njieg ifulani dugo, gurman roun nam isasi panag a. <sup>45</sup> Onj musuk ta panag man tia ya, ak gug pein en saen naj njiladu yan fun iganeg ipalug njieg musuk ipani se ya. <sup>46</sup> Onj naj gurnag fo gurenj ta kulmaek na ya. Gug pein en naj njieg fo gurenj mumalun uyanan ak ikulmaek idu ya. <sup>47</sup> Ago yan njenen o naj nurupaio da. Pein en san aupasek wei

mi bo man, ηai aupasek an fidian ηusuas pani la ya, man dugo, ηai ninjeg o tubun mi imat da. Ak man tamol ta inſan aupasek wei an tia ηusuas pani tap, inſan ilo uyan man ηai o dam tusan mi a.”

<sup>48</sup> Agog Jesus pein en irupei, “Onjane aupasek fidian ηusuas pano ya.”

<sup>49</sup> Tamol aenta anan diani wo dumasi an inſed nug durupeig dubol, “En dugo, tamol en in η mi ibol go, sen ilon nam aupasek ka ipare idu wak i?”

<sup>50</sup> Gug Jesus pein an irupei, “Onjane ilo rumok patu ipasi a. Onj maror lo mi wau.”

## 8

### *Pein malan ta Jesus ηien aban duri se ya*

<sup>1</sup> Murnag Jesus panu panu lo, agod taun tubun ak lo Anut san kagin panek san ru ibol ilasa dugo itor se ya. Inſan megeloum 12 an dam dida turen diabi se ya. <sup>2</sup> Ago dugo pein aenta, inug subam ad da yak, ur saian tinid lo ipasi an dam ηien fo dida diau se ya. Luluηad lo Magdala pein ta yaηan Maria. (Inug tinin lo Jesus ur saian 7 ikudai a.) <sup>3</sup> Ta man Joana, Kusa iwon. Kusa man King Herod san ab titianek tamol. Ta man Susana. Inj pein aenta wei mi dam Jesus, inſan megeloum dida inſigned melmel lo dibinawai dugo dutor se ya.

### *Anan kubulan san ru faηan*

#### *Mat 13:1-9; Mak 4:1-9*

<sup>4</sup> Panu panu tamolpein Jesus san na dupalug, dutumani dugo Jesus ru faηan en irupidai, <sup>5</sup> “Saen ta lo tamol ta ai patun isinig abi lo ipae o yau a. Inj yang siηanen abi lo man ai patun banin igane anuag tan fufo iratitaleg idu se ya. Saen iratitale

man, ai patun aenta dal fufo dudug tamolpein dupalug dupartitale dugo, anakanak dam dupalug diani itout a. <sup>6</sup> Agog ai patun aenta tan sagargar anda yak fufo idu ya. Saen ai patun an balud isa yak man, ririan dubun a, man dugo, tan an you an tia ya. <sup>7</sup> Ai patun aenta ud saiak luluᅇad lo dudu ya, agog sisem disa diau dugo ud saian an ai uyan ak yafutanai an lo dumat a. <sup>8</sup> Gug ai patun aenta tan uyan ak lo dudu yan disa uyan go tet mi nuᅇod ifu uyan a, sad sutek 100 igo ya.”

Agog Jesus ru an ibol itout man, iwaginᅇ go igo ibol, “Tamol oᅇ kududo ama da tap, ru an ulon uyanan a.”

*Jesus ru faᅇan lo mi iᅇiᅇeᅇ san fun*

*Mat 13:10-17; Mak 4:10-12*

<sup>9</sup> Saen Jesus san megeloum ru en fun niᅇen o dusumiani man, <sup>10</sup> igo ibol irupidai, “Anut iᅇsan kagin panek aben san melmel imianuk an san maᅇau ipanaᅇ a. Ak man tamolpein aenta ru faᅇan fun tia yak mi duloᅇ da. An lo man, ‘Iᅇ leil digane bo man, ilod ta itarpasi na da.

Agod kududod nam duloᅇ bo man, fun mok ta diᅇane na da.’ ”

*Jesus ru faᅇan an fun ifulale ya*

*Mat 13:18-23; Mak 4:13-20*

<sup>11</sup> “Ru faᅇan en san fun igo ya: anaᅇ kubulan man Anut san ru. <sup>12</sup> Anaᅇ kubulan dal te idu yan man nek ibol tamol ru duloᅇ gug Satan ru bubed lo ipasi dak igo woᅇ a. Ago dop ᅇai o ilod lo ta rumok na dop lo Anut patud ipasi san tia ya. <sup>13</sup> Anaᅇ kubulan tan sagargar anda yak fo idu yan man nek ibol tamol ru duloᅇ dugo yousai lo ru an

diñaneg ilod lo rumok a. Ak man tamol amaiak nek ibol ai dabid dabai an tia yak igo woñ, saen katukan mi ilod lo rumok a. Man dugo, kubianek ipalu san saen lo inaned ilo rumok dibisei kisaek oñ a. <sup>14</sup> Anañ kubulan ud saian ak ilon lo dudu yan man nek ibol tamolpein ru rumok an duloñ pe ilod lo rumok kisaek oñ dak igo ya. Ak man inñ tan en san madok niñen o ilo sou gidigidad mi digane da, agod inñ melmel wei mi amad da wo dumat da, an lo inñsad kagin uraru an Anut san ru inñ lo yan ituani da. Amaiak niñen o nuñod ta ifu na da. <sup>15</sup> Agod anañ kubulan tan uyan ak lo idu yan man nek ibol tamol ru duloñ dugo, inñ tamol mok san kagin lo ru an diabi dabaig, kagin dupani yaug, gidad saen muruan dile bo man sad kagin an nuñon ifu da.”

*Lam san ru fanan*

*Mak 4:21-25*

<sup>16</sup> “Tamol ta inñ lam isulanip, bod boi, tia, sareg boi paen na ta igane na da. Tia, inñ pempem lak na isunip, tamolpein a diladu dan ka dile wa. <sup>17</sup> Nek ago mi en ata mel imianuk yen dan murnap kuai isi wa. Agod mel a tamolpein naod na dimianig yen dan, kuai te ilasap id fidian tile wa. <sup>18</sup> Ago yak niñen o ru e añ alon den kagin apani wa. Ata wo? Talpein enti inñ mel ta da yan, Anut subunan taidam ipani wa. Ak man, enti inñ tinin lo mel ta tia ya, ak gug gidad inñ mel anda yak ibol da, ago bo man Anut inñsan melmel an fidian banin lo ipasi yaup itout a.”

*Jesus tinan inñ tein da Jesus dile wo diau a*

*Mat 12:46-50; Mak 3:31-35*



<sup>19</sup> Jesus tein muroun in tinad da dile wo diau a. Ak man tamolpein wei kasik go dile san tia ya. <sup>20</sup> Ago dugo tamol ta ipalug Jesus irupei, “On tina in tei murou dida dilio wo dupalu yak ab patun fo dutur da.”

<sup>21</sup> Agog Jesus awan yabig ibol, “Tamolpein a Anut san ru dulon go kagin dupani dan, in naj tinag di naj teig a.”

*Jesus tim tamun da ipidaig dutokubol a*

*Mat 8:23-27; Mak 4:35-41*

<sup>22</sup> Nal ta Jesus insan megeloum dida you saltek ak lo wog fo disida wo dugo irupidai, “Id gamu you aen ate tau a.” Agog wog dusoug diau a. <sup>23</sup> Agog diyawai dugo dal na Jesus malan iyof go yen a. Agog tim tubun nunon ifureg, wog ilon lo you idug, isarir idu wo sumeik dugo, <sup>24</sup> megeloum Jesus san na diaug dufufunig durupei, “Tubun en, id tadeq tau o sumeik da.”

Agog Jesus imasag, tim tamun da ipidai, “Atok-abol.” Agog gamu nam malin ibalsi a. <sup>25</sup> Ago dugo Jesus megeloum ipidai, “Ananem ilo rumok dugo i?”

In direr dugo durut saian man sed nug durupei, “Enso tamol ta, tim tamun da awan dulon go dutokubol ak i?”

*Jesus tamol ur saian anda yak ikubune ya*

*Mat 8:28-34; Mak 5:1-20*

<sup>26</sup> Murnag diyawai go you awan aen ate Gerasin sad tan lo diau a. <sup>27</sup> Jesus wog ibiseig idu yan, tamol ta panu an san ipalu ya, in ur saian anda ya. Saen milaen mok tamol an kulos ta idiri na ya. Agog panu na dam ta imado se na ya. Tia, in tamol

disiriai ak sad mutou fom imado se ya. <sup>28</sup> Saen in Jesus ile yan awan tubun mi isasaig Jesus njen fun na yau idug ibol, “Jesus, Anut lak na yak nanun, on mel ta nai lo i? Nai on o namosiai da, madai tubun ak panag umoi!” <sup>29</sup> Jesus gubak mi ur saiak tinin lo ilasa wo ru dabai nam irupei a, an niñen o ur saiak an ago ibol a. (Saen wei kasik ur saian an yabig tinin itirni se ya. An lo sein nam, agod kam dabai geig nam njen banin dushmanig imado dugo, titianek tamol dam tawan dutur se ya. Ak man saen fidian sein kam dam iburti idug isol go ur saiak ilon ibol dak lo tan yoitout ate yau na ya.)

<sup>30</sup> Aria, Jesus tamol an isumiani, “On yanja enti?”

Agog irupei, “Nai yanag Wei Kasik” Man dugo, gubak mi ur saiak wei mi tinin ilon lo diladug dumado se ya. <sup>31</sup> Agog ur saian adi saen wei mi Jesus dugudanig dubol, “On diramap gib kuror fun tia ak lo madu wo ago rupaiama umoi.”

<sup>32</sup> Aria, ante man bor malan tubun ak wei mi bubun an giranen na dupan di dutor se ya. Ago dugo ur saian adi an bor tinid lo diladu wo Jesus dugudani se ya. Ago man Jesus awok ibol go diau a. <sup>33</sup> Agog ur saian adi tamol an dibiseig, bor tinid lo diladu ya. Agog bor malan tubun an fidian mi ilod imasa saian go dumaspalu dudug, damab aen te dusokalik man, you awad lo yaug dumat a.

<sup>34</sup> Bor an sad titianek tamol aban ago dile tag disol go diaug panu tubun ak lo, panu kitiktik lo tamolpein an fidian durupidai se ya. <sup>35</sup> Tamolpein ru dulon go, in dam aban dile wo diau a. Dupalug, Jesus njen fun na tamol imug ur saian anda yan imasig, kulos idirig imado dugo dile ya. In itokubol go, kankan fidian uyan ak lo mi imado

dugo dileg, durut saian a. <sup>36</sup> Aenta malad nam abañ dile yan, tamolpein naod na Jesus tamol an dugo woñ ikubune yan dubol se ya. <sup>37</sup> Agog Gerasin tamolpein tubun mi direr tag Jesus imul yau wo dusumiani a. Ago tag Jesus wog lo isudag imul yau o da.

<sup>38</sup> Tamol a tinin lo ur saian ikudai an, Jesus ida diau o dabai igane yak man Jesus geg iganeg ibol, <sup>39</sup> “Umul waup, oñsigane panu na, Anut ikubunio an niñen o ru ubol dop duloñ a.” Agog tamol an imul yaug, panu ilon lo Jesus inñ ikubune yak san ru ibol dugo duloñ se ya.

*Kubakan ta imat ak inñ pein ta subam anda yak da*

*Mat 9:18-26; Mak 5:21-43*

<sup>40</sup> Saen Jesus imul man, tamolpein malan tubun you aen ate malan digane yan duyuyani a. <sup>41</sup> Ago dugo tamol ta yanñan Jairas ipalu ya. Inñ ubou ab san gurman ta. Inñ nanun pein kisaek o lian, san anañar 12 an imat o sumeik ak niñen o, inñ Jesus nien fun na yau idug, ida inñsan ab lo diau wo isumiani a.

<sup>42</sup> Jesus yau dugo tamolpein dupalug dubuluwi nuñon. <sup>43</sup> Luluñad lo pein ta anañar 12 siganen dar tinin ilon lo yak ilasa se ya. Inñsan moni samukan fidian dokta tinid lo ibisei gug ta kisaek pein en ikubuneg uyan man tia geig a. <sup>44</sup> Doup luluñad lo mi Jesus patun fo ipalug san kulos bitinñen te isupuri a. Agog gamu nam dar an igos a. <sup>45</sup> Ago tag Jesus isumianaig ibol, “Enti nñai isupurag ak i?”

Fidian tia dubol go Pita ibol, “Tubun en, tamolpein wei kasik dubuluwo dugo tinid nam on dupuno da!”

<sup>46</sup> Ak man Jesus ibol, “Talpein ta isupurag a, man dugo, naineg dabai aenta ibisawag dugo naj tinig lo nukubiani a.” <sup>47</sup> Pein an kuai tem ilon go, imunamuk pe imado san tia ya. Agog tubun mi isuruwor dugo, ipalug Jesus njen fun na isaluwi idug, tamolpein malad lo fun dugog Jesus isupurig, in san subam an itout an ibol a. <sup>48</sup> Agog Jesus irupe, “O nanug pein, onsigane ilo rumok naj lo yan ikubunio ya. Maror lo wau.”

<sup>49</sup> Jesus ago ibol dugo, tamol ta Jairas san ab lo yak ipalug, Jairas igo irupe, “On nanu pein imat la ya. Gidad on girek manau muruan taidam ta pani na wa. Ak njen o ulefuni dop yau a.”

<sup>50</sup> Jesus ago ilon tag Jairas irupe, “Urut umoi. Ilo lo rumok dop, nanu pein fon kumaen ilasa da wa.”

<sup>51</sup> Saen ab lo ilasa yan Jesus tamolpein aenta ab lo diladu man imoi. In Pita, Jon, Jems agod nanuk tinan taman mi dida diladu ya. <sup>52</sup> Tamolpein fidian ab lo yan nanuk njen o ilod saian dugo tina aru digane se ya. Agog Jesus irupidai, “Atata amoi. Nanuk en ta imat pasi na ya. In njen yabi da.”

<sup>53</sup> Ago ibol dugo disel go awan kukokan digane se ya. Man dugo, in dulon, nanuk an imat mok a.

<sup>54</sup> Gug Jesus nanuk banin te yabig ibol, “O nanug, masa!” <sup>55</sup> Agog nanuk anen kumaen san ur imul ipalug fon kumaen imasa kisaek on a. Agog Jesus ibol dugo ana dupani a. <sup>56</sup> Nanuk tinan taman kulob ago dileg, durut saian geig a. Ak man Jesus

kudod yabig ibol, “Kulob ale yan tamolpein aenta naod na ta mok abol na wa.”

## 9

*Jesus megeloum 12 idinaig bilaluŋ diau a*

*Mat 10:1-15; Mak 6:7-13*

<sup>1</sup> Jesus inŋsan megeloum 12 an itumanaig, ur saian dukudai dop subam dukubiniai san dabai ipidinai a. <sup>2</sup> Agog idinaig diaup, Anut san kagin panek niŋen o dubol ilasa dop subam adi dukubiniai o ibol a. <sup>3</sup> Ago dugo Jesus irupidai, “An turen an lo, makud, badam, ŋion san biouŋ, anaŋ, agod moni ta mok asini na wa. Siot subuŋan dam ta asini na wa. <sup>4</sup> Ab dugon lo digiaŋ tap, nek ante mi amado nap panu an abisei a. <sup>5</sup> Panu ta lo tamolpein an o ta dumat na tap, panu an abisei wo dop, ŋiem san gufgaf apilti pidinai a. Agop lo duloŋ ak, in Anut san kagin panek dumoi a.” <sup>6</sup> Ago megeloum diaug, panu panu bilaluŋ uyan ak dubol ilasa dugo, subam adi dam dukubiniai se ya.

*Herod isumiaen, Jesus inŋ enti mok?*

*Mat 14:1-2; Mak 6:14-16*

<sup>7</sup> Herod Galili provins san gurman tubun an melmel fidian ilasa na yan ilon go ilon weiwei geig a. Man dugo, tamolpein aenta dubol, “Jon suguek san inŋ fon kumaen imasa da ya.” <sup>8</sup> Aenta dubol, “Elaija boi, tia, profet wagam san ta fon kumaen imasa boi.” <sup>9</sup> Ago gug Herod ibol, “Ŋai Jon buron ŋitarti a. Ak gug tamol e melmel emaiak iganeg ru an ŋaloŋ den, inŋ enti?” Ago dugo inŋ Jesus ile wo yaes tubun mi ifuni se ya.

*Jesus tamolpein 5,000 ifutuwai a*  
*2Kinj 4:42-44; Mat 14:13-21; Mak 6:30-44; Jon*  
*6:1-13*

<sup>10</sup> Inanen megeloum dumul dupalug Jesus naon na melmel fidian digane yan dubol idu ya. Agog megeloum an injal go pasak nam panu ta yanjan Betsaida dubol dan ate diau a. <sup>11</sup> Ak man tamolpein malan tubun mi Jesus dugo yau wo igane dan dulon tag, njen aban duri se ya. Ago tag igiaig dupalug, Anut san kagin panek ru ifulale pidinaidugo, aenta subam ad da yan ikubuniaise ya.

<sup>12</sup> Gurai idu dugo megeloum 12 Jesus san na diaug, durupe, "On tamolpein dinaip, panu susumeik an lo, gidigheid diaup, sed ninedi wo ananj o, njen aben o abanj dile wa. Man dugo, aben en yoitout a."

<sup>13</sup> Ak man Jesus ru naon irupidai, "Ansem ka afutuwai a."

Ago tag durupe, "Man ananj tia ya. En iy uraru, agod bret kafen mi dien da. Dugo, man maup, doup tubun en ninedi wo ananj taida madad o?" <sup>14</sup> (Doup tubun dumado yan tamol kitek faiv tausen igo won a.)

Agog Jesus megeloum irupidai, "Tamolpein arupidaip, nunod fifti malan kisaek kisaek lo mi dumado wa."

<sup>15</sup> Agog megeloum adi Jesus ibol ago diganeg, tamolpein durupidai dugo dumasi a. <sup>16</sup> Agog Jesus iy uraru, bret kafen an inaneg, malan lak na isudag, Anut ilo uyan ipani gug bret yafuteg, megeloum ipidinaig duwae se ya. <sup>17</sup> Tamolpein fidian bret iy da dianig, luad ipuk go megeloum ananj wadan dutumanig sareg 12 digane anuai a.

*Pita, Jesus in Kristus an kuai te ibol a  
Mat 16:13-20; Mak 8:27-30*

<sup>18</sup> Nal ta Jesus sen kisaek igudanig imado dugo, inanen megeloum dam susumeik dumado dugo isumianai, “Tamolpein n̄ai o enti dubol dak i?”

<sup>19</sup> Agog ru naon durupeig dubol, “Aenta oñ suguek tamol Jon dubol da. Aenta dubol, oñ Elaija boi, tia, profet aenta wagam mi dumat na yan ta fon kumaen imasa ago dubol da.”

<sup>20</sup> Ago dugo megeloum isumianai, “Gug ansem mi n̄ai enti mok abol di?” Agog Pita ru naon igo irupei, “Oñ Anut anen Kristus.”

*Jesus murnap imat gup imasa da wak ninen o  
ibol a*

*Mat 16:21-28; Mak 8:31–9:1*

<sup>21</sup> Agog Jesus megeloum kududod yabig, ru dabai nam irupidaig ibol, “Tamolpein gidigidad naod na ru an ta abol na wa.” <sup>22</sup> Ru awan ibateg ibol, “Tamol Nanun muruan tubun ak wei mi ile wa. Pris gurman adi, Isrel matu gurman dida, agod kubiaen san girek man̄au dam patud dupanip dile saian a. Agop dufuni imat a. Nal utol gib lo yen gup, fon kumaen imasa da wa.”

<sup>23</sup> Agog fidian irupidai, “Ta in̄ n̄ai iganurag o tap, in̄siganen ilo ibol patun ipanip, dal fidian lo siganen aigim isinip, n̄ieg aban iri wa. <sup>24</sup> Ta in̄sinan tinin mi kagin ipani dan, ideg yau a. Gug ta n̄ai nin̄eg o siganen madok tan en lo yan ibisei dan, patu pasek in̄ane wa. <sup>25</sup> Talpein ta tan en san madok lo malan imug dop, an lo tan en san filian fidian an san muroun ilasa wak gug, n̄utun ideg yau, tia, daon̄ in̄ane tap, an dugo won̄, sen nin̄en

o nunjon uyan ak igane ilasa wak i? Man tia geig a.  
<sup>26</sup> Tamol Nanun inſan lilaman lo, Bai san lilaman lo, enjel gun adi sad lilaman lo ipalu wa. Ta in űaisag ru yanag da o miai ifuni tap, saen Tamol Nanun imul dop, in dam tamol an ninen o miai ifuni wa.  
<sup>27</sup> Nai rumok űurupaian da. Gamu an aenta e atur den gamugo amat dop, Anut san kagin panek ale wa.”

*Jesus naon tinin ibilisa ya*

*Mat 17:1-8; Mak 9:2-8*

<sup>28</sup> Jesus ru an ibol go nal 8 yau dugo Pita, Jon, Jems ago injal go did fo igudani wo dusuda ya.

<sup>29</sup> Jesus igudani dugo naon ibilisag, inſan kulos dam ibilisag milkouk kasik. <sup>30-31</sup> Ago dugo tamol uraru girager amad da dilasa ya. Tamol uraru an man Moses in Elaija da ya. Jesus mitep maten a Anut ilon yen dan lo Jerusalem na ile wan ninen o, Moses in Elaija da Jesus dida dininen se ya. <sup>32</sup> Pita turan muroun dida malad muruan se ya, ak gug malad ipuk go dumado dugo Jesus girager anda dile ya. Agod tamol uraru dam dutur dugo dil a.

<sup>33</sup> Moses in Elaija da fun diganeg diau dugo, Pita kankan an tia igo ibol, “Tubun en, uyanan geig a. Man lalai utol mabi wa. Onane kisaek. Elaija an kisaek. Agod Moses an kisaek.”

<sup>34</sup> Ago ibol dugo timtaen ipalug, yafutanai dugo megeloum utol an direr saian mok a. <sup>35</sup> Agog awan ta timtaen lo iwagin go ibol, “En űaineg nanug, űaineg Pilianek Tamol. Awan alon a.” <sup>36</sup> Saen awan itau man Jesus sen kisaek itur dugo dile ya. Saen an megeloum aban ago dile yan tamolpein naod



na ta dubol na ya. Tia, inşed ilod lo mi dutueg yen a.

*Jesus pinein ta tinin lo ur saian ikudig yau a  
Mat 17:14-20; Mak 9:14-29*

<sup>37</sup> Murnag did dibiseig dudu dugo, tamolpein malan tubun ak ante dumado yan Jesus dile dugo san na dupalu ya. <sup>38</sup> Doup an lulunad lo tamol ta iwagin go ibol, “Girek manau, naineg nanug e ule den ninen o ilo isou. Nai nanug en igo kisaek o lian a. <sup>39</sup> Ur saian ta pempem yabi dop isasai da. Iganep bururau ifuni dop subulbal awan lo ilasa da. Nek ago mi pempem madai ipani dugo, daonj dam ipani da. <sup>40</sup> Onsa megeloum ur saian an dukudi wo nşusumianai gug in digane san tia ya.”

<sup>41</sup> Jesus ru naon irupeig ibol, “O an saen en san tamolpein, an ilo rumok amam tia ya, agod an ilom gidigheid amado da. Nal sapta nai an da tumado wak i? Nal sapta muruan a apanag on dan nşisini wak i? Nanuk an igo anane apalu.”

<sup>42</sup> Nanuk ipalu dugo ur saian an nanuk itarfuni ibili idug, idududuruk dugo yen se ya. Gug Jesus ur saian an naon ifute ipeig pinein an ikubune ya. Agog pinein an inşaneg taman ipani a. <sup>43</sup> Tamolpein fidian Anut san dabai an dileg, durut saian a.

*Jesus afon inşanen materj ninen o ibol a  
Mat 17:22-23; Mak 9:30-32*

Saen tamolpein an Jesus kulob fidian e igane yen ninen o ilod weiwei man, Jesus inşan megeloum igo irupidai, <sup>44</sup> “Ru en alonj dop ilom isou uyanan. Tamol Nanun ager adi banid lo digane wa.” <sup>45</sup> Ak man megeloum ru an fun ta dulonj na ya. Anut ru an fun mok imiani a, agod

duloŋ san tia ya. Taida mi, megeloum adi Jesus n̄inen en isafulale pidinai o dusumiani san man direr a.

*Enti in̄ tubun a*

*Mat 18:1-5; Mak 9:33-40*

<sup>46</sup> Megeloum in̄sed mi nug dupeig dubol, “Id luluŋad lo enti malan te yak i?” <sup>47</sup> Jesus in̄sad kankan ilon̄ go nanuk nanun ta in̄aneg giran̄en na igunig <sup>48</sup> megeloum irupidai, “Talpein enti n̄ai yan̄ag lo nanuk igo yan in̄ane wo iyuŋani tap, n̄ai dam in̄iliag o iyuŋanag da. Agod talpein a n̄ai in̄iliag dan, Enti a n̄ai idinag go n̄upalu yan dam in̄ane da. Man dugo, talpein a an̄ luluŋam lo sen yabi idup murna geig an, in̄ mi malan te ya.”

<sup>49</sup> Jon Jesus irupeï, “Tubun en, man̄ tamol ta on̄ yan̄a lo ur saian ikudai dugo mile ya. Tamol an man̄sama tia ya, an n̄inen o imoi o murupeï a.”

<sup>50</sup> Agog Jesus irupeï, “Ago igane dop apadau amoi. Man dugo, ta an̄sam ager tia yan in̄ idsad urat kisaek a.”

*Sameria aenta Jesus dumoi a*

<sup>51</sup> Jesus Anut san panu lo yau san saen sumeik dugo, in̄ naon Jerusalem na ipanig turen̄ yabi se ya. In̄ ru sinek tamol aenta idinaig dumug go <sup>52</sup> Sameria na panu ta lo dumado san aben dukubune dop ipalu wo diau a. <sup>53</sup> Panu ta lo diladu yak gug, tamolpein panu an san diŋiliai o dumoi. Man dugo, tamolpein duloŋ ak, Jesus Jerusalem na yau da. <sup>54</sup> Saen Jems in̄ Jon da aban̄ ago dile tag Jesus durupeï, “Tubun en, ubol tap, mabol dop keit lo yai idup, panu en imarip inani yau a.” <sup>55</sup> Ak

man Jesus idanŋag ru dabai nam ipidai a. <sup>56</sup> Ago tag panu sen ta lo diau a.

*Jesus n̄ien aban diri san muruan*

*Mat 8:19-22*

<sup>57</sup> Dal na diau dugo, tamol ta Jesus irupei, “On dugo wau dan n̄ai dam ante tau a.”

<sup>58</sup> Ago tag Jesus ru naon irupei, “Goun kasik in̄ gib ad da ya. Anakanak in̄ wur ad da ya. Gug Tamol Nanun man, in̄ kabun̄an igansip yaes ibal san aben tia ya.”

<sup>59</sup> Agog Jesus tamol sen ak ta irupei, “N̄ieg aban uri.”

Gug tamol an ibol, “Tubun en, umoi dop n̄aup, tamag n̄isare gup.”

<sup>60</sup> Ago tag Jesus ru naon irupeig ibol, “Tamolpein a in̄sed n̄utudi lo dumat la yan bisawai dop, in̄siganed tubabun an ka disiria i idu wa. On waup, Anut san kagin panek n̄in̄en tamolpein naod na ubol ilasa dop dulon̄ a.”

<sup>61</sup> Agog tamol taidam irupei, “Tubun en, n̄ai dam n̄ie aban n̄iri wa. Ak man umoi dop, n̄aup, tinag tamag teig taog banid n̄abi gup.”

<sup>62</sup> Ago tag Jesus tamol an irupei, “Tamol ta urat igane dugo pempem patun na idan̄sa idan̄la won̄ dan, in̄ Anut san kagin panek san urat igane san ta idaisuda na ya.”

## 10

*Jesus urat tamol 72 ipilianaig diau a*

<sup>1</sup> Murnag Jesus urat tamol 72, panu panu lo diau o nun̄od uraru uraru ipilianaig, dumug diau se ya. <sup>2</sup> In̄ gamugo turen̄ diabi dugo, ru kagin

igo ibol irupidai, “Añañ nuñon tubun mok ifu a. Gug urat tamol wei an tia ya. Ak niñen o abi taman aguduani dop urat tamol taidam idinaip añ da aup, anañ nuñon atumani wa. <sup>3</sup> Ago yak niñen o au. Gamu ñidinañ den man nek ibol sipsip nanudi goun kasik ak luluñad lo diau dak igo won a. <sup>4</sup> Moni, badam, sendal ta asini na wa. Saen dal ari dan lo, enti ta naom na ilasa dop añ pasak ta agane na wa.”

<sup>5</sup> “Ab ta ilon lo aladu wo dop, abol, ‘Maror am da amado.’ <sup>6</sup> Tamol maror san ak imado tap, añanem maror in lo yen a. Tia tap, añanem maror imul pe muroum sam na ipalu wa. <sup>7</sup> Ab dugon lo aladu dan, nek ante mi amado wa. Añañ you dupanañ dop ani aluk a. Man ata wo, urat tamol man inañed naon diñane san idaisuda ya. Ab sensen lo ta au na wa.

<sup>8</sup> “Agod panu ta ilo uyan lo mi diñiliañ tap, anañ digane panañ dan ani wa. <sup>9</sup> Inñad subam adi akubuniañ dop, panu an san tamolpein dam arupidai, ‘Anut san kagin panek sumeik ipanañ la ya.’ <sup>10</sup> Gug panu ta ate alasap, in añ lo uyan tia tap, panu titiñaem mi alasap, abol, <sup>11</sup> ‘Añanem panu san gufgaf ñiema fo isuda yen, gamu muroum sam na mipitili idu da. Aloñ ak, Anut san kagin panek sumeik ipanañ la yak man añ amoi da.’ <sup>12</sup> Ñai ñurupaiañ da, murnap nal wadan lo dop, rumok, Sodom adi fon mi muruan tubun mi dile wa. Gug muruan a panu an san tamolpein murnap dile wan, Sodom sad muruan an iriñani geig a.”

*Jesus panu aenta sad tamolpein ilod lo ta rumok na yan ru lo ibiañ dudu ya*

*Mat 11:20-24*

13 “O Korasin san tamolpein, muruan tubun geig ale wa; O Betsaida san tamolpein, an dam muruan tubun geig ale wa. Man dugo, kulob girager a naj an luluᅇam lo ᅇigane dan, wagam Tair in Saidon da luluᅇad lo ᅇigane tap, taun an san tamolpein wagam mi ilod ibilisa wa. Ago dop mugun san kulos didirip, yai san utut fo dumasip dumado wa. 14 Ago man saen Anut san bitinaek san nal ipalu wan lo, anᅇsam aupasek naon Anut ipanaᅇ an senamo geig a. Muruan an Tair in Saidon da sad muruan an iriᅇani geig a. 15 Agod an Kaperniam tamolpein, sem yaᅇam abisap keit lo isuda wak i? Tia mok, Anut inᅇen inᅇilian pe au adup tan ilon lo aben yaᅇan Ades dubol dan lo idiraᅇ pe amado wa.”

16 Agog Jesus inᅇsan urat tamol 72 fon irupidai, “Ta an awam ilon dan, naj dam awag ilon da. Go ta an imoi dan, naj dam imoi a. Go ta naj imoi dan, Enti a naj idinag go ᅇupalu yan dam imoi a.” Agog diau a.

*Anut inᅇanen mel imianuk fidian tamol yaᅇad tia yan ikubiai pidinai a*

17 Murnag tamol 72 an Jesus san na dumul dupalug, uyad isusag dubol, “Tubun en. Nek ur saiak saiak on yaᅇa mupate dan lo awama paen na dumado dugo awama diabi da!”

18 Agog Jesus ru naon irupidai, “Nai gubak mi Satan ᅇile dugo, nek ibol lak na weil irafule yak igo won, keit ibiseig idu ya. 19 Alon, naj an dabai ᅇupanaᅇ la ya. Ak niᅇen o an mot, lualiu da ka aparfufarai a. Anᅇanem ager Satan san dabai fidian an ka abi idu wa, agod mel ta malam issue san tia

ya. <sup>20</sup> Gug anj ur saian saian awam diabi dan ninjen o ta uyam isusa na wa. Tia. Anut anjanem yanjam kumaen panu na igireg yen dan mi ninjen o uyam isusa wa.”

*Jesus youn isag Anut per ipani a  
Mat 11:25-27; 13:16-17*

<sup>21</sup> Saen an lo Jesus Urgun lo ilon imasag yousai tubun geig ak lo Anut irupei, “O Bai, tan keit da sad Tubun a, naj ilo uyan ru nupano da. Man dugo, mel en fidian tamolpein a kankan ad milaen an, agod a dulonj dubol dan dam, minami pidinai a. Ak man onj mel an fidian tamol a yanjad tia yan kubiai pidinai a. O Bai, awo, ago gane san an onjane ilo, an ninjen o naj youg isa dugo ilo uyan nupano da.”

<sup>22</sup> “Nai Tamag iginiag go mel fidian sad tamad njilasag njumado da. Tamol ta inj Anut Nanun ta ilonj na ya, nek Taman injsen mi a. Agod tamol ta inj naj Tamag ta ilonj na ya, nek njaiseg mi, agod tamol nek amaiak Nanun injsinan ilobol lo mi Taman ikubiai pani wa.”

<sup>23</sup> Agog Jesus idansag, megeloum pasak nam irupidaig ibol, “Mel gamu ale dan ninjen o ilom uyan. <sup>24</sup> Man dugo, profet adi agod kinj adi wei kasik, mel e gamu anj ale den dile wo mok dumat se ya, ak man inj ta dile na ya. Agod ru e gamu anj alonj den dulonj o mok dumat se ya, ak man ta dulonj na ya.”

*Sameria tamol injanen ager ibinawi a  
Luk 18:18-30*

<sup>25</sup> Kubiaen san girek manau ta imasag Jesus ibitinae wo isumiani, “Girek manau, naj dugo niganep kumaen ninane wak i?”

<sup>26</sup> Ago tag Jesus isumianig ibol, “Moses san kubaen lo dugo digire yak i? Ata ru suti ak i?”

<sup>27</sup> In ru naon igo irupei, “On gidad Tubun en onane Anut ninen o umat a, on bube fidian lo, ntu fidian lo, onane ilo sou fidian lo, agod onane dabai fidian lo ago gane wa. Agod, nek onse niye wo umat dak ago mi tamolpein aenta dam ninedi wo umat a.”

<sup>28</sup> Ago Jesus tamol an irupei, “Onane ru naon itaot a. Nek ago mi gane tap, kumaen pempem san nane wa.”

<sup>29</sup> Ak man kubiaen san girek manau an, tamolpein aenta malad lo inanen nao lalek an uyanan ilasa wo ilon ibol a. Ago yan ninen o in Jesus igo isumiani, “Tamol ninen ubol an enti mok i?”

<sup>30</sup> Ago tag Jesus ru naon igo irupeig ibol, “Tamol ta in Jerusalem ibiseig Jeriko na yau dugo dal na gumagam tamol adi diabi a. Agog bioun tinin fo yan dirasireg digam go, dufunig imat go tubabun yen dugo diau a. <sup>31</sup> Saen nek an lo pris ta dal an mi irig ipalu ya. Saen ipalu man tamol an imat go tubabun dal te yen dugo ile tag, dal gigin irig irinanig yau a. <sup>32</sup> Livai san gugoi lo tamol taidam ipalug tamol an dal na yen dugo ile man, in dam dal senamo inaneg yau a. <sup>33</sup> Agog Sameria tamol ta dal an inaneg yau nag tamol an ile, ago man ilon tubun mi imunan a. <sup>34</sup> Ago tag wain in guren da marasin on inaneg nam tinin baob ifulanig ifou. Agog tamol an insiganen donki fo

igane isudag, inaneg lou ab ta lo diaug kaginan igane ya. <sup>35</sup> Tidom lom mig kina uraru ab an san titianek tamol ipani dugo irupei, 'Kaginan gane. Murnap namul dop, melmel sapita in tinin lo bisei an naon nai on nupano wa.' "

<sup>36</sup> "On dugo ubol di? Tamol utol an lulunad lo enti inanen turan o imat ak i?"

<sup>37</sup> Ago tag kubiaen san girek manau an ibol, "Tamol a ilon imunani ama ya."

Ago dugo Jesus irupeig ibol, "On dam waup, nek ago mi gane wa."

### *Jesus Marta in Maria da sad na yau a*

<sup>38</sup> Jesus inanen megeloum dida diaug panu ta ate dilasa ya. Atna pein ta yan an Marta dubol dan Jesus iwagig insan ab lo diau a. <sup>39</sup> Marta tein ta yan an Maria, in Tubun en nien fun na imasig imado dugo, insan ru ibol dugo ilon se ya. <sup>40</sup> Ago dugo Marta mi sen kisaek anan biabi an iganeg yaug, ilon saian tag ipalug Jesus irupeig ibol, "Tubun en. Nai teig en ibisawag go seg mi urat en fidian ngigane dan ninen dugo kankan gane dak i? Peip, ibunawag."

<sup>41</sup> Ago man Tubun en ru naon irupei, "O Marta! On mel wei mi ninedi wo ilo weiwei dugo ilo muruan da. <sup>42</sup> Gug on mel kisaek malan te yak ninen o kankan ta gane na da. Maria mel an ipilianig inane ya. Talpein ta mel an banin lo ipasi san tia ya."

## 11

*Jesus megeloum gadin digane wo ipitenanai a  
Mat 6:9-13; 7:7-11*



<sup>1</sup> Saen ta Jesus aben ta lo iguduanig itout an megeloum ta ipalug isumiani, “Tubun en, Jon inſan megeloum gudanek ipiteſanai ak ago mi maſ dam piteſanama.”

<sup>2</sup> Ago tag Jesus irupidaig ibol, “An agudani wo tap, igo agod a:

‘Maſanema Bai, oſane yaſa gun.

Oſane kagin panek ipalu.

<sup>3</sup> Nal anek anek san anaſ panama.

<sup>4</sup> Maſanema aupasek ilo inſaon.

Man dugo, aupasek a aenta maſ lo digane dan iloma inſaon da.

Bitinaek lo naoma ta urae na wa.’ ”

<sup>5</sup> Agog Jesus gudanek ipiteſanai yaug, ru mitilaen en irupidai, “Gamu tura ta san ab lo waup, tidom lak dalawan tutip, anaſ ta ipano wo gudanip ubol. <sup>6</sup> “Turag ta gamu nam ſaisag na ipalu yak man ſai anaſ amag tia ya.’

<sup>7</sup> “Ago dop tura ab ilon lo ru naon irupaio, ‘Njoſ saen go maen dak niſen o leiſ panama umoi. Dalawan itau a, pein nanuk fidian dien la ya. Njai ſumasap mel ta ſupano san tia ya.’ <sup>8</sup> Gug ſai ſurupaian da, gidad, oſsa tura bo man anaſ ta ipano na wa. Gug oſ gidad miai ifuno bo man maeg ganep sumiani oſ tap, melmel fidian niſen o ilo ibol dan ipano wa.”

<sup>9</sup> “Ago yak niſen ſai ſurupaian da: Agudani dop, ipanaſ a. Abaſ abi dop, ale wa. Dalawan atuti dop, ipasi panaſ a. <sup>10</sup> Fidian dugudani dan diſane wa. Ta abaſ yabi dan ile wa. Ta dalawan ituti dan Anut ipasi pani wa.”

<sup>11</sup> “Dugo, aſ nanuk tamadi, nanum ta iy o igod dop, aben lo mot apani di? <sup>12</sup> Tia. Kurek patun o

ibol dop lualiu apani di? An dam tia ya. <sup>13</sup> An bo saiami a, ak gug nanum melmel niñedi wo dugod tap, mel uyan ak apidinai da. Nek ago mi Bai Anut dam tamol enti Urgun inane wo igod tap ipani wa.”

*Tamolpein Jesus Belsebul san dabai lo urat igane dak ago dubol a*

*Mat 12:22-30; Mak 3:22-27*

<sup>14</sup> Nal ta Jesus tamol ta, ur saiak igane awan itau ak tinin lo ikudi a. Agog tamol an awan ipuk go ininon a. Ago man tamolpein wei mi ate dutur dan fidian durut saian a. <sup>15</sup> Ak man aenta dubol, “Ur sisaiak sad gurman yanjan Belsebul tabol damaiak san dabai lo mi in ur sisaiak ikudai diau da.” <sup>16</sup> Ago dugo aenta Jesus naon dukubiani wo kulob girager ta igane dop, dile wo dusumiani. An lo dop dulon ak, Anut sen idinig ipalu ya.

<sup>17</sup> Gug Jesus in sad ilod ilon la yak ninen o irup-idai, “Panu ta nug ditarpalep malan uraru dilasap, in sad ilod lo mi nug dufuni tap, in saen milaen ta dumado na wa. Gugoi ta ditarpalep sensen dutur o digane tap, in sad gugoi an yau idu wa. <sup>18</sup> Ago yak ninen o Satan in sen lo tarpalek igane dop, dugo won pe in san kagin panek aben an dabai yen yau ak i? Nai an nabol dan man fun, nai Belsebul dabai ipanag ak lo ur sisaiak nukudai diau dak abol da. <sup>19</sup> Gug an rumok tap, an signanem megeloum adi, enti san dabai nam ur saiak dukudai diau dak i? Fun amaiak ninen o an signanem megeloum in sed mi, saen Anut san bitinaek nal ilasa dop, kubianek tamol on dilasap bitinaek lo didiran a. <sup>20</sup> Ak man nai Anut banin nam ur sisaiak nukudai diau dak

ago tap, an gidad alon uyanan a, Anut san kagin panek an sinjirem na ipalu la ya.”

<sup>21</sup> “Tamol ta dabai ak ager san biouŋ tinin fo idirip ate inanen ab melmel da kagin ipidinai tap, inanen melmel an fidian itaot mi dien a. <sup>22</sup> Gug tamol ta nen dabai ak ipalup, yu in lo iganep itout tap, inŋsan ager san biouŋ biouŋ a ate inanen tini ganei igane se yan fidian igam pe isini yau a, agop inŋsan furan fidian dam inanep iwae yau a.

<sup>23</sup> “Talpein enti in ŋai ta iganurag na dan, in patun ipanag da. Agod talpein a ŋai da sisem anan mutumani san urat ta migane na dan, ŋaisag urat iratitale da.”

*Ur saiak dukudig yau an imul ipalu ya*  
*Mat 12:43-45*

<sup>24</sup> “Saen ur saiak ta tamol tinin lo yak dukudip yau tap, aben igosan ak ate gidigidad ila iso wa. Ante aben ta yaes ibal san ile wo aban yabi wa, ak man aben an ta ile na wa. Ago dop ilon lo ibol, ‘Ŋai gidad ŋamul pe ab gubak mi ate ŋumado amaiak lo ŋau a.’ <sup>25</sup> In imasap yau ak man, ab an kawan di ilon dam diriani dugo mel fidian dukubuneg itaot dien dan ile wa. <sup>26</sup> Amaiak ninen o in imul yaup, ur saiad geig ak 7 taidam injal a. Ur an kulob sisaiak digane san man in dirinani geig a. In sisem ab an lo diladup dumado wa. Gubak mi tamol an san madok saian a, ak man gamu gup san madok saian geig a.”

<sup>27</sup> Jesus ru ago ibol dugo, pein ta tamolpein luluŋad lo imasag iwagin go ibol, “Pein a iginiosig su ipano yan bar inaneg imado da.”

<sup>28</sup> Gug Jesus awan yabig ibol, “Tia. Enti Anut san ru ilonj dugo kagin ipani dan mi bar injaneg imado da.”

*Tamolpein kulob girager dile wo dusumiani a  
Mat 12:38-42*

<sup>29</sup> Tamolpein wei mi dususa se ya, ago dugo Jesus irupidai, “Saen gamu en san tamolpein man saiadi geig. Inj kulob girager ta kob igo wonj dile wo dusumianag da. Ak man Anut kulob girager ta tamolpein an ta ipidinai na wa, nek kob kisaek an mi ka dile wa, kob an man profet Jona san a. <sup>30</sup> Man dugo, nek ibol Ninive adi malad lo Jona kob onj ilasag imado yak igo wonj, naiseg tamolpein saen en san injanen malan lo kob naon nek ago njilasap njumado wa. <sup>31</sup> Kwin a saut lo ilasa yan man, anj gamu saen en san tamolpein dida Anut san bitinaek nal lo sisem amasap, kot lo atur a. Ago dop kwin an anj ninjemi wo ru ibol ilasa dop boum ipanaj a. Man ata wo? Kwin an inj tan asau mok imado bo man, Solomon san kankan milaen amaiak ibol ilasa dop ilonj o ipalu ya. Ago yak gug tamol ta dam inj ente imado da, tamol an man Solomon irinjani geig a. <sup>32</sup> Ninive san tamolpein man anj gamu saen en san tamolpein dida Anut san bitinaek nal lo sisem amasap, kot lo atur a. Ago dop Ninive adi anj ninjemi wo ru dubol ilasa dop boum dupanaj a. Man ata wo? Ninive adi Jona san ru ibol ilasa yan dulong go an lo ilod ibilisa ya; ak man tamol ta inj Jona irinjani geig an gamu imado da.

*Tinid san lilaman  
Mat 5:14-16; 6:22-23*

<sup>33</sup> Tamol ta in lam ibanip ta imianip yen na da. Agod sareg paen na ta iganep yen na da. Tia, in kuai te isunanjip iyuk yen da. Ago dop tamolpein a ab lo diladu dan lilaman dile wa. <sup>34</sup> Onane mala man tini san lilaman. Saen onane mala uyan tap, tini fidian geig an ilalan da awan isa wa. Ak man saen on mala saian tap, tini fidian geig an tidom tubun da awan isa wa. <sup>35</sup> Ago yak ninen o kagin agane. Kabelan lilaman a on lo yan tidom tubun on banau. <sup>36</sup> Amaiak ninen o ananem tinim fidian an ilalan dugo gigin ta lo tidom tubun ta yen na tap, aria, lilaman a an lo yen dan awan isa wa, nek ibol lam ided dan on tini fidian ilalan da.”

*Misilanek ru siks*

*Mat 23:1-36; Mak 12:38-40*

<sup>37</sup> Saen Jesus ininon go itout an Farisi ta iwagig inisan ab lo anan diani wo diau a. <sup>38</sup> Jesus Juda kagin irinanig, banin ta ifulani na dugo anan diani wo dumasia a. Farisi an Jesus ago ileg, irut saian. <sup>39</sup> Ago tag Tubun en Farisi an irupe, “An Farisi man gab daeg da tinid patud fo yak mi afulanai da. Gug ilom lo man mala sek, agod kagin saiak saiak mi awan isa ya. <sup>40</sup> An Farisi njeo tinami. Anut tinim igane dugo ilom dam igane ya. An lo ata wo ilom ta akubune na dak i? <sup>41</sup> Melmel a anjam gab daeg lo yan bigabeg adi apidinaip lo sedibunawai tap, an tinim fidian Anut malan lo ikokan imado wa.”

<sup>42</sup> “O Farisi, muruan tubun geig ak ale wa! Man dugo, ananem abi san anan melmel kitiktik an fidian atumanip, malan 10 ilasa gup malan kisaek

atarpalep Anut apani da. Gug aņ Anut san kubiaeņ malan te yak arinani da. Aņ tamolpein kot lo ta atarpasai uyanan na dak, agod Anut niņen o dam ta amat na da. Kagin malan te yak agane wa, agod kubiaeņ san ru kagin kititik dam ta abisei na wa.”

<sup>43</sup> “O Farisi, muruan tubun geig ak ale wa! Man dugo, aņ ubou ab lo tamolpein malad lo kapal malan te yak fo amado wo agane da. Agod aņ tamolpein malak malak yaņam diabisa wo agane da.”

<sup>44</sup> “Aņ kagin agane! Aņ man ibol tubabun gib lo imianuk yen dugo tamolpein ta dulon na dugo fufo diau dumul dugo sed nun ipidinaı dak igo won a, ago man in aņ siņirem na dupalu yan lo Anut malan lo nun anda dilasag dumado da.”

<sup>45</sup> Agog kubiaeņ san girek maņau ta Jesus irupeı, “Girek maņau, on ago ubol dan maņ dam paiama da.”

<sup>46</sup> Agog Jesus ru naon irupeı, “O kubiaeņ san girek maņau, aņ dam muruan tubun geig ak ale wa! Man dugo, aņ tamolpein kubiaeņ fidian kagin dupani wo abol da. An lo tamolpein muruan tubun kasik apidinaı da. Gug in sad muruan lo aņ banim ilap kitek ta abinawai na da.”

<sup>47</sup> “Rumok aņ muruan tubun geig ak aņane wa! Aņ profet adi dumat la yan sad mutou damag siņaokan apani da, ak gug profet nek an aņanem tubum bagem dufu dumat a. <sup>48</sup> Kagin e agane den lo aņsem kot ipanaņ da, man dugo, kagin a gubak mi digane na yan niņen o awok apidinaı da. In profet adi dufu dumat se ya, agod aņ sad mutou akubune da. <sup>49</sup> Amaiak niņen o In a tinin ilon lo Anut anen kankan milaeņ ak yen dan, igo ibol go

irupaian, n̄ai profet adi agod aposel adi n̄idinaip dupalu dop an̄sam na dilasa wa. Ago bo man an̄ aenta afu dumat a, aenkadi muruan funfun dupidinai se ya. <sup>50</sup> Fun an nin̄en o, profet fidian ager adi banid lo mateñ dile yan, kagin amaiak san ai wadan Anut an̄sem mi ipanañ a. An man an̄siganem muruan mi a. <sup>51</sup> An lo Abel imat ak san saen log ipalug kiñ Joas san saen lo, Sakaraia in̄ Berekaia nanun tempel san galuñ gun ak, alta da titiñae mi tubum bagemi dufunig imat a, kagin an san ai wadan an tamolpein gamu dumado den sad na ilasap disini wa.”

<sup>52</sup> “O kubiaen san girek mañau, muruan tubun geig ale wa! An̄ tamolpein mañau diñane san ki an banid lo apasi yau a. An̄ tamolpein a mañau san ab lo diladu wo ilod ibol dan sad dal afutani da, agod an̄sem ta aladu na ya.”

<sup>53</sup> Jesus aben an ibisei dugo Farisi in̄ kubiaen san girek mañau dida tiñaed tubun mi saian se ya. Ago man Jesus yau dugo Farisi adi sumiaek funfun lo dusue se ya, ago dugo aten dusue dop melmel wei mi niñedi wo in̄in̄en̄ dop dulon̄ o digane se ya. <sup>54</sup> Jesus ifurfi dop lo ru dupani wo malad digane se ya.

## 12

*Kagin sewak ak nin̄en o kagin agane wa*

*Mat 10:26-27; 16:6; Mak 8:15*

<sup>1</sup> Tamolpein wei kasik dutumanig, aben tia dugo nug tinin fo dutur se ya. Ago dugo Jesus imug megeloum ru kagin igo irupidai, “Farisi sad kagin sewak an nin̄en kagin agane wa. In̄ bale uraru tinadi, awad ru ibol dugup nuñon ta digane na da.

<sup>2</sup> Kagin fidian imianuk yen dan kuai isi wa. Kisaek ta imianuk yen san tia ya. <sup>3</sup> Ago yak niñen o ru ta tidom tubun lo anj anjñeñ dan ad lo tamolpein duloñ a. Ru dugon nug kududon lo kisikisik ab san galuñ imianuk an lo abol dan, malak malak lo dam duloñ a.

*Anut mi niñen o tarer a*

*Mat 10:28-31*

<sup>4</sup> “Turag muroug, ru ñurupaiañ da. Anj tamolpein tinim dufuni imat an niñen o arut amoi. Tinim mi ka dufuni imat a, ago gup nen dufuni san tia ya.

<sup>5</sup> Ñai tamol niñen o arer san ñurupaiañ da. Anut mi niñen o arer a. Inj tamol tinin ifuni imat pe ñutun dam ka ibal yai lo yau a. Awo, rumok ñurupaiañ da, inj mi niñen o arer a!”

<sup>6</sup> “Toea uraru nam kuseñ 5 didad da. Gug Anut kuseñ an kisaek ta ilon iñaonñ san tia ya. <sup>7</sup> Ago yak niñen o arer amoi. Man dugo, Anut anj o ilon isou da. Anut malan lo talpein san naon lak na geig, an kuseñ wei kasik sad dadenñ naon iriñani geig a. Rumok, nek anjanem gurmam roun sapita yan isutig ilonñ da.”

*Jesus yanñan malak malak apate wo ta arer na wa*

<sup>8</sup> “Ñai anj ñurupaiañ da. Talpein ta tamol naod na inj ñaisag ago ibol tap, ñai dam Anut san eñel naod na ñatur pe ñabol ak inj ñaisag a. <sup>9</sup> Ak man talpein ta tamol naod na inj ñaisag tia yak ago ibol tap, ñai dam Anut san eñel naod na inj ñaisag tia yak ago ñabol a. <sup>10</sup> Agod talpein ta inj Tamol Nanun niñen o ru saiak ibol dan, Anut aupasek an ka isuas yau a. Ak gug talpein ta inj Awan Urgun niñen o ru saiak



ibol dan, Anut talpein an san muruan ta isuas yau na wa.”

<sup>11</sup> “Saen dijilian pe Juda sad tumanek ab lo tamol tutubun naod na atur o, tia gabman gurman naod na atur dop, dugo won sem ibalgirana pe anjine an njene ilom ta weiwei na wa. <sup>12</sup> Saen nek an lo man Urgan in ru abol ilasa san an ikubiai pana a.”

*Njineo tamol a filian anda yan san ru fanan*

<sup>13</sup> Tamol ta tamolpein lulu ad lo Jesus irupeig ibol, “Girek manau, nai teig matu an rupeip, bai san filian an yabitip, anen anen atem misini wa.”

<sup>14</sup> Ago tag Jesus ru naon irupeig ibol, “O turag, enti nai an filiam njitarpale wo ipilianag i?” <sup>15</sup> Agog Jesus irupidai, “Kagin agane. An tamol sen ak san filian njene o malam ta isi na wa, kagin naok ago yan fidian njene o sen alasa wa. Man dugo, tamol san madok uyan man tan san filian lo ta yen na da.”

<sup>16</sup> Ago tag Jesus ru mitilaen en irupidaig ibol, “Filian tamol ta in tan munan uyanan ak lo ana ipaeg isa uyan a. <sup>17</sup> Agog insen kankan ago igane, ‘Nai darem\* fidian lo ana njidiri san ta idaisuda na ya. Ak njene o dugo njigane wak i?’ <sup>18</sup> Agog ibol, ‘Nai darem nusubaraip, foun tutubun ak nususe idu wa. Ante ana, melmel aenta njidiri wa. <sup>19</sup> Agop nai melmel uyan ak wei mi amag da wa. Anana wei mi yen da, an yaes nabal san idaisuda ya. Ago yak njene o nani naluk dop, seg malag njupare won dop njumado wa.’ ”

---

\* **12:17:** Badbad

<sup>20</sup> “Gug Anut ibol, ‘On n̄iŋeo! Gamu tidom dop on umat a. Ago dop enti on̄sa filia an in̄ane wak i?’ ”

<sup>21</sup> “Tamolpein ensauta a tan en lo in̄aned filian bageu san tubun mi dutumani wo dumat da, ago gug Anut malan lo man in̄ filiad tia ya, kagin nek ago mi in̄ lo ilasa wa.”

*Ilom weiwei amoi*

*Mat 6:25-34*

<sup>22</sup> Agog Jesus megeloum irupidai, “Ak niŋen o an̄sam madok niŋen o ilom ta muruan na wa. Mel ani wan niŋen o, mel aluk san agod biouŋ tinim san an niŋedi wo ilom ta muruan na wa. <sup>23</sup> Man dugo, anañ an mel tusan dugo n̄tumi an mel tubun a. Taida mi, biouŋ tinim san an mel tusan dugo tinimi mok an mel tubun a. <sup>24</sup> Anakanak niŋen kankan agane, in̄ anañ ta dupae na da, in̄ anañ disinip anañ ab lo ta dutumani na da, ak man Anut in̄aned anañ ipidinai da. Ak dugo, Anut malan lo anakanak mel tusan dugo an̄ mel tubun geig ak i? <sup>25</sup> Agod enti ta an̄ luluŋam lo, ilo wei lo iganep in̄san tan san madok san saen kitek an isupasi wak i? <sup>26</sup> Ago yak niŋen o mel nanun an agane san tia tap, ata wo melmel an aenta fidian niŋedi wo ilom weiwei dak i?”

<sup>27</sup> “Garaŋ san kakak dugo won̄ disa dak ilom isou a. Kakak an urat ta digane na dak, agod in̄aned biouŋ dam ta diwei na da. Ak man n̄ai n̄rupaian̄ da, gidad Solomon damag siŋaokan ak dupani bo man, in̄san leil man kakak an san leil igo tia ya. <sup>28</sup> Aria, Anut garaŋ san kakak san leil iganep siŋaokan ago dilasa dop, gidad gamu kumaedi dumado gup gabulop yai lo diabiau o

tap, o anj tamol ilo rumok amam tusan a, ak dugo, anj dam biouŋ tinim fo ta idiri na wak i? <sup>29</sup> Amaiak ninen o ilom muruan pe ‘ata tani wak i?’ tia, ‘ata taluk ak i?’ ago ta abol na wa. Ilom weiwei amoi. <sup>30</sup> Man dugo, tan en san tamolpein fidian mel an fidian abanjan diabi dutor da. Agod anjanem Tamami mel fidian a ninen o anj katukami dan ilonj fufei da. <sup>31</sup> Gug imug mi man, Anut san kagin panek an anjanem madok lo malan te mok agane tap, melmel en fidian dam anjane wa.”

*Anut san panu lo mel uyan ak ule san dal*

*Mat 6:19-21*

<sup>32</sup> “O n̄aisag sipsip malan wei tia yan, arer amoi. Anjanem Tamam injanen ilo uyan lo injanen kagin panek ipanaŋ a. <sup>33</sup> Ago yak ninen o anjanem filiami an adad yaup, moni anjanep, tamolpein a melmel ad tia yan abinawai. Dal an lo Anut urat naon injsiganen panu lo idirip, pempem yen a. Darir, gumagam tamol adi dida dusebari san tia ya. <sup>34</sup> Aben dugon lo anjam urat naon yen dan anjam ilo girek fidian dam nek atna mi yen a.”

*Kagin aganep amado*

*Mat 24:45-51; Mak 13:32-37*

<sup>35</sup> “Malam kumaen amado wa. Tinim akubunep, lam asulanip ided dop, tawanj aganep amado wa. <sup>36</sup> Urat pinein injaned tirnek tamol soubul lo yau ak imul o malan digane wa. Ago tap, injaned tirnek tamol imul ipalup, dalawan ititi dop ka dupasi kisaek onj a. Tamol nek ago alasap amado wa. <sup>37</sup> Pinein malad kumaen dumado dan inj o ru tia ya. Pinein an irupidaip, dumasi dop, injsen ananj ipidinai a. <sup>38</sup> Gidad, tidom lak boi, tia,

salso idu wo sumeik dugo ipalu tap, pinein malad kumaen dumado dan uyad isusa wa. <sup>39</sup> Gug an mel en ninjen o ilo sou agane. Ab taman in saen dugon lo gumagam tamol tidom lo ab igilep ilon lo iladu wan ilon tap, in ta yen na wa. Tia, tawan igane uyanan pe gumagam isadu san dal ifou wa. <sup>40</sup> Ago yak ninjen o an dam malam ipuk pe aban ale wa. Man dugo, saen an Tamol Nanun ipalu san an ta akubiani na dop, saen nek en lo in imul ipalu wa.”

*Urut tamol uyan ak, in saian ak da*

<sup>41</sup> Jesus ru ibol itout an Pita isumiani, “Tubun en. On ru en man mi rupaiama di? Tia, tamolpein fidian rupidai di?”

<sup>42</sup> Ago tag Tubun en ru naon igo irupe, “Ab taman ta in san urat pinein a manau amad da, agod awan diri dupani dan, kob ipidinaig an lo in in anen urat pinein aenta itirnai a, agod anan diani san saen ante mi anan ipidinai da. Ak dugo, an lulunam lo, enti in urat pinein naok igo yak i? <sup>43</sup> Saen ab muroun ipalup urat pinein an in san urat igane uyanan dan ile tap, in lo uyan a. <sup>44</sup> Nai rumok jurupaian da. Tamol tubun en in anen urat pinein emaiak kob ipanip, an lo in anen bioun fidian kaginad igane wa. <sup>45</sup> Ak man urat pinein an tamol saian tap, ilon lo igo ibol, ‘Naisag tamol tubun en ta ipalu kisaek on na da.’ An ninjen o fun iganep urat pinein aenta, tamol in pein da, ifu isusap, lukluk tamol dida anan diani dop, you sakar ak duluk o kagin naok ago igane wa. <sup>46</sup> Urat pinein an san gurman nal agod auwa dam ta ilon na dop ipalu wa. An lo dop tamol tubun en ipalu

saltik on pe urat pinein an ibaltiti idu wa. Ago dop awa parsisalek tamol adi luluᵇad lo iganep dida dumado wa.”

<sup>47</sup> “Urat pinein iᵇanen tubun ak ilon ilonᵇ gug ta iri ipani na tap, muruan tubun mi ile wa. <sup>48</sup> Gug ta iᵇanen tubun ak ilon ta ilonᵇ na dugo igane saian tap, tamol an bu kabelan mi iᵇane wa. Enti a Anut maᵇau tubun mi ipani dan, Anut isumiani dak, iᵇanen urat lo nuᵇon tubun mi dam igane wa. Agod enti a Anut binawek nen tubun mi ipani dan, nuᵇon dam nen tubun mi igane wo tinin igane pani da.”

*Jesus niᵇen o tamolpein tarpalek malan uraru  
Mat 10:34-36*

<sup>49</sup> Agog Jesus ibol, “ᵇai tan na yai ᵇigane wo ᵇupalu ya. An niᵇen o ᵇaisag ilog man yai an gubak mi ided la yak man uyanan a. <sup>50</sup> Gug muruan tubun ᵇisini wak naog na yen da. An niᵇen o ᵇaisag ilo muruan an yen dop yaup, muruan an itout a. <sup>51</sup> Ak dugo, ᵇai maror tan en lo ᵇigane ilasa san ᵇupalu yak ago ilom isou dak i? Tia geig a, ᵇai ᵇurupaianᵇ da, maror tia, tia, biatitek mi a. <sup>52</sup> Saen gamu en go yau dan, ᵇai o ab aenta lo tarpalek yen a. Nuᵇod kafenda tap, utol ᵇai aneg dudu wa, ago dop uraru ᵇai o ru sen dubol a. <sup>53</sup> Nanuk tamadi dumasap, nanud lo siai digane wa. Nanuk dam tamadi lo siai digane wa. Tinadi dumasap, nanud pein lo siai digane wa. Nanud pein dam tinadi lo siai digane wa. Nanuk iwod dumasap, nanuk tinad dida siai digane wa. Ago dop nanuk tinad dam raod lo siai digane wa.”

*Jesus san ager adi aban dugo dile dan dulon uyan san ta idaisuda na ya*

*Mat 16:2-3*

<sup>54</sup> Agog Jesus tamolpein malan tubun an fon irupidai, “Saen ad idu yau dak ate timtaen bilkas ale dop abol da, ‘Ui idu wa.’ Ago dop ui idu da.

<sup>55</sup> Saen tim tubun mi ifure dop, an alon, ad idu wa. Agop ad idu da. <sup>56</sup> An sewak tamol. An aban lak na yak ale dop fun alon da. Tan na dam aban ale dop, fun alon da. Ak man ata wo melmel gamu ilasa dan fun ta alon na dak i?”

*Ririan ru akubune wa*

*Mat 5:25-26*

<sup>57</sup> “An ata wo kagin itaot agane san dal ta akubiani fufei na di? <sup>58</sup> Tamol ta in on injilio kot lo au dop dal na on in da ririan ru akubune wa. Kabelan injiliop, bitinaek tamol naon na alasap ai katuk banid lo iginiop dusubano banau. <sup>59</sup> Nai jurupaio da. Dusubano dan lasa san tia geig. Mado nap onane muruan naon an ninen o, moni samukan fidian udad itout gup, lasa wa.”

## 13

*Tamol ilon ta ibilisa na dan, in ideg yau a*

<sup>1</sup> Saen an lo tamolpein dupalug Jesus durupe, “Juda tamolpein aenta Galili na dumado dan Jerusalem na tempel lo dupalug, Anut yai digane pani dugo gabman gurman, Pailat, tamolpein an ifu dumat dugo, insad dar tinid lo ilasa se yan mudan a yai digane dan da ikubuli a.” <sup>2</sup> Ago tag Jesus isumianai, “Ak dugo, in dal an lo dumat an ninen o an ilom lo abol, insad kagin saiak Galili tamolpein

aenta sad kagin saiak irinani ak ago abol di? <sup>3</sup> Tia geig. Gug naj nrupaian da. Ananem saian an fidian patum ta apani na wak an rumok tap, an dam nek ago mi adeg au a. <sup>4</sup> Dugo, tamolpein 18 Siloam na ab lak na geig an yau idug ifu dumat an, ilom lo insad kagin saiak an Jerusalem tamolpein aenta sad kagin saiak an irinani abol di? <sup>5</sup> Tia geig a. Gug naj nrupaian da. Ananem kagin saiak patum apani. Tia tap, an ago mi adeg au a.”

*Gurab nunon tia yak san ru fajan*

<sup>6</sup> Agog Jesus ru fajan en irupidai, “Tamol ta insan abi lo ai gurab ta ipae ya. Nal ta yaug, gurab patun aban ile tia tag, <sup>7</sup> insan abi titianek tamol irupe, ‘Nai anajar utol gurab an patun ta nile man tia ya. Ak ninen o tare. Etna itur dop, tan bulbal inanep itout banau.’ <sup>8</sup> Ak man abi titianek tamol irupe, ‘Tubun en. Gidad, umoi dop, anajar kisaek taida itur dop tile gup. Nai dabin tan nupanip afon tile wa. <sup>9</sup> Agop, anajar naod na yan nunon ifu uyan tap, itur a. Gug tia tap, titare wa.’ ”

*Jesus pein ta Sabat nal lo iganeg uyan a*

<sup>10</sup> Sabat nal ta Jesus Juda ubou ab ta lo ru ipitenanai se ya. <sup>11</sup> Saen an lo pein ta itaror on itor dak an dam imado ya. In gubak mi ur saian tinin lo iladug yen dugo subam an inaneg anajar 18 yau la ya. Saen fidian ifotsa san ta idaisuda na ya. <sup>12</sup> Jesus pein an ile tag iwagig, ipalug irupe, “Onane subam gamu nigane itout a.” <sup>13</sup> Ago dugo banin tinin fo iganeg, gamu nam ifotsag, Anut yan yan yabisa ya.

<sup>14</sup> Jesus Sabat nal lo pein an iganeg uyan ak ninen o, ubou ab an san titianek tamol tinan

saian. Ago tag in tamolpein ipidaig ibol, “Nal 6 an urat san. Ago yak ninen on enti saia tap nal 6 an ilon lo palup, ikubunio. Gug Sabat nal lo man tia ya.”

<sup>15</sup> Ago tag Tubun en tamolpein fidian ubou ab an lo yan ru naon igo irupidaig ibol, “An balem uraru tinami a! An Sabat nal lo, ananem makau boi, tia, donki kam burod lo yan apasip, anjal pe da aup you ta apidinai da. An ta rumok na i? <sup>16</sup> Nek ago mi, gamu pein en, Abraham malan kubulan, in ananar 18 Satan banin lo imado se ya. Dugo, nal gun en lo Satan banin lo tupasi tap, dugo ilom isou di? An saian ak i?”

<sup>17</sup> Insan ru naon an iganeg, tamol a fidian sumi-anek dupani an miai ifu ya. Gug tamolpein aenta man Jesus kulob funfun igane na yan ninen o ilod tubun mi uyan se ya.

*Ai patun kitiktikan san ru fanjan*

*Mat 13:31-32; Mak 4:30-32*

<sup>18</sup> Agog Jesus fon irupidai, “Anut san kagin panek man dugo won ak i? Nai ata mel lo tou niganewak i? <sup>19</sup> In ibol ai patun kitiktikan yanjan masted dubol dak on a. An tamol ta injanep, injanen abi lo ipaep, ipuk pe, isap, ai tubun ak on ilasa wa. Ago dop anakanak raen fo wur dufuni wa.”

*Yis san ru fanjan*

*Mat 13:33*

<sup>20</sup> Agog Jesus afon isumianai, “En ata mel nai Anut san kagin panek da tou niganewak i? <sup>21</sup> In ibol yis on. Pein ta yis injanep, plaua daeg tubun ak lo yan ida ikubulip, yen dop plaua ikafut yaup tubun a.”



*Dalawan ipipiani an  
Mat 7:13-14,21-23*

<sup>22</sup> Jesus Jerusalem na yau dugo, dal na panu tutubun ak, agod kitiktik ak dam lo, Anut san ru ipitejanai dugo yau se ya. <sup>23</sup> Ago dugo tamol ta Jesus isumianig ibol, “Tubun en, dugo, Anut tamol wei an tia patud ipasi wak i?”

<sup>24</sup> Ago tag Jesus irupidaig ibol, “Dalawan man ipipiani an. An dalawan ipipiani an lo aladu wo maeg agane wa. Man ata wo? Nai nurupaian da, tamolpein wei mok Anut san kagin panek aben lo diladu wo ilod ibol da, ago bo man diladu san tia ya. <sup>25</sup> Man dugo, ab taman dalawan ifutanip, an lo aenta asupakuk dop, patun fo atur a. Dalawan atitip, awagin a, ‘Tubun en, on dalawan pasi panama.’

“Gup in ru naon igo irupaian a, ‘An dugon te alasa yan nai ta nalon na ya.’

<sup>26</sup> “Ago dop arupeip abol a, ‘On man da sisem tani taluk na ya. Man sama panu lo dam pitejanama na ya.’

<sup>27</sup> “Ago gup irupaian, ‘Nai fon nurupaian da, an dugon te alasa yan nai ta nalon na ya. An aupasek tinami, sen alasa.’

<sup>28</sup> “Aben an ate an atata dop luomi agurmi wa, man dugo, Abraham, Aisak, Jekop, profet adi fidian dam Anut san kagin panek aben lo dumado dop eil a, ak man diabianan pe patun fo alasap amado wa. <sup>29</sup> Tamolpein wei kasik ad isuda dak lo, ad idiau dak lo, not lo, saut lo dam an fidian dususap, Anut san kagin panek aben lo diladup anan diani wo dumasip dumado wa. <sup>30</sup> Alon uyan, aenta gamu murna yan murnap dumug a, ago

dop aenta gamu malan te yan murnap murna geig dumado wa.”

*Jesus Jerusalem niŋen o itata ya*

*Mat 23:37-39*

<sup>31</sup> Saen an lo mi Farisi aenta dupalug, Jesus durupe, “Oŋ gidad, gamu aben en biseip sen lasa. Man dugo, Herod oŋ ifuno umat o ilon yen da.”

<sup>32</sup> Ago tag Jesus ru naon irupidai, “Aup, goun kasik an arupe, ‘Ŋai saen gamu, gabulo an man ur saiak saiak ŋukudai diau dop, tamolpein subam ad da yan ŋukubuniai a. Salsop ŋaisag urat wadan ŋufutani wa. <sup>33</sup> Ago yak niŋen ŋai gamu, gabulo, salso man turenŋ mi ŋabi wa. Man dugo, aben a ate profet ta dufuni imat an man Jerusalem mi a, an niŋen o panu sen ta lo dufuni imat banau.’ ”

<sup>34</sup> “O Jerusalem. Oŋ profet adi ufu dumat na ya. Anut tamol oŋsa na iginiai dupalu dan dam pat nam ufu da. Nal wei kasik ibol kurek ta nanun subarin paen na kagin ipidinai dak ago mi ŋai kagin ŋupanaŋ o ŋigane gug aŋ ŋai amoi a! <sup>35</sup> Ago yak niŋen o Anut aŋsam tempel ibiseig kawan yen da. Agod ŋai ŋurupaiaŋ da, aŋ ŋai fon ta aliag na dop yaup aŋ saen iŋo abol, ‘Tamol e Anut yaŋan lo ipalu den Anut anen bar tinin lo yen da.’ ”

## 14

*Jesus tamol ta tinin ikafut ak ikubune ya*

<sup>1</sup> Sabat nal ta lo Jesus Farisi gurman ta san ab lo anaŋ yani wo yau a. Inŋ fidian Jesus kulob dugo igane dop dile wo malad ti ibol go leil dupanig lo ru dupani san ago digane se ya. <sup>2</sup> Agog tamol ta ŋien banin ikafut ak Jesus siniren na ipalu ya.

<sup>3</sup> Jesus tamol an ile tag kubiaen san girek manau, in Farisi dida isumianai, “Idsad kubiaen dugo ibol ak i? Sabat nal lo subam adi ka tukubunia ai ak i? Tia yak i?” <sup>4</sup> Ak man in fidian ru ta dubol man tia ya. Ago tag Jesus tamol an inane ikubuneg itout go idinig yau a.

<sup>5</sup> Agog Jesus fon isumianai, “An luluam lo tamol ta nanun boi, tia, in san makau boi, you san gib lo idu yau tap, mel en Sabat nal lo ilasa yan ninen o, ririan yaup irae isudap inane wak i?” <sup>6</sup> Ak man ta kisaek ru naon ipei man tia ya.

<sup>7</sup> Jesus Farisi an san ab lo imado dugo, tamolpein dupalug kapal malan te yak atem dumasi wo digane dugo yil. Ago tag ru fanan en ibol, <sup>8</sup> “Tamol ta nug nane san soubul lo igiop wau tap, imug mi kapal malan te yak fo masi umoi. Kabelan tamol ta on irinano yak dam iwagip ipalu banau. <sup>9</sup> Agop soubul taman an ipalup irupaio, ‘On gidad masa dop, in aben en lo imasi wa.’ Agop on miai tubun mi ifuno dop, masap waup, kapal wadan na yan fo masi wa. <sup>10</sup> Tia. Saen tamol ta soubul lo igio tap, waup, imug mi gidad kapal wadan na yan fo masi wa. Ago dop soubul taman onsa na ipalup, irupaio igo ibol, ‘Turag, on masap palup aben uyan en lo masi wa.’ Ago tap on tamolpein dumado dan malad lo on yan ama da wa. <sup>11</sup> Man dugo, tamol ta in sen yabisa dan, Anut in yabi idup tamol yan t ia yak imado wa. Agod ta in sen yabi idu dan Anut in yabisap yan anda imado wa.”

<sup>12</sup> Agog Jesus soubul taman irupe i, “Saen soubul gane tap, onane tura, murou, ab susumeik, filiad anda yak mi giai umoi. Man dugo, in murna dop

soubul naon digane panop, an lo inaned gubun dupano wa. <sup>13</sup> Tia, saen on anan ta wabi wo tap, bigabeg adi, dutor san tia yan, a njedi tubabunan, agod malad tia an dam, gidad soubul lo giaip dupalu wa. <sup>14</sup> Ago tap on bar uyan ama da wa. Man dugo, in naon fon on dupano san tia ya. Gug mitep saen tamol itaot adi kumaen dumasa dop, Anut kulob a gane yan naon ipano wa.”

*Soubul tubun ak san ru fanan*

*Mat 22:1-10*

<sup>15</sup> Agog tamol ta in dam ante anan diani ak ru an ilon tag Jesus irupeig ibol, “Talpein in mitep Anut san kagin panek aben lo soubul tubun an lo dumado yan bar inaneg imado da.”

<sup>16</sup> Ago tag Jesus tamol an irupeig ibol, “Tamol ta in soubul tubun ak iganeg, tamolpein wei mok dupalu wo igiai a. <sup>17</sup> Murnag biabi fidian itout dugo inanen urat pinein idinig yaug, tamolpein igiai an irupidai, ‘Apalu, biabi fidian itout la ya.’ <sup>18</sup> Agog anen anen fun diganeg soubul lo ta diau na wan ninen o urat pinein an durupeig a. Tamol malan malan an ibol, ‘Nai tan kilaken ta nidad ak njaup njile wa. An ninen o gidad, nai ilo isou umoi.’ <sup>19</sup> Tinin te yan ibol, ‘Nai urat san makau 10 nidad a. An lo njaup njibitinaia o da. Ulon de? Gidad, nai ilo isou umoi.’ <sup>20</sup> Ago dugo neinta dam ibol, ‘Nai nor na geig pein njane ya. Ago yan lo nai gamu njausan tia ya.’ ”

<sup>21</sup> “Ago tag urat pinein an fon imul yaug ru fidian inanen tubun an naon na ibol. Insan tubun en ru an ilon go tinan saian tag, urat tamol an fon idini dugo igo irupeig ibol, ‘Ririan waup, panu ilon

lo saiak saiak adi, bigabeg adi, njed banid imat, malad tia yak, an unjal pe dadi apalu.’ ”

<sup>22</sup> “Agog urat pinein an imul ipalug ibol, ‘Onjane ru ubol an ago mi njigane ya. Tamol njajal ak gug aben aenta wei mi kawan dien da.’ ”

<sup>23</sup> “Ago tag tamol tubun an urat pinein afon idini dugo irupeig ibol, ‘Waup, dal garan lo, abi dal lo tamolpein man sodudunaip unjal pe dida apalu wa. Agop njaisag ab awan isa wa.’ <sup>24</sup> Njai njurupaio da, tamol a malmalan njigai ak gug inj dumoi an, njaisag ananj en awad kitek isue ile san tia ya.”

### *Jesus ganuri san muruan*

#### *Mat 10:37-38*

<sup>25</sup> Tamolpein wei kasik Jesus njien fo diau dugo idanj sag irupidai, <sup>26</sup> “Talpein ta naji iganurag o da, ak gug inj tinan, taman, iwon nanun, tein muroun, lun muroun fidian ta patun ipidinai na dop, injsen o kankan igane tap, talpein naok an njaisag megeloum ilasa san tia ya. <sup>27</sup> Ta injsinanen aigim isinip, njieg aban ta iri na tap, inj njaisag megeloum onj ilasa san ta idaisuda na ya.

<sup>28</sup> “Tamol ta inj ab lak na nujon yabi wo imat tap, inj imasip, ilon igire wa. Bor sapita isue wak, agod moni sapita ibiseip ab an yabi itout an ilon isou uyan gup, ab an yabi wa. <sup>29</sup> Gug ago ta igane na tap, ab tubun an fun mi igane gup ta yabi itout na wa. Ago dop aenta ab an dile dop, kukok an diganep <sup>30</sup> dubol a, ‘Tamol en urat fun igane gug igane itout san ta idaisuda na ya.’

<sup>31</sup> “Nek ago mi kinj ta yaup, tan sen ak ta san kinj da nug dufuni wo tap, inj imasap ilon igire uyanan a, man dugo, injsan yu tamol 10 tausen mi,

gug neinta san man 20 tausen. Ak dugo, inſan 10 tausen neinta san 20 tausen dirinſanai san idaisuda yak i? Ilon ago igire wa. <sup>32</sup> Aria, inſ ta idaisuda na tap, tamol idinaip diaup, kinſ neinta an dal na mi ida ru dukubunep, ilod kisaek, agop nug ta dufuni na wa. <sup>33</sup> Nek ago mi, talpein ta inſ nſai iganurag o imat tap, tan en san filian fidian patun ipani gup, inſ nſai iganurag a. Tia tap, nſaisag megeloum ilasa san tia ya.

*Beig san ru faſan*

*Mat 5:13; Mak 9:50*

<sup>34</sup> “Beig man mel uyan a. Gug saen inſan bulbal an itout dan dal ta lo fon tiganep, bulbal san tia ya. Inſan urat dam fidian itout a. <sup>35</sup> Ago dop tibiliau da. Tamol oſ kududo ama da tap, ru an uloſ uyanan a.”

## 15

*Sipsip ideg yau ak san ru faſan*

*Mat 18:12-14*

<sup>1</sup> Nal ta takis nſilaſal adi inſ aupasek tamol adi dida Jesus san ru duloſ o dususa ya. <sup>2</sup> Agog Farisi adi, inſ kubiaenſ san girek maſau dida Jesus patun fo disidag dubol, “Tamol an aupasek adi dida nug turan diganeg dida anaſ kisaek mi diani da.”

<sup>3</sup> Ago tag Jesus ru faſan en ibol irupidai, <sup>4</sup> “Tamol ta inſan sipsip 100 gug luloſad lo kisaek ideg yau tap, an ninen o dugo igane wak i? Inſ sipsip 99 an itumanaip dumado dop yaup, kisaek an abanaſ yabip itor nap ile mok a. <sup>5</sup> Saen sipsip an ile dan ilon uyanan pe, inſanep paon fo ibili isudap, isinip, panu na yau a. <sup>6</sup> Agop inſanen turan muroun, ab

susumeik an igiaip dupalup, agop irupidai, ‘Nai ilog tubun mi uyan da. Man dugo, naisag sipsip kisaek ideg yau gug fon n̄ile ya. Ak niñen o apalup yousai tigane.’ <sup>7</sup> Nek ago mi lak na Anut san eñel adi dam tamol ta Anut san kagin imoi ak fon ibileksa dop, iñ o ilod tubun mi uyan da. Ak man 99 a itaot la yak dubol go dumado dan iñ o eñel adi uyasusai ta digane na da.

*Moni patun ideg yau ak san ru fañan*

<sup>8</sup> “Nek ago mi pein ta iñ moni patun 10 gug kisaek ideg yau dop niñen o dugo igane wak i? Iñ lam ibanip, ab ilon irianip, abañ yabip yau na gup ile wa. <sup>9</sup> Saen ile dan turan muroun, agod ab susumeik an igiaip, dutumanip, irupidai, ‘Moni patun a ideg yau an fon n̄ile ak niñen o ilog tubun mi uyanan a. Ago yak niñen añ n̄ai da sisem ilod uyanan a.’ <sup>10</sup> Nai añ n̄urupaian da, nek ago mi Bai Anut san eñel adi aupasek tamol ta kisaek ilon ibilisa tap, an niñen o ago mi uyad tubun mi isusa wa.”

*Taman ta nanun ideg yau ak san ru fañan*

<sup>11</sup> Jesus ru awan ibateg ibol, “Tamol ta nanun uraru a. <sup>12</sup> Nanun bakan an taman irupeig ibol, ‘Bai, oñane filia n̄ai teig da wabitip n̄aineg n̄utug gamu en panag.’ Ago tag taman iñanen filian an yabitig nanun uraru mi anen anen ipidinai a.

<sup>13</sup> “Murnag nanuk bakan ak iñanen filian an idad yaug, san moni an isinig panu ta asau ak lo yau. Atna uyasusai kagin lo moni isini an isuwari yau. <sup>14</sup> Iñ melmel fidian isini an igane itout a, ago gug kadag tubun ak tan an lo idu ya. Ak man tinin lo melmel an fidian itout go muruan tubun mi isini

se ya. <sup>15</sup> Ago tag yaug, panu an san tamol ta san na urat igane wo isumiani. Tamol an yabig idinig yaug bor sad ar lo inanen bor kaginad igane dugo imado se ya. <sup>16</sup> Ago dop bor sad anan samsamun ta yani wo yaes isofutani gug talpein ta mel yani san ta ipani man tia ya.

<sup>17</sup> “Saen tinin imadan man, ilon ipastig ilon lo igo ibol, ‘Nai tamag san urat pinein bo in anan idaisuda mi diani dugo dumado da. Ak man nai ente kadag ibiag dugo mater nile wo sumeik da!’ <sup>18</sup> Nai nmasap bai san na njaup njabol a: O bai, nai on Anut da naom na njigane saian a. <sup>19</sup> Ago yan lo nai on nanu ubol san ninen o nai ta idaisuda na ya. An ninen o nai onsa urat pinein luluᅇad lo onsa urat pinein kisaek ago giniag pe njilasa wa.’ <sup>20</sup> Agog imasag, imul go taman san na yau a.

“Asau mi ipalu dugo taman malan yaug ile ya. Agog inanen nanun ilon imuᅇani saian geig tag, imaspalug yaug, nanun yabig musuk ipanig ida ditata se ya.

<sup>21</sup> Agog nanun irupeig ibol, ‘O bai, nai on Anut da naom na njigane saian a. Ago yan lo nai on nanu ubol san ninen o ta idaisuda na ya.’

<sup>22</sup> “Gug inanen taman urat pinein idinaig ibol, ‘Ririan aup, kulos milaen siᅇaokan an ananep asini apalup, agane pani. Ariy dam tuon lo agane. Sendal dam adiri pani. <sup>23</sup> Agod aup, makau nanun tinin italbusi uyan an afuni. Agop id anan tabip tani dop, ilod uyan dop mugurun tigane wa. <sup>24</sup> Man dugo, nai nanug en imat njabol ak gug gamu afon kumaen imado da. Gubak mi ideg yau njabol



ak gug gamu afon n̄ileg n̄injane ya.’ Agog mugurun tubun ak fun digane ya.

<sup>25</sup> “Agog nanuk matu an abi lo itor nag imul ipalug, ab sumeik ipani dugo in̄ sad uyasusai an liliñan ilon̄ a. <sup>26</sup> Ago tag urat pinein ta iwagig isumiani, ‘An ata digane daki?’ <sup>27</sup> Agog urat pinein an ru naon irupei, ‘On̄ tei itor ak gamu ipalu ya. Muruan ta ile man tia yak niñen o an̄ tamam makau nanun tinin italbusi uyan an ifuni a.’

<sup>28</sup> “Nanuk matu an ago ilon̄ go tiñaen saian tag ab ilon lo iladu san imoi a. Ago tag taman ilasag in̄janen nanun matu ak ab lo iladu wo ilon in̄jane wo igane se ya. <sup>29</sup> Ak man nanun an taman irupei, ‘Anan̄ar wei kasik n̄jai on̄sa urat pinein igo won̄ urat n̄jigane na ya. Agod n̄jai on̄ awa kitek n̄jiparsisali man tia ya. Ak gug on̄ sipsip nanun ta, n̄jaineg turag muroug dida uyama isusa wo panag man tia ya. <sup>30</sup> Gug on̄ nanu an on̄sa filia pani an jeit pein adi tinid lo ibidani dugo itor nag, gamu imul an, on̄ makau nanun tinin italbusig uyan an in̄ niñen o funi a.’

<sup>31</sup> “Ago tag taman ibol, ‘Nanug, on̄ n̄jai da nal pempem tumado da. Agod n̄jasag mel fidian man on̄sa. <sup>32</sup> Ak man gidad gamu ilod uyan dop mugurun̄ tigane wa. Man dugo, on̄ tei en̄ imat n̄abol gug, gamu fon imado da. In̄ ideg yau gug fon imul ipalu ya.’ ”

## 16

*Titianek tamol kankan anda yak san ru fañan*

<sup>1</sup> Jesus inʒanen megeloum irupidai, “Filian tamol ta inʒ urat titianek tamol aman da ya. Agog tamol aenta dupalug, filian tamol an durupei, ‘Onsa titianek tamol an onʒane filia ibidani da.’ <sup>2</sup> Ago tag iwagig isumiani, ‘Nai onʒ niʒe wo ru tim nʒalonʒ a. Onʒ dugo gane dak i? Onʒ masip, urat gane yan girep panag dop urat bisei. Onʒ afon urat titianek tamol mado san tia ya.’

<sup>3</sup> “Agog titianek tamol ilon igireg ibol, ‘Naisag tubun en gamu nʒaisag urat lo ikudag o da. Dugo nʒigane wak i? Nai tan nʒitare san dabai amag tia. Agod nʒai nʒagod o dam miai ifunag da. <sup>4</sup> Ak man dugo nʒigane wan gamu nʒalonʒ a. Ago tap mitep urat lo ikudag dop, turag muroug wei mi duyunʒanag dop inʒsad ab lo digiag pe nʒau a.’

<sup>5</sup> “Ago tag inʒ tamolpein fidian a inʒsan gurman san na gubun digane yan kisaek kisaek mi igiai a. Tamol malmalan an isumiani, ‘Onʒ nʒaisag gurman an tinin lo gubun sapita gane yak i?’

<sup>6</sup> “Agog ru naon irupei, ‘Wan handet dram oliv gurenʒ.’

“Ago tag titianek tamol an ibol, ‘Ririan masip, wan handet suas pe fifti mi gire.’

<sup>7</sup> “Agog neinta isumiani, ‘Onʒ gubun sapita gane yak i?’

“Agog ibol, ‘Wan tausen bek wit.’

“Ago ibol tag irupei, ‘Masip, girek an suas pe 8 handet gire.’

<sup>8</sup> “Aria, inʒsan gurman kulob a igane yan san ru ilonʒ go ipitiani a, man dugo, urat titianek tamol an kankan anda ya. Tan en san tamolpein siganed madok an kagin dupani uyanan san niʒen

o kankan ad da ya, agod inşad kankan an, tamolpein a ilalaŋ san an sad kankan iriŋani da. <sup>9</sup> Nai ŋurupaiaŋ da. Anşam moni nam tamolpein abinawai. Agop an lo inŋ aŋ turam dilasa wa. An lo dop saen anşam moni biabi aman tia man, kumaen panu lo aladup ante tamolpein an duyunaŋaŋ pe malam dupare wa.

<sup>10</sup> “Talpein enti mel nanun ak lo kagin uyan an mi igane dan, mel tubun ak lo dam ago mi igane wa. Nek ago mi, talpein enti mel kititik lo iræk tap, mel tutubun ak lo dam ago mi igane wa. <sup>11</sup> Ago yak niŋen o, oŋ tan en san filian o raek kagin gane yak ago tap, saen kumaen panu san filian mok a diwae dan, oŋ niŋe wo ilod isou wak i? Tia geig, oŋ bani kawan mado wa. <sup>12</sup> Agod tan en lo oŋ tamol sen ak san filian kagin pani wo bani lo digane yak gug, oŋ kagin an ta gane uyan na yak ago tap, oŋane filia kumaen panu lo yan bani lo diganep kagin pani wak i? Tia geig a.

<sup>13</sup> “Tamol ta inŋ gurman uraru an mi nal kisaek lo mi awad yabi san tia ya. Inŋ ago igane wo igane tap, inŋ kisaek o lian niŋen o imat dop, turan ile saian a. Tia dop, kisaek o lian ilon ipani dop, turan patun ipani wa. Nek ago mi oŋ Anut moni da sisem uri san tia ya.”

<sup>14</sup> Farisi adi ru an fidian duloŋ go Jesus kukok an digane dugo nao futek ru tinin lo digane se ya. Man dugo, moni niŋen o tubun mi dumat a. <sup>15</sup> Agog Jesus irupidaig ibol, “Anŋ tamolpein malad lo sem itulaŋ da, ak gug Anut ananem ilom ilon uyanan da. Mel a tamol malad lo naon lak na geig ak anda yan, nek mel an Anut malan lo iganan

geig ak ibol da.”

*Pitejanek subujan taida*

*Mat 11:12-13; Mat 5:31-32; Mak 10:11-12*

<sup>16</sup> “Moses san kubiaen inj profet adi sad ru da yen go ipalug Jon san lo ya. Saen an log ipalug gamu saen en lo man, Anut san kagin panek aben san ru dufulale da. Ago dugo tamolpein wei kasik Anut san kagin panek aben ilon lo diladu wo wagai digane da. <sup>17</sup> Keit tan da ditout diau san man pasauman geig a, ak gug girek kitekan san boi ta Moses san kubiaen lo yan ideg yau san ta pasauman na ya. Rumok, ideg yau san tia geig a.

<sup>18</sup> “Tamol ta inj iwon ikudip pein foun ak injane tap, jeit igane da. Ago dop tamol sen ta pein a iwon ikudi an injane tap, inj dam jeit igane da.

*Filian tamol inj Lasarus da*

<sup>19</sup> “Tamol ta inj filian anda yak pempem bioun sisinjaok ak mi idirip imado se ya. Anan dam uyan uyan ak mi yani se ya Inj mel ta lo katukan man tia ya. <sup>20</sup> Ago dugo bigabeg tamol ta yanjan Lasarus dam imado. Inj tinin baob yafutani a. <sup>21</sup> Pempem disini diaug, filian tamol an san ab naon na dibilisig, imado dugo anan samsamuk filian tamol san badim fo yan idu dan yani wo ilon tubun mi ibol se ya. Ago dugo goun dupalug, injsan baob an dipile se ya.

<sup>22</sup> “Tamol uraru an ago digane yau nag, bigabeg tamol an imat go, Anut san enel dijaneg diaug, Abraham giranjen na digane ya. Agog filian tamol an dam imat go disare ya. <sup>23</sup> Inj Ades lo imado dugo, madai tubun mok ifuni se ya. Agog malan isudag, asau mi Lasarus Abraham giranjen

na imado dugo ile ya. <sup>24</sup> Ago tag filian tamol Abraham iwagig go ibol, ‘Bai Abraham, ilo imunjanag. Lasarus dinip, banin kikoun you lo isaminip, isini ipalup baleg fo iganep ibubarum. Man dugo, ηai yai en lo madai tubun mi ηisini dugo ηisagai da.’

<sup>25</sup> “Ago tag Abraham ru naon irupei, ‘Nanug, ilo isou. Saen on tan na kumae mado dugo, on onsa mel uyan uyan ak ηane na ya, ago dugo Lasarus mel saian saian ak mi inane na ya. Gug gamu in ilon pasa ibol dugo on madai tubun geig ak sini da. <sup>26</sup> An mi tia, Anut on ηai da titiηaem dog kuror ak iganeg yen da. An lo tamolpein etna dumado dan dog an dupilalip onsa na diau san tia ya, nek ago mi tamolpein a on dida amado dan dog an dupilalip ηaisag na dupalu san dam tia ya.’

<sup>27</sup> “Ago tag filian tamol an ru naon irupeig ibol, ‘Mago tap, Lasarus dinip, ηai tamag san ab lo yaup, <sup>28</sup> teig 5 ante dumado dan ru kagin irupidai a. Kabelan in dam aben ente tamolpein madai tubun geig dile wan ate dupalu banau.’

<sup>29</sup> “Ak man Abraham ru naon irupeig igo ibol, ‘Tia. On tei murou man in Moses san kubiaen, agod profet adi sad ru ka dusuti wa, an in o idaisuda ya. Ru an ka dulong dop kagin digane wa.’

<sup>30</sup> “Agog filian tamol an ibol, ‘Tia. Bai Abraham, an man ta idaisuda na ya. Ulon, tamol ta imat ak fon kumaen imasap yaup, ηai teig muroug an irupidai tap, an lo ilod ibilisa wa.’

<sup>31</sup> “Ak man Abraham irupeig ibol, ‘In Moses profet dida sad awad ta diabi na yak tap, gidad tamol ta materη lo yak fon imasa dap, ilod injanep

ilod ibilisa wo ru kagin irupidai bo man, inj awan ta diabi na wa.’ ”

## 17

*Aupasek kagin, ilo rumok kagin, agod awabek kagin*

*Mat 18:6-7,21-22; Mak 9:42*

<sup>1</sup> Agog Jesus inanen megeloum irupidaig ibol, “Kubianek funfun ilasa wa, dilasa san dal tufutani san tia ya. Gug tamol enti inj turan ta naon iraep, kagin saian lo idu tap, inj muruan tubun mi ile wa.

<sup>2</sup> Gidad, inj pat tinan ta buron lo disisi idup, beig lo dibili idup isarir o man uyanan mok a. An tia tap, muruan nen tubun geig ak ile wa. <sup>3</sup> Ago yak ninen o kagin agane, sem tinim atirni uyanan a!

“Onj tei ta onj lo aupasek igane tap, kududon wabi. Agop ibileksa tap, inanen aupasek an pare idu pani. <sup>4</sup> Gidad, ad kisaek ilon lo saen 7 onj lo igane saian gug saen anen anen lo mi imul go, nao na ilon ibileksa yak ibol da, an ago tap, saen nek an lo mi inanen muruan an pare idu wa.”

<sup>5</sup> Agog aposel adi Tubun en durupei, “Mañsama ilo rumok an ganep dabai.”

<sup>6</sup> Ago tag ru naon irupidaig ibol, “Masted patun man kitiktik an gug isap ai tubun ak ilasa da. Ago yak ninen o anñsam ilo rumok masted patun igo wonj tap, gidad ai e leil apani den tubun a, ago bo man ka arupei, ‘Onj se ibilanop, waup, beig lo udup utur,’ ago dop awam yabi wa.

<sup>7</sup> “Anj luluñam lo tamol ta kisaek san urat pinein abi lo itor boi, tia, sipsip ititianai boi, ab lo imul ipalu dop, inj imug o mi anañ yani wo ta irupei na wa. <sup>8</sup> Tia, inanen tubun ak san anañ imug

ikubunep ipanip, yani gup, murna dop injsinanen ananj yani wa. <sup>9</sup> Urat pinein ago igane dop, injsan tubun an ilo uyan ru ta irupei na wa. Tia. Man dugo, urat pinein an injanen tubun ak idini ak fom igane da. <sup>10</sup> Anj dam nek ago mi a. Saen anj urat fidian naj anj nupananj an aganep itout dop abol, 'Manj urat pinein kawan a. Manjanema tamol tubun ak mi awan mabi da, mel ta per panek minjane san ta migane na da.' "

*Jesus lepra tamol 10 ikubuniaia a*

<sup>11</sup> Jesus Jerusalem na yau dugo dal a iri dan Sameria in Galili da dien dugo titinjaem yau a. <sup>12</sup> Panu ta ate iladu dugo, tamol 10 lepra amad da yak dal na dile ya. Inj kitek asau mi dutur dugo, <sup>13</sup> duwagin, "Jesus, Tubun ak, ilo imujanama."

<sup>14</sup> Jesus yil tag irupidai, "Aup, tinim Juda sad pris adi akubiaip dile." Agog dal na diau dugo tinidi afon ilasa uyanan da ya. <sup>15</sup> Inj lulujad lo tamol ta kisaek in tinin ago ile tag, idansag imul Jesus san na yau dugo, awan tubun mi Anut yanjan yabisa se ya. <sup>16</sup> Agog yang Jesus naon na turun isaluwig, ilo uyan ipani a. Tamol an Sameria tamol. <sup>17</sup> Jesus ago ile tag ibol, "Tamol 10 nukubuniaig uyadi an, kisaek imul a, ago dugo, 9 an dugon te diau ak i? <sup>18</sup> Ata wo tamol nukubuniaig uyad isusa yan, Anut per dupani wo ta dumul dupalu na dugo, nek tamol gol en mi imul ak i?" <sup>19</sup> Agog Jesus tamol an irupei, "Masap wau. Onjane ilo rumok ikubunio ya."

*Dal dugon lo Anut san kagin panek ipalu wa  
Mat 24:23-28,37-41; Mak 13:14-23*

<sup>20</sup> Farisi aenta Jesus dusumiani, “Sanjeptap Anut san kagin panek ipalu wak i?” Ago tag Jesus ru naon irupidai, “Anut san kagin panek ipalu dan, an talpein ta ile ilon na wa, man dugo, kob ta injsan kagin panek sumeik ipalu dan san an imug ta ilasap ale na wa. <sup>21</sup> Talpein ta imasap igo ta ibol na wa, ‘Anut san kagin panek ente ya.’ Tia, ‘Anut san kagin panek onte ya.’ Man dugo, Anut san kagin panek an luluᅇam lo yen da.”

<sup>22</sup> Agog Jesus megeloum irupidai, “Murnap an Tamol Nanun kitek ale wo ilom ibol ak gup ale san tia wa. <sup>23</sup> Aenta durupaian, ‘Tamol Nanun obo ya.’ Tia, ‘In ebe ya.’ Gug injsad ru an ilom lo rumok pe aban an abi amoi. <sup>24</sup> Saen Tamol Nanun imul dan, injsan leil man nek ibol weil irakulawi dan, san lilaman aben o ad ilasa dak atep, aben o ad idiau dak ate yau dak igo won a. <sup>25</sup> Gug malmalan muruan wei mi isinip saen e lo tumado den san tamolpein patud dupani gup.

<sup>26</sup> “Kagin a Noa san saen lo tamolpein digane se yan, kagin nek amaiak mi Tamol Nanun imul san saen lo dam digane yau a. <sup>27</sup> Saen lom tubun ak ta ilasa na dugo, in anan diani dugo, you dam duluk dugo, nug diᅇane dugo, pein njedi dupidinai dugo, yaug saen Noa wog tubun ak lo iladu ya. Agog lom tubun ak ilasag tamolpein an fidian daon ipidinai a.

<sup>28</sup> “Lot san saen lo dam ago mi digane se ya. Tamolpein diani duluk on dugo, didad diᅇane on, ab diabi on, anan dupae on dugo dumado se ya. <sup>29</sup> Ak gug nal nek a lo Lot Sodom ibisei an, keit lo yak yai pat salfa ided dak da idug Sodom adi fidian ifu dumat a.



<sup>30</sup> “Tamol Nanun kuai isi wo dop nek ago mi digane wa. <sup>31</sup> Saen an lo dop tamol ta ab patun fo itor ak imul ab ilon lo iladup, inanen biounj isini wo ta igane na wa. Nek ago mi, tamol ta abi lo yak fon imul pe, ab lo yaup mel ta inane wo ta igane na wa. <sup>32</sup> Lot iwon igane yak ilom isou. <sup>33</sup> Talpein ta inſen tinin o mi ilon isou tap, ideg yau a. Gug talpein ta siganen madok tan en lo ibisei dan, ta ideg yau na wa, tia, kumaen imado wa. <sup>34</sup> Nai nŕurupaian da. Nal an lo, tidom pe talpein uraru galun kisaek lo dien a, gug kisaek Tubun en inane dop, kisaek yen a. <sup>35</sup> Nek ago mi pein uraru sisem urat digane wa. Gamu nam kisaek inane dop, kisaek imado wa. <sup>36</sup> Nek ago mi tamol uraru abi lo dutor a. Kisaek inane dop, kisaek imado wa.”

<sup>37</sup> Ru an dulon go Jesus san megeloum dusumi-ani, “Tubun en. Kulob en dugot na ilasa wak i?”

Agog Jesus ru naon irupidai, “Aben ate tubabun yen dan, antem bog dutumani wa.”

## 18

### *Gudaneƙ san ru faŋan*

<sup>1</sup> Jesus megeloum dugudani on dop dumado wa, ago dop ilod ta isali na wo ru faŋan ta irupidai a.

<sup>2</sup> In ibol, “Panu ta lo tulek tamol ta imado dugo Anut niŋen o ta irer na da. Tamol dam niŋedi wo ta irut na da. <sup>3</sup> Aria, pein suos ak ta panu an lo imado ya. In pempem tulek tamol an san na yaup, in ibinawip, inanen ager kot lo digane wo iduduwig, ibol: “Tamol ta nai iginiag saian. Agog kot lo nŋigane wo dak niŋen o on nai binawag.”

4 “Gug tulek tamol an saen kitek milaen mi pein suos an awan yabi an imoi. Agog yau na gug ilon lo ibol, ‘Rumok, ηai Anut, in tamolpein dam ninedi wo ta ηarut na da. 5 Gug suos en ηai aeg itog on dak ninen o gidad inanen kot lo ηubinawi wa. Tia tap, igo igane on dop, ηai tuog imad a.’ ”

6 Agog Jesus ru awan ibateg ibol, “Ru a tulek tamol saian ak ibol an alon pe apupi ale wa. 7 An ilom dugo isou dak i? Ak dugo, Anut san pilianek tamolpein a tidom ad duwagin dugo ibinawai o dusumiani dan, ibinawai o saen milaen imoi ak i? 8 ηai ηurupaian da. In ririan ibinawaip inaned muruan ikubune wa. An lo in talpein a muruan an ipidinai an naon ipani wa. Ak man dugo, saen Tamol Nanun imul dop, tan en lo ilo rumok adi wei mi yil ak i?”

### *Farisi in takis ηilanjat tamol da sad ru fanan*

9 Jesus afon ru fanan ta, tamolpein ensauta a in sed mi itaot dubol, sed yanad diabisa dugo tamolpein aenta metmet warou dubol dan igo ibol go irupidai, 10 “Tamol uraru dugudani wo Juda sad ubou ab tubun ak lo diau a. Kisaek man Farisi. Neinta man takis ηilanjat tamol. 11 Farisi an imasag in sen ninen o mi ilon lo igo igudani se ya, ‘O Anut, ilog uyan da. Man dugo, ηai tamol aenta digane saian dan ago tia ya. ηai takis ηilanjat tamol igo tia ya. ηai ilosek ag tia. ηai ta ηiraek na da. ηai jeit ta ηabi na da. ηai tamol nunog mi a. 12 Ubou kisaek ilon lo nal uraru anan geg ηiganep ηugudani da. Filiag an fidian ηutumanip, malan 10 gup, malan kisaek ηupano da.’ ”

<sup>13</sup> “Gug takis njanjal tamol man, sen iparyanig, itakok go naon yabisag lak na aban ile man irer. Inanen aupasek ninen o ilon muruan go sen titiren ifunig ibol, ‘O Anut, njai aupasek tamol. Ak ninen o ilo imuñanag.’”

<sup>14</sup> “Njai nrupaian da. Anut malan lo man takis njanjal tamol en mi tamol itaot an. Ak gug Farisi man Anut malan lo ta itaot na ya. Man dugo, tamol ta inſen yañan yabisa tap, Anut in yabi idu wa. Gug talpein a inſen yabi idu dan, Anut in yabisa wa.”

*Jesus nanuk kitiktik igiaig inſan na dupalu ya  
Mat 19:13-15; Mak 10:13-16*

<sup>15</sup> Tamolpein aenta nanuk kitiktik diñal go Jesus banin lo didirai o dupalu se ya. Agog megeloum adi dil tag ru dabai nam dupudai a. <sup>16</sup> Ak man Jesus nanuk kitiktik igiaig, inſan na dupalug ibol, “Nanuk kitiktik akudai amoi. Abisawaip, njaſag na dupalu. Man dugo, Anut san kagin panek man tamolpein ilod nanuk igo yak sadi a. <sup>17</sup> Njai rumok nrupaian da. Talpein gidad Anut san kagin panek nanuk nanun igo woñ inſane wa. Tia dop, inſan kagin panek lo iladu san tia geig a.”

*Filian tamol ta  
Mat 19:16-30; Mak 10:17-31*

<sup>18</sup> Juda tamol gurman ta Jesus isumiani, “Girek mañau uyanan en. Njai dugo njanep kumaen pem san njanane wak i?”

<sup>19</sup> Ago tag Jesus ru naon irupeig igo isumiani, “Ata wo njai uyag ubol dak i? Talpein ta uyan man tia ya, nek Anut mi inſen kisaek uyan a. <sup>20</sup> On kubiaen fidian ulon; tamol sen ak iwon ugam pe ida jeit ta agane na wak, tamol ta funi imat na wak,

gumagam ta gane na wak, kot lo supalek ru ta ubol na wak, tina tama awad paen na mado wa.”

<sup>21</sup> Agog tamol an ibol, “Njai nanuk log ipalug gamu en, kubiaen an fidian njuri njupani na ya.”

<sup>22</sup> Jesus ru an ilonj tag irupei, “Onj mel kisaek lo mi katuk ama ya. Onsa filia fidian udad yau dop, moni an njanep, bigabeg adi pidinai a. Ago tap onj Anut san kumaen panu lo filia ama da wa. Ago gane gup, njai njieg abag uri wa.”

<sup>23</sup> Tamol ru an ilonj man ilon tubun mi muruan. Man dugo, inj filian tamol tubun geig a.

<sup>24</sup> Jesus tamol an leil ipani dugo ibol, “Tamol filian anda man Anut san kagin panek lo iladu san man muruan geig a. <sup>25</sup> Alonj ak, tamol filian anda yak Anut san kagin panek aben lo ka iladu wan, rumok tap, aria, kamel dam si gubaran lo yau san man pasauman geig a.”

<sup>26</sup> Tamolpein a Jesus ru ibol dugo dulonj dan dusumiani, “Mago tap, ensauta mok mi Anut patud ipasip, kumaen pempem yen dan dijnane wak i?”

<sup>27</sup> Ago tag Jesus ibol, “Mel a tamol digane san tia yan, Anut igane san ilonj a.”

<sup>28</sup> Agog Pita ibol, “Manj onj njie aban muri wo manjanema ab, panu agod mel fidian mubusei a.”

<sup>29</sup> Ago tag Jesus igo ibol go irupidai, “Njai rumok njurupaianj da. Talpein ta Anut san kagin panek ninjen o injanen ab, iwon nanun, tein taon, agod tinan taman ibisawai tap, <sup>30</sup> saen e gamu yen dan lo Anut naon uyan a ipani wan tubun kasik a. Agod saen foun ak a murnap ilasa wan lo kumaen pempem yen dan injane wa.”

*Jesus ijanen matej ninen o ibol utol a  
Mat 20:17-19; Mak 10:32-34*

<sup>31</sup> Jesus megeloum 12 an iñal go gigin na diaug, ago ibol irupidai, “Jerusalem na tau da. Ru fidian a profet adi gubak mi Tamol Nanun ninen o digire yan nuñon ilasa wa. <sup>32</sup> Inj gob adi banid lo digane wa. Agop kukok an diganep, naon dufute dupei dop, tinin fo dulusu isudap, rasau nam dufuni nap, aigim fo dubalip imat a. <sup>33</sup> Ago digane wak man, nal utol itout gup, Anut ifufunip afon kumaen imasa da wa.”

<sup>34</sup> Gug ijanen megeloum ru a ibol an fun ta duloñ na ya. Ru an fun mok mianuk lo yen. Ago dugo Jesus ata ninen o ibol an fun mok diñaon a.

*Jesus tamol malan itau ak ikubune ya  
Mat 20:29-34; Mak 10:46-52*

<sup>35</sup> Jesus Jeriko sumeik ipani dugo, tamol ta malan itau ak dal gigin te igod dugo imado. <sup>36</sup> Saen tamolpein diriñani dugo sad liliñan ilon man, isumianai, “An ata mel ilasa dak i?”

<sup>37</sup> Ago dugo durupeï, “Jesus, Nasaret tamol, amaiak yau da.”

<sup>38</sup> Ago tag tamol an iwagin, “O Jesus, Dawid Nanun, ilo imuñanag!”

<sup>39</sup> Agog tamolpein a Jesus naon na imug diau dan dububunag durupeï, “Awa itaup tokubol pe mado!” Ago tag tamol an nen maeg nam iwagin dugo isasai, “O Dawid Nanun, ilo imuñanag!”

<sup>40</sup> Ago tag Jesus ipartuanig mala itau an diñane dupalu wo irupidai. Saen tamol an siñiren na ipalu man, Jesus isumiani, <sup>41</sup> “Dugo ñginio wo ilo ibol di?”

“O Tubun en, ñai abañ ñile wo ilog ibol da.”

<sup>42</sup> Ago tag Jesus ibol, “Abaŋ ule. Oŋane ilo rumok ikubunio ya.” <sup>43</sup> Ago ibol dugo tamol an aban ile kisaek oŋ a. Agog Jesus nien aban iri dugo Anut yaŋan yabisag yau a. Saen tamolpein an fidian ago dile man, in dam Anut yaŋan diabisa ya.

## 19

### *Jesus in Sakias da*

<sup>1</sup> Jesus Jeriko taun ilon lo iladug yau dugo, <sup>2</sup> takis niŋaŋal tamol gurman ta filian anda yak ante imado. In yaŋan Sakias. <sup>3</sup> Tamol an Jesus naon tinin ile wo yaes tubun mi ifuni. In tamol katukan, agod tamolpein wei kasik an lo in Jesus ile san tia ya. <sup>4</sup> Ago tag imaspalug, inug yaug ai gurab ta yaŋan sikamor dubol dan isag, Jesus ile wo malan idu dugo imado, man dugo, Jesus dal an irig ipalu se ya.

<sup>5</sup> Saen Jesus ai an fun na ilasa man, malan isudag Sakias ile tag irupe, “Sakias, ririan udu. Nai gamu oŋ da oŋsa ab lo tumado wa.” <sup>6</sup> Ago tag Sakias ririan idug ilon uyan isag Jesus malan ipareg, inaneŋ inŋsan ab lo diau.

<sup>7</sup> Tamolpein ago dile yan fidian ilod saian go fun diganeŋ duŋurŋur go dubol, “In aupasek tamol san ab lo ida diau a.”

<sup>8</sup> Ak man ab log Sakias imasag Tubun en irupe, “Tubun en, ulon. Naisag filiag niŋarpalep, wadan tamolpein mel ad tia yak niŋupidinai a. Taida mi, tamol niŋirawai dugo sad na ŋagam na yan, inaneŋ melmel ŋagam na yan naon ago mi niŋutumanip, malan iwoiwo niŋupidinai a.”

<sup>9</sup> Ago tag Jesus ibol, “Gamu ab en san muroun Anut san patu pasek inane ya. Man dugo, tamol en

dam Abraham malan kubulan ta. <sup>10</sup> Tamol Nanun tamolpein dideg diau la yan abanad ilep patud ipasip injal o ipalu ya.”

*Moni san ru fañan*

*Mat 25:14-30*

<sup>11</sup> Jesus Jerusalem sumeik ipani dugo, tamolpein ilod lo Anut san kagin panek kuai isi wo sumeik ago dubol. Jesus inşad kiñ ilasa wo dak ilod isou se ya, ak man in kiñ ilasa wak san saen gamugo an niñen o ru fañan en ibol irupidai, <sup>12</sup> “Tamol ta yañan anda yak kiñ ilasa wo panu asau ak lo yau. Oñte in kiñ digane gup fon imul pe sen naon na ipalu wa. <sup>13</sup> Yau o dugo inñanen urat pinein 10 igiaig dupalug, 20 kina anen anen ipidinai dugo irupidai, ‘Moni en añanep urat apani yau dop ñai ñamul a.’

<sup>14</sup> “Gug tamolpein a murnap inşan kagin panek paen na dumado wan, in dile saian go dumado ya. Ago yak niñen o tamol an yau dugo patun fo ru digane yaug dubol, ‘Mañ tamol en mañsama kiñ ilasa wo man mamoi a.’

<sup>15</sup> “Ago bo man tamol an kiñ ilasa ya, agog fon imul inşinanen na yau. Gamu nam urat pinein a moni ipidinai an igiaig naon na dupalu ya. Moni subunjan taidam sapita diñane yan ilon o isumi-anai.

<sup>16</sup> “Urat pinein a malmalan ipalu yan ibol, ‘Tubun en, on ñai 20 kina panag an lo didaen urat ñiganeg, onane 200 kina subunjan taidam ñiñane ya.’

<sup>17</sup> “Kiñ an irupeig ibol, ‘On urat tamol uyanan mok a, onane urat kagin pani uyanan a. On biabi kitik e bani lo ñigane emaiak kagin pani uyanan

a, amaiak niñen o taun 10 bani lo ñidiri da, gamu inşad tirnek tamol lasa wa.'

<sup>18</sup> "Agog urat pinein neinta ipalug ibol, 'Tubun en, oñ ñai 20 kina panag an lo didaen urat ñiganeg, oñane 100 kina subuñan taidam ñiñane ya.'

<sup>19</sup> "Agog inñanen tamol tubun en pinein an irupeig ibol, 'Oñ taun 5 bani lo ñidiri da, gamu inşad tirnek tamol lasa wa.'

<sup>20</sup> "Agog pinein tinin te ipalug ibol, 'Tubun en, oñane 20 kina ebo ya. Ñai yamel kilaken lo ñuminamig yen a. <sup>21</sup> Ñai oñ o ñarer. Man dugo, oñ tamol silei a. Oñ abi san urat tamol sad silali naon ñane da.'

<sup>22</sup> "Ago tag ru naon irupeig ibol, 'Oñ urat pinein saia geig a. Ñai oñsigane ru ubol an nam ñukubianop ñile wa. Oñ uloñ ak, ñai abi san urat tamol sad silali naon ñiñane da. <sup>23</sup> Fun an niñen o ñaineg moni an moni ab san urat tamol pani ak man, in ka urat ipani wa, an lo saen ñai ñamul dop moni an san tim an da ñiñane wa. Ata wo oñ ago ta gane na yak i?'

<sup>24</sup> "Agog kiñ an idañsag tamol a siñiren na dutur dan irupidai, 'Tamol en san na 20 kina añanep urat pinein a 200 kina aman da yan apani.'

<sup>25</sup> "Agog tamol a ru an duloñ an durupeï, 'Tubun en, tamol an moni idaisuda mi yabi da, 200 kina aman da la ya!'

<sup>26</sup> "Ak gug kiñ an ru naon igo ibol go irupidai, 'Talpein enti in da yan, ñai suguan taidam ñupanip an lo in idaisuda wa. Ak man, enti in tinin lo tia agod, gidad in kitek da bo man, inşan melmel an banin lo dupasi itout a. <sup>27</sup> Aria, ñaisag ager adi ensauta a ñai inşad kiñ ñilasa san o dumoi an, añal dida apalup, ñai naog na afup dumat a.' "



*Jesus kin igo won Jerusalem na iladu ya  
Mat 21:1-11; Mak 11:1-11; Jon 12:12-19*

<sup>28</sup> Jesus ru an ibol itout go imug Jerusalem na yau. <sup>29</sup> Did Oliv fo itor go panu uraru yanjadi Betfage in Betani da sumeik dugo, inanen megeloum nunod urarum idinaig naon na dumug diau a. Ago dugo ru kagin igo irupidai, <sup>30</sup> “An nunom urarum panu o tile dan ante au a. Aup donki nanun ta dususeg itur dak ante ale wa, talpein ta gubak mi fufo imasi man tia ya. Donki nanun an kam apasip ananep n̄aisag na apalu. <sup>31</sup> Tamol ta ru aman da dop, an igo arupe, ‘Tubun ak urat ipani wo da.’ ”

<sup>32</sup> Agog diaug melmel fidian Jesus ibol ago mi dile ya. <sup>33</sup> Saen donki nanun an san kam dusupasi dugo, muroun ipalug isumianai, “Ata wo donki nanun en apasi dak i?”

<sup>34</sup> Ago dugo ru naon durupe, “Tubun ak urat ipani wo da.”

<sup>35</sup> Agog donki nanun an dijaneg, Jesus san na dupalu ya. Agog donki nanun an patun fufo kulos duruwarig, Jesus dubunawig fo isudag imasig diau a. <sup>36</sup> Jesus dal na yau dugo tamolpein malan tubun geig an in̄siganed kulos milae milae ak dupasi dugo dal te duruwari se ya.

<sup>37</sup> Saen Jesus Jerusalem sumeik ipani dugo Did Oliv fo dal nok idu an lo inanen megeloum malan tubun, fun diganeg yousai lo Anut yanjan diabisa dugo mugurun̄ dupani se ya. Man dugo, in̄ kulob girager wei kasik a Jesus gubak mi igane se yan dile ya. <sup>38</sup> In̄ igo dubol, “Kin e Anut yanjan lo ipalu den bar inane ya!

Kumaen panu na maror yen. O Anut per lak na geig ak per mupano da!”

<sup>39</sup> Agog tamolpein an lulunad lo Farisi aenta dutor dan ru an dulon dugu dumasa saian go Jesus dupei, “Girek manau, onsa megeloum pidaip awad itau!”

<sup>40</sup> Gug Jesus ru naon igo irupidai, “Nai nurupaian da. In dutokubol san tia ya. In awad itau tap, pat e dien dan naod dijanep per dupanag a!”

*Jesus Jerusalem niĵen o itata ya*

<sup>41</sup> Saen Jesus Jerusalem sumeik ipanig ile man, ilon tubun mi muruan go malan turon idug, <sup>42</sup> igo ibol, “On saen en lo mi maror san dal ulon ak man, muruan a onsa na ipalu dan ta ilasa na wa. Ak man gamu dal an imianuk go on ule san tia ya.

<sup>43</sup> Onsa saen ipalu wa. Ager adi dubuluwop on girane ananae mi lo dupalup, tan dufutip onsa sep giranen na dutumanip lo diladu san dal digane wa. Gigin fidian lo dupalup dubuluwop dupino wa.

<sup>44</sup> In dufunop daon dupano wa, agod tamolpein a onsa sep ilon lo dumado dan dufu yaup fidian dumat a. Onsa pat ta kisaek o lian pat sen ak tinin fufo na ta yen na wa, tia, onsa pat fidian dugufututep diabibol tan na dudu wa. Fun dugu, on saen a ate Anut nai tinig lo onsa na ipalu yan ta ule ulon na ya.”

*Jesus tempel lo daden tamol irubai a*

*Mat 21:12-17; Mak 11:15-19; Jon 2:13-22*

<sup>45</sup> Jesus tempel san ar ilon lo iladug, aben ante didaen tamol fidian ikudaig patun fo dilasa ya.

<sup>46</sup> In igo ipidai, “Anut san buk lo ru en digire ya, ‘Naineĵ ab man gudanek san ago dubol a,’ ak man

añ agane ilasag ‘gumagam adi sad mianuk ab’ igo agane da.”

<sup>47</sup> Nal fidian Jesus tempel san ar lo iladug tamolpein mañau ipiteñanai se ya. Ago dugo pris gurman adi, kubiaen san girek mañau, agod tamolpein sad gurman dufuni imat o dal abañ diabi wo digane se ya. <sup>48</sup> Ak man in dufuni imat san dal ta dile man tia ya. Man dugo, tamolpein fidian inñsan ru dulon o tubun mi dumat. Inñsan ru samukan ta iriñanai san man dumoi.

## 20

*Jesus san urat niñen o dusumiani a*

*Mat 21:23-27; Mak 11:27-33*

<sup>1</sup> Nal ta Jesus tempel lo tamolpein naod na Anut san ru ifulale dugo mañau ipiteñanai se ya. Agog pris gurman adi, kubiaen san girek mañau, agod matu gurman aenta dida dupalug Jesus dusumianig dubol, <sup>2</sup> “On rupaiama. On enti san dabai lo melmel en gane dak i? Enti mok dabai en ipanog ate urat en gane dak i?”

<sup>3</sup> In ru naon igo irupidai, “Ñai dam mel ta niñen o ñsumianañ o da. Arupaiag, <sup>4</sup> Jon san suguek man, dugon te kagin an inane yak i? An kumaen panu san mel, tia, tamol sad mi ak i?”

<sup>5</sup> Agog inñsed nug lo igo diñiñen se ya. “En kumaen panu san mel, ago tabol tap, in igo ibol isumianad a, ‘En ata wo añ in niñen o ilom ta rumok na yak i?’ <sup>6</sup> Ak gug ‘En man tamol sad mel mi a,’ ago tabol tap, tamolpein malan tubun en pat nam dufunad a. Man dugo, inñsad ilo sou lo man Jon mi in profet, ago dubol da.”

<sup>7</sup> Ago yak niñen o Jesus ru naon durupeig dubol, “Enti mok dabai an ipani an man ta malon na ya.”

<sup>8</sup> Ago tag Jesus ibol, “Ago yak niñen o ñai dam enti mok dabai en ipanag go ate melmel e ñigane den, ta ñurupaian na wa.”

*Abi san kagin panek adi sad ru fanjan*

*Mat 21:33-46; Mak 12:1-12*

<sup>9</sup> Agog Jesus awan ibateg tamolpein ru fanjan en irupidai, “Tamol ta abi yabig lo ai wain patun ipae. Agog tamol an inñsan fun panu ibiseig asau mi yau o tag, abi an tamol sen ak ta banid lo kagin dupani wo igane ya. Agog panu ibiseig yaug saen milaen mok itor na ya. <sup>10</sup> Agog saen wain nuñon disini wo dugo, abi taman inñsan urat pinein ta inñsinan panu fun lo idinig yaug, inñanen ñutun dupanip isini ipalu wo ibol. Ak man abi titianek adi inñsan urat pinein dufunig banin kawan didinig imul yau. <sup>11</sup> Ago tag urat pinein sen ta idinig yau. Agog urat pinein an dam dufunig isudag miai dupani nag banin kawan didinig imul yau. <sup>12</sup> Ago tag afon urat pinein ta idinig yau, gug urat pinein an dam madai dupanig dubal abi patun fo ilasa ya.

<sup>13</sup> “Ago tag abi taman igo ibol, ‘Dugo ñigane wak i? Gidad ñaisiganeg nanug mok niñen o tubun mi ñamat dan ñidinip yau a. Nap inñ awan diabi ak boi.’

<sup>14</sup> “Ak man saen abi titianek adi inñanen nanun dile tag dubol, ‘An abi taman amaiak nanun ak niñen tufuni imat dop, inñsan furan id tinjane wa!’

<sup>15</sup> Ago tag diabig, ar patun fo dubal ilasag, dufunig imat a.

“Ago yan lo abi taman an, titianek tamol adi an dugo mok iginiaia ak i? <sup>16</sup> Abi taman sen yaup

tamol an ifu dumat dop, abi an tamol sen ak banid lo iganep kagin dupani wa.”

Tamolpein a ru an dulon an dubol, “Ago tia!”

<sup>17</sup> Agog Jesus malan ti ibol go tamolpein an leil ipidinai dugo isumianai, “Ru e Anut san buk lo digire en fun dugo won ak i?”

‘Pat nek a ab bek tamol adi dumoi dan,  
nek amaiak ab tinin fidian yabi sakar da.’

<sup>18</sup> Talpein ta in pat en fo na yau idu dop man, sen ifuni ititale wa. Ak gug talpein ta pat en kabunan fufo idu tap, ifufari idu wa.”

<sup>19</sup> Saen pris tutubu agod Farisi adi, Jesus ru fanan a ibol se yan dulon man, Jesus ririan diabi wo maeg diganeg dal aban dile se ya. Man dugo, in dulon uyanan ak Jesus inanen ru lo in isiai se ya. Ak man tamolpein malan tubun ak ninedi wo direr a, an lo ta diabi na ya.

### *Kaisa san takis nilanjal*

*Mat 22:15-22; Mak 12:13-17*

<sup>20</sup> Ago tag in nal fidian Jesus leil dupani uyanan se ya. In leil tamol ta didinaig Jesus san na dupalu. In tamol nunon manon, ak gug Jesus san ru lo diabi wo malad digane se ya. In nudun dusuep sumianek dupanip, ru ta ibol saian dop gabman banin lo digane wo dal an digane. <sup>21</sup> Agog leil tamol an Jesus dusumiani, “Girek manau, man malon, onsa ru ubol dugo pitenanama dan fidian rumok a. On tamol yanad anda yak ninedi wo ta urut na da. Tia, on Anut san dal mi tamolpein fidian manau pitenanai da. Gidad yanad da yak, agod yanad tia yak dam mi a. <sup>22</sup> Ak dugo, Kaisa

takis moni tupani wan uyan ak i? Tia, saian ak i? Onj dugo ilo isou dak i?”

<sup>23</sup> Gug Jesus in dirawi wo digane dan ilonj tag irupidai, <sup>24</sup> “Moni patun ta akubiaip njile gup. Mitilaen agod yanak e fufo digire yan enti san ak i?”

<sup>25</sup> Agog in dubol, “Kaisa san.”

An ninen o irupidai, “Mago tap, mel a Kaisa san an Kaisa apani. Agod mel a Anut san an Anut apani.”

<sup>26</sup> Inj malak malak mel ta lo dirawi dop diabi san tia ya. Insan ru naon ago dulonj go durut saian tag awad itau.

*Sadyusi Jesus diabi wo bitinaek lo digane ya  
Mat 22:23-33; Mak 12:18-27*

<sup>27</sup> Sadyusi aenta Jesus san na dupalu. (Insad ilo rumok lo ago dubol da: Tamolpein dumat dop, fon njitud kumaen dumasa san tia ya.) <sup>28</sup> Inj Jesus ago dusumiani, “Girek manjau, Moses wagam mi kubiaenj igo igire panad a, ‘Tamol ta inj iwon da gug nanuk ad tia dumado yau nap, tamol ak imat. Ago tap tamol an tein bakan ak fon pein an injanep, tein matu an insan nanuk idirsi wa.’ <sup>29</sup> Aria, id lulunjad lo tamol ta inj nanun 7. Matu ak pein injane gug nanuk ad tia dumado dugo tamol an imat. <sup>30</sup> Ago tag tein bakan an fon tein san pein an injane gug tamol an dam imat. <sup>31</sup> Tein a tinin te yan dam nek ago mi a. Agog tamol 7 an tet mi nanuk tiag, dumat pasik. <sup>32</sup> Murnag pein an dam imat. Tamol 7 an ago mi tet mi pein kisaek an mi dijaney ya. <sup>33</sup> Ak ninen o, dugo, mitep saen tamolpein fidian dumat an kumaed dumasa dop, pein an tamol dugon mi ida dumado wak i?”

<sup>34</sup> Ago tag Jesus ru naon irupidai, “Pein tamol saen en san nug diñane da, agod tamol adi ñiedi dupidinai da. <sup>35</sup> Ak gug tamolpein ensauta a Anut malan lo saen murna san ak lo diladu san, agod mateñ lo fon kumaen dumasa san, iñ idaisuda yan, aben ante nug ta diñane na wa, ago dop tamol adi pein ñiedi ta dupidinai na wa. <sup>36</sup> Iñ ibol enjel adi oñ, an lo fon dumat san tia ya. Iñ Anut nanun muroun. Man dugo, iñ mateñ log fon kumaen dumasag dumado da. <sup>37</sup> Moses dam kuai tem ikubiai panañ, tamolpein a dumat an fon kumaen dumasa da wa. Man ata wo? Ai nanunan yai inani an san sai lo, Moses Anut niñen o igo ibol, ‘Abraham, Aisak, Jakob sad Anut.’ <sup>38</sup> Anut man iñ tamol a mateñ lo dumado dan sad Anut tia ya. Tia, iñ man tamol kumaed dumado dak sadi a. Man ata wo? Iñ malan lo tamolpein fidian kumaed dumado da.”

<sup>39</sup> Ago dugo kubiaen san girek mañau aenta Jesus ibol ago duloñ go durupeig dubol, “Ru naon uyanan mok, girek mañau!” <sup>40</sup> An lo gug Jesus sumiaen subuñan taidam dusumiani wan niñen o direr se ya.

*Kristus iñ enti nanun ak i?*

*Mat 22:41-46; Mak 12:35-37*

<sup>41</sup> Agog Jesus isumianai, “En dugo won go tamolpein Kristus iñ Dawid nanun dubol dak i?”

<sup>42</sup> Dawid iñsen Isrel bar san buk lo igo ibol,

‘Tubun en ñaisag Tubun ak igo irupeï,

“Oñ ñai tuog won ak ate masip yaup,

<sup>43</sup> murna gup ñai oñsa ager adi ñidiraip,

on nje pae na dumado dop nje nam partuanai a.”  
 44 Dawid inſen mi in Tubun ak ago ibol tap, en dugo won pe in Dawid nanun ak i?”

*Kubiaen san girek manau sad aupasek*

*Mat 23:1-36; Mak 12:38-40; Luk 11:37-54*

45 Tamolpein fidian dulon dugo, Jesus inſan megeloum ru kagin igo irupidaig ibol, 46 “Kubiaen san girek manau ninedi wo kagin agane. In kulos milmilae ak didiri duman, tamol dil o digane da. Didaen aben lo tamolpein ‘adian’ dupidinai ak ninen o tubun mi dumat da. In ubou ab lo kalik malan te yak ninen o dumat da, agod soubul lo dam nek ago mi a. 47 In pein suos sad ab digam da, agod gudanek milaen kasik, tamolpein diliai o digane da. Amaiak ninen o tamol naok ago yan naon a dijane wan nen tubun mi ilasa wa.”

## 21

*Pein suos san lou panek tusan*

*Mak 12:41-44*

1 Jesus tempel lo imado dugo malan yaug, tamol filiad anda yak tempel ilon lo kolekta san kunup lo moni digane dugo yil a. 2 Agog pein suos bioun tia yak in dam ipalug pat bras uraru mi kunup lo ibal a. Moni an naon man tusan mok. 3 Ago tag Jesus ibol, “Nai rumok nrupaian da. Pein suos an moni kolekta igane yan kolekta a tamol filiad anda yak digane yan fidian irinanai a. 4 Man dugo, fidian in filiad anda yak gug kabelan mi kolekta digane dugo inaned fidian mi yen da. Gug pein suos an sen aben ipitig fidian kolekta lo igane ya.”



*Saen e lo tumado den itout san kob  
Mat 24:1-14; Mak 13:1-13*

<sup>5</sup> Inanen megeloum aenta tempel san pat uyan uyan ak, agod melmel Anut lou dupani na yan nam damag dupani an ninen o diñinjen tag Jesus ibol, <sup>6</sup> “Mel fidian ale dan man, saen ipalu dop, lo pat ta pat sen ta tinin fufo ta yen na wa. Tempel san pat fidian dugufututep diabibol tan na dudu wa.”

<sup>7</sup> Ago tag dusumiani, “Girek manau, saen dugon lo dop mel an ilasa wak i? Mitep ata kob mile dop ate malon ak saen an ipalu wo sumeik di?”

<sup>8</sup> In ru naon irupidaig ibol, “An kagin agane. In an dirawan banau. Man dugo, mitep tamol wei mok nai yanag lo dupalup dubol, ‘Nai tamol nek ama ya,’ ago dop dam dubol, ‘Saen a ate ipalu wan sumeik ipanad da.’ Ago dop in sad sewak an ta ari na wa. <sup>9</sup> An yu ager alon ak, agod ru tim yu ager sensen yau on an dam alon a. An arer amoi. Man dugo, mel naok an imug ilasa wa, ak gug nal wadan san saen man gamugo da.”

<sup>10</sup> Go in afon ru ibateg ibol, “Tamol malan ta yu diabisa dop, tamol malan ta yu naon in sad na digane imul a. Ago dop kin ta in san tamolpein dida yu diabisap, kin sen ak ta inanen tamolpein dida nug dufuni wa. <sup>11</sup> Aben sensen lo man, kanaurig tutubu yak wei mi ilasa dop, kadag tubun mi idu wa. Subam tubun mi aben sensen lo ilasa wa. Ago dop kulob arer san wei mi dilasap, keit lo kob tutubu yak dilasa dop diganep arer a.

<sup>12</sup> “Ak man melmel an fidian gamugo ilasa dop, nai ninjeg o an dibian pe, madai in muruan da dupanan a. Nai yanag o Juda sad ubou ab lo Juda

gurman adi naod na diñilianj aup, kot dupananj dop subanek ab lo diginianj a. Kinj inj gabman gurman aenta naod na dam kot lo atur a. <sup>13</sup> Saen an lo dop inaned naod na anjanem ilo rumok naj lo abol ilasa wa. <sup>14</sup> Saen gamugo naod na alasa dop, ata ru arupidaip an lo sem ipirananj san ninen o ilom ta weiwei na wa. <sup>15</sup> Man dugo, naj an ru abol san kankan milaen ak njanananj a. An lo dop anjam ager adi inj ru abol an inj naon dubol san tia wa, ago dop inj dam an awam lo dupirgini san tia wa. <sup>16</sup> Tinam tamam, teim taom, anjanem dar, agod turam muroum dam ager adi banid lo diginianj pe, an aenta dufunanj amat a. <sup>17</sup> Tamolpein fidian naj yanag o an dilianj saian dop an lo siai digane wa. <sup>18</sup> Ak gug gurmam roun ta kisaek ideg yau san tia ya. <sup>19</sup> Tia, an atur dabai dop muruan fidian asini dan lo mi, kumaen pempem yen yau san anjane wa.”

*Mitep Jerusalem daonj dupani wa  
Mat 24:15-21; Mak 13:14-19*

<sup>20</sup> “Mitep yu tamol adi dutumanip Jerusalem ditiliani dop eil a. Ago ale dop alonj ak, Jerusalem daonj dupani san saen sumeik da. <sup>21</sup> Saen an lo dop, tamolpein Judea na dumado dan disol pe, diaup, did luluñad lo sed imianai a. Ago dop, tamolpein a Jerusalem ilon lo dumado dan ririan patun fo dilasap dusol diau a, agod a Jerusalem patun fo dumado dan inj afon ilon lo ta mok diladu na wa. <sup>22</sup> Man dugo, nal nek an lo, Anut Jerusalem tamolpein sad aupasek naon ipidinai a. An lo dop ai wadan a Anut san buk lo digire yan fidian nunon ilasa wa. <sup>23</sup> O kabel, nal en san pein luam anda

yak, agod an pein ananem nanuk su apidinai dan dam, naj ilog tubun mi imuñanañ da! Muruan tubun geig tan en lo ilasa dop, tamolpein ente dumado den Anut san tiñae mumarek dile wa. <sup>24</sup> Aenta ager adi sabiri nam dufu dumat a. Aenta inñsad ager adi diñal pe, subanek tamol dilasap tan asau mi sensen lo diaup ante dumado wa. Agop gob adi Jerusalem diñanep dipartitale dop yaup nal a lo gob adi sad saen itout san nal an idaisuda wa.

*Jesus imul san nal*

*Mat 24:29-31; Mak 13:24-27*

<sup>25</sup> “Saen wadan sumeik dop, ad, kalam, patui lo kob funfun ilasa wa. Tan na tamolpein fidian tubun kasik direr dop ilod weiwei a. Man dugo, beig ibalsini dop tamun dam san liliñan tubun kasik a. <sup>26</sup> Tamolpein fidian ata mel mok tan en lo ilasa wo sumeik dan niñen o yaes tubun mi ifu dop, tinid irer dop, rirek lo malad itilianip dudu wa. Man dugo, Anut mel fidian keit lo yak imiriranai a. <sup>27</sup> Saen an lo dop, inñ fidian Tamol Nanun keit lo timtaen titiñae kuai te ilasa dop, dabai agod girager tubun geig ak da ipalu dan, dile wa. <sup>28</sup> Saen melmel an ago fun diganep dilasa dop, amasap mala nouk lo malam lak na isuda wa. Man dugo, Anut inñilianñ san saen sumeik mok ipalu da.”

*Gurab san ru fañan*

*Mat 24:32-35; Mak 13:28-31*

<sup>29</sup> Agog Jesus ru fañan en irupidai, <sup>30</sup> “Ai gurab inñ ai aenta dam ilom isou. Saen ai roud wagam ak idu dop, foun ak ifurñani dan ale dop, alonñ

ak, ui san saen sumeik a. <sup>31</sup> Nek ago mi melmel an dilasap eil dop alon ak, Anut san kagin panek ipalu o da.

<sup>32</sup> “Nai rumok nurupaian da, warou gamu en san tamolpein gamugo itout yau dop melmel en fidian dilasa wa. <sup>33</sup> Rumok geig, keit in tan da murnap itout a, ak gug njasag ru man ta itout na wa.

<sup>34</sup> “Ago yak ninen o kagin agane! Tamol Nanun ipalu wak san nal ta alon na ya. Ak ninen o soubul san kankan tubun mi agane amoi. You sakar ak tubun mi aluk amoi. Agod tan en san mala bulbal lo mi amado amoi. Kabelan anjon dop nal an idu kisaek on banau. <sup>35</sup> Nal an tamolpein a fidian tan tilianek aten fo dumado dan lo ilasa wa, in dijon dop nal an idu wa, ago dop nal an san muruan ninen o disol diau san tia ya. <sup>36</sup> Ago yak ninen o an pempem nal an atitiani dop aban ale wo uyanan a. Ago dop an pempem Anut agudani dop lo, muruan a fidian dilasa wan ninen o ka asol aup, Tamol Nanun naon na atur a.”

<sup>37</sup> Nal anen anen atem Jesus tempel san ar ilon lo tamolpein manau ipitenanai se ya, agog gurai idug bubun a Did Oliv dubol dan fo yaug ante njon yabi se ya. <sup>38</sup> Tamolpein fidian tidom lom mok in san ru dulon o tempel lo diau na ya.

## 22

*Judas Jesus ager banid lo igane ya*

*Mat 26:1-5,14-16; Mak 14:1-2,10-11; Jon 11:45-*

53

<sup>1</sup> Bret yis an tia yak san soubul, yanjan Pasova, san saen sumeik. <sup>2</sup> Saen an lo pris gurman adi in kubiaen san girek manau dida tamolpein ninedi

wo direr ak ninen o pasak nam Jesus dufunip imat o palañ an dumari a. <sup>3</sup> Agog Judas yañan neinta Iskeriot dubol dan, Satan ilon lo idu ya. In dam Jesus san megeloum 12 amaiak sad kisaek ta. <sup>4</sup> Agog Judas yaug, pris gurman adi in tempel san titianek tamol sad gurman adi dida diñinñ go dal dugon lo Jesus banid lo igane wan ibol dulon. <sup>5</sup> Agog pris gurman adi ilod tubun mi uyan go Judas moni dupani wak dubol. <sup>6</sup> Judas awad yabi tag tamolpein malad patun fo Jesus ager banid lo igane san dal abañ yabi se ya.

*Jesus inanen megeloum dida Pasova san anañ diani a*

*Mat 26:17-25; Mak 14:12-21; Jon 13:21-30*

<sup>7</sup> Bret yis an tia yak diani san saen idu dugo, sipsip nanun Pasova san saen lo diani san dufu idu. <sup>8</sup> Agog Jesus Pita in Jon da idinaig, ru kagin en irupidai, “Aup, idsad Pasova san anañ akubune.”

<sup>9</sup> Ago tag dusumiani, “Dugot na mok anañ mukubune wo ubol di?”

<sup>10</sup> Agog in irupidai, “Saen añ Jerusalem ilon lo aladu dop, tamol ta you isiri ak isini yau dan ale wa. Nien aban arip, ab dugon lo isuda tap, <sup>11</sup> ab an taman asumianip arupe: ‘Girek mañau igo ibol, galuñ dugon lo ñaineg megeloum dida mañsama Pasova anañ an mani wak i?’ <sup>12</sup> Ago dop galuñ tubun ak ta lak na yak ikubiai panañ a. An atna melmel fidian akubune.”

<sup>13</sup> Tamol uraru an diaug, mel fidian Jesus ibol ago mi dile ya. Ago tag galuñ ante Pasova san anañ dukubune se ya.

*Jesus in bret wain da inaneg megeloum ipidinai a  
Mat 26:26-30; Mak 14:22-26; 1Kor 11:23-25*

<sup>14</sup> Anañ diani san saen idu dugo Jesus tebol sinjiren na inanen megeloum dida dumasi. <sup>15</sup> Agog irupidai, “Ñai gamugo muruan ñisini dop an da Pasova san anañ en tani wo ilog tubun mi yen da. <sup>16</sup> Man dugo, ñai ñurupaian da, ñai fon an da Pasova ta tani na dop yaup, Anut san kagin panek aben lo, mel a Pasova naon inane wan san nuñon ilasa wa.”

<sup>17</sup> Agog Jesus gab wain anda yan inaneg, Anut ilo uyan ipanig ibol, “En ananep ansem nug lo awae. <sup>18</sup> Man dugo ñai ñurupaian da, ñai fon ai wain nuñon san you man ta ñaluk na dop yaup, Anut san kagin panek ipalu gup, fon ñaluk da wa.”

<sup>19</sup> Ago ibol itout go bret inaneg, Anut ilo uyan ipanig yafuteg, ipidinai dugo ibol, “Bret en ñaineg tinig, ñai an niñemi wo ñiganeg idu ya. An ago agane dop ñai ilom isou.” <sup>20</sup> Nek ago mi anañ diani itout go, gab inane yabig igo ibol, “Gab en man kontrak foun ñaisag dar lo ya. Dar en an niñemi wo ñaineg tinig lo yak ilasa wa. <sup>21</sup> Gug alon. An luluñam lo tamol ta ñai ager banid lo iginiag an banin, ñai banig da tebol en fo dien da. <sup>22</sup> Tamol Nanun imat a, nek ibol Anut mi in niñen o ibol ak ago mi in lo ilasa wa. Ak gug tamol enti a Tamol Nanun iganep inanen ager adi sad tuod lo ilasa wan, rumok in muruan tubun kasik ak ile wa!”

<sup>23</sup> Agog inşed nug dusumiani, “Enti mok ago Jesus lo igane wak i?”

*Enti in malan te ya  
Mat 20:25-27; Mak 10:42-44*

<sup>24</sup> Agog megeloum inşed inşed mi enti mitep inş yaŋan malan te yen ak niŋen o nug diabi didiri se ya. <sup>25</sup> Jesus ago ilon tag irupidai, “Gob adi luluŋad lo inşaned kiŋ adi sed idiraip lak na mok disuda dop tamolpein ditirnai o digane wa. Agod tamolpein sad tamol tutubu yan, inşed tamolpein sad binawek tamol ago dubol da. <sup>26</sup> Gug aŋ man dal ago tia ya. Ŋai ŋurupaian da, luluŋam lo ta inş tubun imado wak tap, sen irae imul pe murna imado wa. Ago dugo ta inş gurman imado tap, inş ibol urat pinein oŋ ilasa wa. <sup>27</sup> Ago yak niŋen o enti inş tubun ak i? Tamol a tebol siŋiren na imasig anaŋ yani dan, agod biabi ŋilaŋal tamol enti tamol anaŋ ipani dan, luluŋad lo enti malan te imado di? Aŋ aloŋ ak, tamol a tebol siŋiren na imasig anaŋ yani dan malan te ya. Aria, ŋai aŋ luluŋam lo ŋupalug biabi ŋilaŋal tamol igo woŋ ŋilasag ŋumado da. Ŋai mi aŋanem tutuŋanek tamol ŋumado da. <sup>28</sup> Aŋ ŋai ta abisawag na ya, tia, muruan a fidian ŋisini se yan lo aŋ ŋai da sisem tatur kisaek a. <sup>29</sup> Ago tag nek ibol ŋaineŋ Tamag inşan tamolpein ŋitirnai san dabai ipanag ak igo, ŋai dam dabai ŋupanaŋ a, an lo dop ŋaisag tamolpein atirnai a. <sup>30</sup> Ago dop ŋaineŋ kagin panek aben lo, aŋ ŋai da ŋaineŋ badim fo tumasip tani taluk a. Ago dop aŋ anen anen tulek tamol alasap, kiŋ san kalik fo amasip, Isrel sad gugoi 12 an akubianaip eil a.”

*Jesus Pita inş niŋen o itot ak o ibol a*

*Mat 26:31-35; Mak 14:27-31; Jon 13:36-38*

<sup>31</sup> Agog Jesus Pita irupeŋi, “O Saimon, Satan aŋ fidian ikibianaŋ ile wo Anut isumiani la ya, agod Anut awok ipani a. Satan ilon man nek ibol wit

dufufarig lo dukubiani uyanan dak igo an fidian naom ikubiani ile wo ibol. <sup>32</sup> Gug Saimon, n̄aisag gadiŋ lo oŋane ilo rumok ta idu geig na wak ago Bai n̄usumiani a. Saen n̄aisag na umul dop, oŋane tei in̄aned ilo rumok an dabai pani wa.”

<sup>33</sup> Agog Pita ibol, “Tubun en, n̄ai ta n̄asuk n̄amul na wa, tia, n̄ai oŋ da sisem subanek ab lo taup, sisem tamat a.”

<sup>34</sup> Ago tag Jesus ru naon igo irupeŋ, “O Pita, n̄ai rumok n̄urupaio da, gamu tidom nek en lo kurek ta ibob na dop, saen utol oŋ n̄ai ta uloŋ na yak ubol a.”

<sup>35</sup> Agog Jesus isumianai, “Saen n̄ai n̄idinaŋ go, moni san badam, kitouk, sendal tia au dugo, mel ta lo katuk ami ak i?”

In̄ ru naon durupeŋ, “Man tia ya.”

<sup>36</sup> Agog Jesus irupidaig ibol, “Ak gug gamu man, an̄ moni san badam am da tap, asini wa. Kitouk dam nek ago mi. Agod an̄ sabiri am tia tap, an̄anem kulos didaen̄ lo adirip moni an̄anep ate sabiri adad a. <sup>37</sup> Man dugo, ru e profet ta n̄ai nin̄eg o ago igire yen nuŋon ilasa wa,

“Tamolpein tamol an̄ dijaneg tamol a digane saian dan luluŋad lo digane ya. Nek ago mi tile ya.’ Rumok nuŋon, ru a n̄ai nin̄eg o profet adi digire yan fidian gamu nuŋon ilasa wo da.”

<sup>38</sup> Agog megeloum durupeig dubol, “Ule, Tubun en, sabiri uraru ebo ya.”

In̄ ru naon irupidai, “An nek idaisuda mi a.”

*Jesus Did Oliv fo igudani a*

*Mat 26:36-46; Mak 14:32-42*

<sup>39</sup> Agog Jesus Jerusalem ibiseig, Did Oliv fo yau na yak ago mi fon yau dugo in̄anen megeloum n̄ien



fo diau a. <sup>40</sup> Saen aben ante dilasa man, Jesus megeloum irupidai, “An Anut agudani dop, kubianek lo ta adu na wak o asumiani.” <sup>41</sup> Agog Jesus ibisawaig kitek asau mi yau gug turun isaluwig igudani, <sup>42</sup> “O naineg Bai, ilo ibol tap, gab en n̄ai banig lo pasi wa. Ak gug oñ n̄ai ilog ta uri na wa, tia, oñsigane ilo mi uri wa.” <sup>43</sup> Agog eñel ta lak na idug Jesus dabai ipani. <sup>44</sup> Ilon muruan an lo tubun mok igudani dugo in̄san silali an dar oñ naon tinin fo ilasag tan na idu se ya.

<sup>45</sup> Igudanig itout man imasag, imul yaug in̄san megeloum dien dugo yil. Megeloum an ilod tubun kasik muruan an lo tinid tuon tia ya. <sup>46</sup> Ago tag irupidaig isumianai, “An ata wo aen di? Amasap, agudani dop, kubianek lo ta adu na wak niñen o Anut asumiani.”

### *Jesus diabi a*

*Mat 26:47-56; Mak 14:43-50; Jon 18:3-11*

<sup>47</sup> Jesus ago ibol se man, tamol malan tubun ak dupalug naon na dilasa. Megeloum 12 an luluñad lo ta yañan Judas, in̄ malan an imug go ipalu ya. In̄ ilon yen dak Jesus musuk ipani wa. Ago tag yaug, <sup>48</sup> Jesus san na ilasa yak gug Jesus irupeï, “Judas, oñ musuk lo Tamol Nanun ager banid lo gane wo di?”

<sup>49</sup> Agog megeloum a Jesus dida diau an, kagin dugo ilasa wo ago dile tag Jesus dusumiani, “Tubun en, ilo dugo ibol da, mañsama sabiri nam mafu wak i?” <sup>50</sup> Agog luluñad lo tamol kisaek sabiri ifug pris gurman san biabi n̄ilañal pinein kududon won ak isubari.

<sup>51</sup> Ak man Jesus ibol, “Kagin an fon ta gane na wa.” Agog in tamol an kududon isupurig, kududon uyan isusa da ya.

<sup>52</sup> Agog Jesus pris gurman adi, tempel san titianek tamol sad gurman, agod matu gurman aenta dida Jesus diabi wo dupalu yan isumianai, “Enta wo an sabiri in ai tok da asinig aliag pe abiag o apalu yak i? Ak dugo, nai wagai adi dida gabman mabi idu san gurman igo won an ago ilom isou di? <sup>53</sup> Nal fidian nai tempel aben lo numasi dugo tamolpein npipejanai se ya, ak gug nai ta abiag na ya. Gug gamu en tidom tubun ak lo man ansam saen a, man dugo, tidom tubun san tuon man Satan.”

*Pita Jesus ilon gug njen o itot a*

*Mat 26:57-58,69-75; Mak 14:53-54,66-72; Jon 18:12-18,25-27*

<sup>54</sup> Agog Jesus diabig, pris malan te yak san ab lo dinane diau dugo Pita njed fo ipare murna dugo yau. <sup>55</sup> Yai ab naon na dutunig, tamol tinid isue dugo Pita dam yaug dida dumado se ya.

<sup>56</sup> Ago dugo urat pein ta ipalug, malan ti ibol go, Pita yai san lilaman lo imasig imado dan ile dugo ibol, “Tamol an dam Jesus da dator na ya.”

<sup>57</sup> Agog Pita itot go ibol, “O pein, nai in ta njalon na ya.”

<sup>58</sup> Kitek taidag tamol ta Pita ile tag ibol, “On dam insad kisaek a.”

Gug Pita irupeig ibol, “O tamol, nai man tia mok a!”

<sup>59</sup> Murnag auwa kisaek igo dumado gug tamol taidam imasag ibol, “Rumok, tamol en in da dator na ya. In dam Galili tamol a.”

<sup>60</sup> Ago dugo Pita ru naon irupeï, “O tamol, ñai oñ ata niñen o ubol dan ta ñalon na ya!” Ago ibol dugo awan fo kurek ibob. <sup>61</sup> Jesus idañsag, malan ti ibol go Pita ile. Agog Pita gamu nam Jesus san ru imug ibol an ilon isou, “Gamu kurek gamugo ibob dop, oñ saen utol ñai niñeg o utot a.” <sup>62</sup> Agog Pita ilon itaug, kuai te ilasag tinañ tubun mi igane se ya.

*Jesus kukok an digane dugo dufuni a*

*Mat 26:67-68; Mak 14:65*

<sup>63</sup> Tamol a Jesus diabi an kukok an digane dugo dufuni se ya. <sup>64</sup> Malan yamel nam dufoug, dufuni dugo dusumiani, “Oñ gamu profet ru ubol a, tamol e ifuno den enti ak i?” <sup>65</sup> Ago dugo nao futek ru aenta wei mi nam dupei se ya.

*Jesus diñaneg Juda kaunsil naod na kot dupani a*

*Mat 26:59-66; Mak 14:55-64; Jon 18:19-24*

<sup>66</sup> Salso idug Juda sad gurman adi, kubiaen san girek mañau adi, agod pris gurman adi dida dutumanig Jesus dititianig dumado se ya. Agog Jesus diñaneg kaunsil an naod na dugunig itur a. <sup>67</sup> Ago dugo durupeig dubol, “Ubol! Oñ Kristus i? Rupaiamap malon a.”

Jesus ru naon irupidai, “Ñai ñurupaian tap, an ilom lo ta rumok na wa. <sup>68</sup> Agod sumianek ñupanan tap, an ru naon ta arupaiañ na wa. <sup>69</sup> Gug saen gamu yau den, Tamol Nanun Anut a dabai fidian anda yan banin won ak lo imado wa.”

<sup>70</sup> Ago tag dusumiani, “Ak dugo, oñ Anut nanun ak ubol di?”

In ru naon irupidaig ibol, “Awo, nek ansem abol la ya.”

<sup>71</sup> Agog dubol, “Gidad, tamol taidam, tamol en san kagin ninen o dubol ilasa san id ta tigiayi na wa. Injsen awan lo injsan muruan ibol go talonj la ya.”

## 23

*Jesus Pailat naon na kot dupani a*

*Mat 27:1-2,11-14; Mak 15:1-5; Jon 18:28-38*

<sup>1</sup> Agog kaunsil an fidian dumasag, Jesus dinjaneg, gabman gurman Pailat dubol dan san na diau a.

<sup>2</sup> Pailat naon na dilasag kot diganeg, ru dusue ti ibol go dubol, “Manj tamol en Isrel tamolpein ikubulai tag mabi a. Kaisa san takis ta didad na wak ibol. Inj man Juda sad Kristus ibol, an ninen o inj mi kinj ibol da.”

<sup>3</sup> Ago tag Pailat Jesus isumiani, “Onj Juda sad kinj ak i?”

Agog Jesus ibol, “Awo, nek onse ubol la ya.”

<sup>4</sup> Ago tag Pailat pris gurman adi, tamolpein malan tubun ak dida irupidai, “Njai tamol en san muruan ta lo naon njupani san njile man tia ya.”

<sup>5</sup> Ago bo man tamolpein ru dabai kasik dubol, “Inj tamolpein ipitejanai dugo bubed yabisap gabman da ager dumado wo igane da. Galili na fun iganeg, ipalug gamu etna ilasa ya.”

<sup>6</sup> Pailat ru an ilonj tag isumianai, “En inj Galili tamol i?” <sup>7</sup> Jesus Galili tamol an ilonj tag, idinai dugo dinjaneg kinj Herod san na diau. Man dugo, Herod inj Galili kagin ipani da, an lo Jesus Herod paen na imado. Herod saen nek an lo Jerusalem na imado se ya. <sup>8</sup> Saen Herod Jesus ile man ilon tubun mi uyanan a. Man dugo, saen milaen inj Jesus ile san ninen o ilon yen. Inj ilon man Jesus kulob girager

ta igane dop ile wo ibol. <sup>9</sup> Aria, Herod sumianek funfun ipani se ya, ak gug Jesus ru naon irupei man tia ya. <sup>10</sup> Go pris gurman in kubiaen san girek manau dida Herod naon na insad ru sewak an dusue ti ibol go Jesus maeg nam kot dupani se ya. <sup>11</sup> Agog Herod agod insan yu tamol dida Jesus kukokan digane se ya. Kin dututunanig yamel ta kin sadi on ak tinin fo diganeg Pailat san na fon dinane diau a. <sup>12</sup> Imug Pailat in Herod da siai lo dumado na ya. Ak man nal nek an lo in nug turan dilasa ya.

*Pailat Jesus aigim fo dubali wo ibol a*

*Mat 27:15-26; Mak 15:6-15; Jon 18:39-19:16*

<sup>13</sup> Pailat pris gurman, agod Juda tamolpein sad gurman adi dida igiaig dutumanig <sup>14</sup>igo ibol irup- idai, “Anj tamol en anane apalug abol, in tamolpein bubed yabisap gabman ida ager dumado wo igane da. Anj naom na tamol en nibitinaeg njile ak gug, muruan a ninen o abol dan fun ta njile man tia ya. <sup>15</sup> Herod dam nek ago mi ibitinae ile tag, fon iganeg idsad na ipalu ya. Tamol en mel ta igane saian pe lo materj ile san tia ya. <sup>16</sup> Ago yak ninen o bu mi inane gup nibiseip yau a.”\*

<sup>18</sup> Agog in fidian awad kisaek lo mi disa- aig dubol, “Tamol an funi imat. Barabas pasi panamap mansama na imul!” <sup>19</sup> (Barabas man in gabman san ager. In Jerusalem ilon lo ager yabisag an lo tamol ta ifuni imat a. An ninen o diabig subanek ab lo diganeg imado.)

<sup>20</sup> Pailat san ilon man, Jesus ibiseip yau o ibol da, ago tag tamolpein malan tubun an fon isumianai

---

\* **23:16:** Boi 17 Grik lo tia ya.

a. <sup>21</sup> Ak man in fon duwagin imul go dubol, “Aigim fo bali wa! Aigim fo bali wa!”

<sup>22</sup> Ago tag Pailat afon ibol, “In ata muruan ta igane yak ninen imat o abol di? Nai inſan muruan ta nile man tia ya. Ago yak ninen o nabol dop bu mi inaneſ nſibiseip yau a.”

<sup>23</sup> Ago bo man in tubun mi disasaig, Jesus aigim fo ibali wak dubol. Agog inſad sisein an Pailat san ru yabi idu. <sup>24</sup> Ago tag Pailat inaned ru dubol an awad yabig awok ipidinai a. <sup>25</sup> Inaned ilod ibol ago mi tamol in gabman lo ager imadog tamol ta ifuni imat an subanek lo ipasi a. Agog ilod ibol dan ago mi digane wo Jesus banid lo igane ya.

*Jesus aigim fo dubali a*

*Mat 27:32-44; Mak 15:21-32; Jon 19:17-27*

<sup>26</sup> Agog Jesus diſane diau dugo dal na Sairini tamol ta yanſan Saimon in Jerusalem na iladu wo dugo diabig Jesus san aigim an dupanig isinig nien fo yau.

<sup>27</sup> Tamolpein wei nuſon Jesus nien aban diri dugo, lulunad lo pein aenta Jesus ninen o tubun mi ditata dugo tinaſ aru digane se ya. <sup>28</sup> Ago tag Jesus idanſag irupidai, “An Jerusalem pein, nai niſeg o atata amoi. Tia, ansem niſemi wo mi tinaſ aru agane wa, agod ananem nanuk niſedi wo dam mi a. <sup>29</sup> Man dugo, mitep muruan tubun mok ipalu dop tamolpein dubol a, ‘Pein niganig, pein nanuk ad tia yan, agod pein a imug nanuk su ta dupidinai na yan dam gamu ilod uyanan a.’ <sup>30</sup> Saen an lo tamolpein dubol a, ‘Did adup, afunama mamat. Bubun adup, atuanama!’

<sup>31</sup> Tamol gamu ai kumaen ak lo igo digane da. Ago tap, saen ai ikurnjak geig ak lo, ata mel ilasa wak i?”

<sup>32-33</sup> Tamol saiadi ak uraru dam Jesus ida dijal go diaug aben ta, yanjan Kabunja Tatu san aben dubol dak, ate dilasa ya. Aben ante Jesus tamol uraru an dida aigim fo dubalai a. Neinta tuon won ak lo dugo, neinta tuon nas ak lo ya. <sup>34</sup> Agog Jesus ibol, “Bai, injsad aupasek en pare idu, man dugo, mel e digane den dijaonj ak lo digane da.” Agog injsan kulos duburoug, sed nug lo duwaeg lo satu dukok a.

<sup>35</sup> Tamolpein leil digane dugo dutur a, ago dugo Juda sad gurman adi Jesus kukokan digane dugo dubol, “Inj aenta patud ipasi na ya. Ago yak ninen o, inj tamol a Anut ipiliani an, Anut san Kristus, an rumok tap, ka sen patun ipasi dop tile.”

<sup>36</sup> Yu tamol a dititiani dan sinjiren na dupalug kukokan digane se ya. Inj wain gigen geig ak wain uyan ak da dukubulig diabisag dubol, “Uluk. <sup>37</sup> Onj rumok Juda sad kinj tap, se ibinawo!”

<sup>38</sup> Ru ta ai lapan fo digireg aigim kabunjan fufo na dubali a. Ru en san sutek lo man igo ya, “En Juda sad Kinj.”

<sup>39</sup> Agog tamol saiadi an kisaek imasag Jesus naon ifute ipeig ibol, “Onj Kristus. Ago tap, onse ibinawo dop, manj dam binawama!”

<sup>40</sup> Ak man turan imasag irupej, “Dugo, onj Anut ninen o ta urer na di? Id utol muruan naon kisaek mi tisini da. <sup>41</sup> Id man bo tisini wak fom tisini da. Man dugo, idsad kagin naok naok fom ai wadan en dupanad a. Gug tamol en man kulob ta igane saian man tia ya.”

<sup>42</sup> Agog tamol an Jesus irupeï, “Jesus, saen oñ kin lasa dop, ñai ilo isou.”

<sup>43</sup> Jesus ru naon irupeï, “Ñai rumok ñurupaio da, gamu en oñ ñai da Paradais lo sisem tumado wa.”

### *Jesus imat a*

*Mat 27:45-56; Mak 15:33-41; Jon 19:28-30*

<sup>44</sup> Saen an ad isudag 12 klok igo woñ dugo, abañ tidom tubun go tan fidian yafutanig yen dugo yaug 3 klok gurai isi a. <sup>45</sup> Man dugo, saen an lo ad ta ided na ya. Agog yamel tubun tempel lo iyuk yen an, imasireig uraru dilasa ya.† <sup>46</sup> Agog Jesus awan tubun mi iwagin go ibol, “Bai, ñaineg ñutug oñ bani lo ñigane da.” Ago ibol go imat. <sup>47</sup> Agog Rom yu tamol sad gurman in abañ ago ileg, Anut yañan yabisag ibol, “Rumok geig. Tamol en man muruan ta tinin lo tia ya. Inj itaot a.”

<sup>48</sup> Saen tamolpein a gubak mi abañ dile wo dutumani an Jesus imat dugo dile man, ilo muruan lo sed titired dufunig‡ aben an dibiseig diau a. <sup>49</sup> Gug tamolpein fidian a Jesus duloñ an, pein a Galili nag ñien fo dupalu yan dam, duparianig asau mi dutur a. Dugo dugo ilasa yan dile wo malad digane ya.

### *Jesus mutou lo digane ya*

*Mat 27:57-61; Mak 15:42-47; Jon 19:38-42*

<sup>50-51</sup> Tamol ta yañan Josef, in Juda panu ta Arimatia dubol dan san tamol. Inj tamol uyan, agod itaot. Inj Anut san kagin panek ipalu wo malan igane se ya. Inj Juda sad kaunsil lo imado gug kaunsil dida Jesus san mateñ o ilod ta kisaek na ya, agod

---

† **23:45:** Kulob an fun man igo ya: Jesus san mateñ an log dalawan ipasig, gamu id fidian Anut san na tau san dal yen da. ‡ **23:48:** An man ilo muruan san kob



awok ta ipidinai na ya. <sup>52</sup> Tamol an Pailat san na yaug, Jesus san sisanun inanep mutou lo igane wo isumiani. <sup>53</sup> Pailat awok ipani tag Jesus san tinin tubabun aigim fo yak ipasig, yamel milkouk ak nam ifoug, gib ta pat tubun ak ilon dupasi an lo igane ya. Gib an imug tamol ta ate disare man tia ya. <sup>54</sup> Nal an Soubul Kubunek San dubol a. Sabat nal fun igane wo da. §

<sup>55</sup> Pein Galili nag Jesus njen fo dupalu yan Josef dida diaug, gib a lo Jesus san sisanun dugo dugo wonj iganeg yen an dam dile ya. <sup>56</sup> Agog dumul, inşigned na diaug, gurenj mumalun uyan ak Jesus tinin diabi wo dukubune idu. Sabat nal ilasa tag kubiaen ibol ak fom diganeg, yaes dubal.

## 24

*Jesus fon kumaen imasa da ya*

*Mat 28:1-10; Mak 16:1-8; Jon 20:1-10*

<sup>1</sup> Aria, ubou san nal Sabat dubol dan\* itout go nal patun fo, ubou turan san nal malmalan,† tidom lom geig, pein gurenj mumalun uyan uyan ak fidian dukubune yan disinig, mutou fun na diau a. <sup>2</sup> Mutou fun na dilasag, pat tubun a ate mutou awan dufutani an awan dubuli yau la yan dile ya. <sup>3</sup> Ago tag gib ilon lo diladu yak gug Jesus san sisanun ta dile na ya. <sup>4</sup> Agog kankan ifu dugo dutur ibol ak, tamol ta urarum, inşad kulos weil irafule dan san lilaman igo wonj ak, giraned na dilasag dutur dugo dil a. <sup>5</sup> Pein an tubun kasik

---

§ **23:54:** Juda sad ilo sou lo, gurai idug ad idiau itout man, an nal foun ak ilasa la yan san kob. \* **24:1:** Sarere † **24:1:** Sande

direr go naod itakok tan na idu ya. Agog tamol uraru an durupidai, “An̄ ata wo tamol dumat ak luluᅇad lo tamol kumaen ak aban̄an abi dak i?”<sup>6</sup> In̄ etna tia. In̄ kumaen imasa ya. Ilo sou agane, gubak mi saen an̄ in̄ da Galili na amado yan igo irupaian̄ go ibol,<sup>7</sup> “Tamol Nanun aupasek tamol banid lo diganep, aigim fo dubali wa. Agop nal utol yen gup, fon kumaen imasa da wa.”<sup>8</sup> Ago dubol dugo pein an̄ Jesus san ru ilod isou.

<sup>9</sup> Ago tag mutou dibiseig dumul diaug, megeloum 11, agod tamolpein aenta dida dumado dan dam durupidai a. <sup>10</sup> Pein a diau an: panu Magdala san Maria, Joana, agod Jems tinan Maria. In̄ pein aenta dam dida diau ak ru an̄ aposel adi naod na dubol. <sup>11</sup> Ak man aposel adi sad ilo sou lo man, ru a pein an̄ durupidai an̄ n̄ᅇeo mi a, an̄ n̄ᅇen o ilod lo ta rumok na ya. <sup>12</sup> Gug Pita imasag, imaspalug, mutou fun na yaug, iyep pat gubaran ilon lo yau ya. Ak man yamel a ate Jesus san sisanun dufou an̄ mi yen dugo ile tag, kankan gidigheid in̄ane dugo fon imul ab lo yau a.

*Tamol uraru Jesus dal a Emeas nayau dan te dile ya*

*Mak 16:12-13*

<sup>13</sup> Nal kisaek an lo mi luluᅇad lo tamol uraru in̄ panu ta Emeas dubol dak lo diau se ya. (Jerusalem biseip, 11 kilomita wau gup, Emeas na lasa wa.)<sup>14</sup> Dal na melmel a fidian ilasa na yan nug lo dukubiai dugo diau se ya. <sup>15</sup> In̄sed diᅇᅇen̄ di diau dugo Jesus in̄sen ilasag, luad isag, dida sisem diau a. <sup>16</sup> Tamol uraru an̄ Jesus dile bo man, Anut malad yafutani an lo in̄ tamol sen ak ta dubol a.

17 Agog Jesus isumianai, “An so ru ta abol dugo au di?”

Ru an duloŋ go dupartuanig ilo muruan ad da dutur a. 18 Tamol ta yaŋan Kleopas imasag isumiani, “Nag onse kisaek Jerusalem na nor warim kulob ilasa na yan ta uloŋ na boi i?”

19 Ago dugo Jesus isumianai, “So mel ta?”

In ru naon durupe, “Muruan nek a Nasaret tamol yaŋan Jesus dubol dan lo ilasa amaiak niŋen o mabol da. Tamol an in profet. Insan niŋen, urat dam dabai anda igane se ya. Anut, in tamolpein dida dupitiani na ya. 20 Maŋsama pris gurman adi agod idsad gurman fidian dida dubol dugo, Rom san gabman gurman banin lo digane ya. Agog tamol an kot ipanig aigim fo dubalig imat a. 21 Maŋ iloma lo, Anut tamol an Isrel adi patud ipasi wo ipiliani a. Ago igane wo maŋ tinim migane pani na ya, gug gamu tia ya. Taida mi, gamu muruan an ilasa gug nal utol yau la ya. 22 An mi tia, maŋsama pein luluŋad lo aenta tidom lom mutou fun na diau a. 23 Mutou fun na dilasag tubabun gib lo ta dile na ya. Ago tag maŋsama na dumul go igo durupaiaama, malad ŋutun dile dugo eŋel uraru dil go eŋel an durupidaig dubol, ‘Jesus kumaen imasa la ya.’ 24 Ago tag maŋ luluŋam lo tamol aenta mutou fo diaug pein adi durupaiaama yak ago mi dile ya. Ak man tubabun ta dile na ya.”

25 Agog Jesus irupidai, “An ilom tia. Ata wo profet adi ru dubol na yan ilom lo ta rumok na yak i? 26 Profet adi kuai tem dubol, Kristus mitep muruan isini gup, inanen girager agod yaŋan tubun ak inane wa.” 27 Agog inŋen niŋen o girek lo Moses in profet adi dida niŋen o dubol na yan fun ifulale ya.

<sup>28</sup> Agog dupalug, Emeas sumeik dugo, Jesus itaot yau wo igane tag <sup>29</sup> diabituanig durupeï, “Ad idu la yak ninen o umoip, taen.” Ago tag dida ab lo disida ya.

<sup>30</sup> Anan diani wo dumasï dugo Jesus bret inaneg, Anut ilo uyan ipanig, yafuteg, ipidinai dugo malad ipuk go <sup>31</sup> in dulon man, tamol en nek Jesus sen a. Agog Jesus gamu nam malad lo tia yau. <sup>32</sup> Agog tamol uraru an nug ru durupeig dubol, “On ilo isou, gubak mi saen Jesus id da dal na turen tabi dugo ru fidian girek lo yan fun ifulale panad se yan, inŝan ru bubed lo nek ibol yai inani dak igo won a.”

<sup>33</sup> Agog dumasag fon Jerusalem na ririan dumul go diau. Jerusalem na megeloum 11 an in turad aenta dida dutumanig dumado dugo dil a. <sup>34</sup> Agog in tamol uraru an durupidai, “Rumok geig. Tubun en fon kumaen imasa ya! Saimon Pita sen malan lo mok ile ya.” <sup>35</sup> Ago tag tamol uraru an dam dal na aban dugo dile yan dubol, “Man dam dal na mile yak man in ta malon na ya. Gug saen bret yafuteg ipanama ante dugo in malon a.”

*Jesus megeloum naod na ilasa ya*

*Mat 28:16-20; Mak 16:14-18; Jon 20:19-23; Apo 1:6-8*

<sup>36</sup> Tamol uraru an ago dininen dugo Jesus lulanad lo ilasag ibol, “An maror amado.”

<sup>37</sup> Agog durut go direr saian. In ilod lo tamol n̄utun ta naod na ilasa dubol a. <sup>38</sup> Agog isumianai, “An ata wo arer dak i? An ata ninen o ilom weiwei di? <sup>39</sup> Malam ipalup, n̄ieg banig ale. En man n̄aiseg.

Abiag pe aliag! Tamol ŋutun man tinid tatu an tia ya. Gug ŋai man tinig tatu amag da ya.”

<sup>40</sup> Ago ibol go ŋien banin ikibiai dugo dile ya.

<sup>41</sup> Inj ilod uyan ak man ilod lo kitek ta rumok na ya. Man dugo, durut saian dugo inj ilod weiwei, an lo ilod lo rumok san ta pasauman na ya. Ago tag isumianai, “Anj etna mel nuaen san ta yen di?”

<sup>42</sup> Agog iy gisek ak dupanig, <sup>43</sup> naod nam injaneg yani dugo dile ya.

<sup>44</sup> Agog irupidai, “Imug ŋurupaian ak ilom isou. Wagam Moses san kubiaen lo, profet adi sad girek lo, agod Isrel sad kanam buk lo dam, melmel fidian ŋai o digire na yan nunon ilasa wa.”

<sup>45</sup> Agog insad kankan isofulaleg, an lo Anut san ru girek lo yen dan fun mok dulon fufei a. <sup>46</sup> Agog irupidai, “Ru a buk lo digire yan igo ibol: Kristus mitep muruan isinip, imat pe, nal utol gib lo yen gup, fon kumaen imasa da wa. <sup>47</sup> Inj yaŋan lo Anut tamolpein ilod ibilisa dop, inaned muruan ipasi pidinai an san ru, Jerusalem na fun igane gup, panu panu lo yau a. <sup>48</sup> Anj melmel ilasa dugo ale na yan abol dop, dulon a. <sup>49</sup> Bai mel ipanaŋ o ibol an ŋau gup, ŋidinip ipalu wa. Ago yak niŋen o Jerusalem na malam aganep amado dop yaup, dabai a lak na yak ipalu wan idup an tinim injanefute wa.”

*Jesus lak na isuda yau a*

*Mak 16:19-20; Apo 1:9-11*

<sup>50</sup> Agog Jesus injal go diaug, Betani na dilasa ya. Atnag banin yabisag, bar ipidinai a. <sup>51</sup> Agog ibisawaig, Taman injaneg sinjiren na yau a. <sup>52</sup> Tamol a leil digane dan Jesus ubou an dile gug yousai

tubun geig ak lo mi dumul go Jerusalem na diau  
a. <sup>53</sup> Ante saen wei mi tempel lo Anut per dupani  
dugo dumado na ya.

**Anut san bilalug foun**  
**The New Testament in the Takia Language of Papua**  
**New Guinea**  
**Nupela Testamen long tokples Takia long Niugini**

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

---

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d